

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮӖР  
СЕТАН КОМИ РЕСПУБЛИКАСА АГЕНТСТВО

# ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

## 9 КӖЧ (СЕНТЯБРЬ) 2014

ТАЙӖ НОМЕРЫН:

### ЮБИЛЕЙЯС

|                                             |    |
|---------------------------------------------|----|
| Чолӧмалам! .....                            | 3  |
| Надежда МИРОШНИЧЕНКО. Медкӧ ме эг сорсы.    |    |
| Кывбуръяс .....                             | 4  |
| Эм-ӧ олӧмас мыйкӧ вынаджык кывйысь?.. ..    | 9  |
| Чолӧмалам! .....                            | 11 |
| Артур АРТЕЕВ, Андрей ПОПОВ. Ола надеяӧн.    |    |
| Ёрта сёрни .....                            | 12 |
| Андрей ПОПОВ. И шуӧма кӧ лоны мен поэтӧн... |    |
| Кывбуръяс .....                             | 14 |

|                                                    |    |
|----------------------------------------------------|----|
| Елена АФАНАСЬЕВА, Любовь АНУФРИЕВА.                |    |
| www.кык_ю.гу. Повесыт-сёрни .....                  | 18 |
| Анжелика ЕЛФИМОВА. Бӧлбанӧ — пьеса гижны .....     | 55 |
| Иван БЕЛЫХ. Юрӧбтас-ӧ Весываын жыннян? .....       | 63 |
| Никон ХАТАНЗЕЙСКИЙ. Изываса водзмӧстчысь ань ..... | 70 |

### ЧЕЛЯДЬЛЫ

|                                 |    |
|---------------------------------|----|
| Алексей МИШАРИН. Висьтъяс ..... | 73 |
|---------------------------------|----|

6+

Обложка вылын снимокыс Альберт Логиновлӧн.

© «Войвыв кодзув» («Северная звезда»), 2014 г.

СЫКТЫВКАР

# СЕВЕРНАЯ ЗВЕЗДА



***Ежемесячный  
литературно-художественный  
журнал***



**Учредители:**

**СОЮЗ ПИСАТЕЛЕЙ РЕСПУБЛИКИ КОМИ**

**АГЕНТСТВО РЕСПУБЛИКИ КОМИ ПО ПЕЧАТИ  
И МАССОВЫМ КОММУНИКАЦИЯМ**



**АУ РК «ИЗДАТЕЛЬСКИЙ ДОМ КОМИ»**



**И.О. ДИРЕКТОРА: ПЛЕТЦЕР Е.В.**



***РЕДАКЦИОННАЯ КОЛЛЕГИЯ:***

Главный редактор

ПОЛУГРУДОВ А.В.

Ответственный  
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.

ТИМИН В.В.



## Чолөмалам!

Сентябр 12 лунö чужис коми поэт, «Арт» журналын шөр редактор Галина Васильевна Бутырева.

Удора, Ву, Йöртымдін — тайö кывъясыс тшöкыда паныдасълöны сылön кывбуръясын. Тайö кывъясыскöд йитчöма сылön став олöмыс, медбур казтылöмъясыс, шу да челядьдырыс.

Чужанін... мыйта вын сійö мианлы вичмöдö, мыйта сьöкыдлун отсалö венны, и пыр виччысьö... виччысьö...

Гашкö, ставсö тайöс думайтöмön и чужисны поэт вежöрын колана, стöч да сьölöм чепöртысь кывъяс.

Лыддян, и быд кывбур, быд гижöд — тайö радейтöм, мывкыдлун, мöвп. Лыддян, да быттö и тэнсьыд олöмтö сэтчö пасйöма. И кызди ылі Удораын тулыснас петалö берегсьыс Ву, кызди сылы некутшöм кутöд ни йöртöд абу — ойдöдлö сиктъяс да грездъяс, и Галина Васильевналысь муса Сёрдласö, Лязювсö, Йöртымдінсö,— сідз жö и ловлы матыс кывъяс аддзигön сьölöмыд выльысь и выльысь ойдлö Чужанін, Кыв да Олöм дінö муслунön.

Поэтлön Туйыс некор абу шыльыд... А нöшта кö на сылы шуöма лоны и веськöдлысьöн... и бур веськöдлысьöн...

Уна вын, кужанлун да сям Галина Бутырева пуктіс Коми республика сöвмöдöмö, культура кыпöдöмö, «Арт» журнал дасьтöмö. Аттьö, Галина Васильевна, Тіянлы ыджыд сьölöмысь, бурлунысь, век выль мöвпъясөн чуймöдöмысь!

Чолөмалам Тіянöс чужан лунön, гöгрöс лыдпасөн да сиам водзö вылö уна вын-эбöс, дзоньвидзалун, кыпыд лола выль гижöдъяс!



ГИЖЫСЬ КОТЫР,  
«ВОЙВЫВ КОДЗУВ»  
ЖУРНАЛ РЕДАКЦИЯ



*Галина Васильевна Бутырева* чужис сентябр 12 лунö Удора районса Йöртымдін сиктын.

Велöдчис Йöртымдінса, сэсса Важгортса школаын. 1966 воын Коми пединститут помалöм бöрын уджаліс Чубса, а сэсса Йöртымдінса школаын.

1968—1986 воясö уджаліс Сыктывкарса телестудияын, 1991 восянь — Республикаса культура министрöс вежысь. Уджаліс фольклор театрын литература консультантöн, веськöдліс Коми Республикаса финн-йöгра культура шöринöн, Коми Республикаса национальностъяс кузя министрствоöн, вöлі Коми Республикаса юралысьöс вежысьöн.

1997 восянь Г.В.Бутырева «Арт» журналса шöр редактор.

Гижö комиöн и рочöн. Петаліс кывбуръяса да туйвыв пасйöдъяса некымын небöг.

Галина Васильевна — Коми Республикаса правительстволöн И.А.Куратов нима премия лауреат (2005 во), Коми Республикаса культураын заслуженнöй уджалысь (1994 во), Россия Федерацияса культураның заслуженнöй уджалысь (2011 во). Пасйöма «За заслуги перед Отечеством» II тишупöда орденлöн медальöн (2005 во).

Россияса гижысь котырын 1997 восянь.

Г.В.Бутыревалöн йöздöма некымын небöг коми и роч кыв вылын. Бöргя кадö Галина Васильевна вуджöдіс ай-мам кыв вылö вель уна кывбур мукöд кывъя гижысьяслысь. «Чайта, миян колö тиöкыдджыка тöдмöдны коми войтырнымöс вуджöдмъясöн,— шүö Галина Васильевна,— та отсöгöн ми вермам озырмöдны культуранымöс, сылысь мирын тöдчанлунсö, а лыддысьысылысь — кругозорсö». Миян журналö поэт вöзйис Надежда Мирошниченколысь кык комиöдм кывбур, кык верлибр.

Надежда МИРОШНИЧЕНКО

## Медкö ме эг сорсы

\* \* \*

Печора вöрзьöма...  
Кын йиа морöс вылас  
чепöсйöма ытва,  
здук-мöд, и ойдас  
ставыс гөгöрбок...  
А ыджыд ваыд —  
векджык ыджыд шог...  
Кöть эськö сійö  
вайывлас и буртор:  
дзик кильчö помад —  
тöвбыд кежлö пес,  
тэ сöмын öкты васьыс,  
кыскав!—  
дзик дон босьттөг...  
А кымын баржа  
петöмны нин туйö,  
мед ыджыд ваөн  
вайны сёян-юан  
Печора вывса  
дзик быд сиктö-грездö...  
А нöшта!— тувсов ванад



---

шедӱджык и чери!..  
Устьцильмасаяс гажтӱмтчӱмны  
сытӱг,—  
быд керка дорын  
дась нин пыж-моторъяс,  
и ветельяс, и мукӱд кыйсян кӱлуй..  
Дерт, рыбинспектор дась жӱ,  
кӱнкӱ, витчӱ,  
кор сиктса войтыр  
уськӱдчас ю выль..  
А оз ӱмӱй нӱ тулысын жӱ панлы  
выль керка сиктса олысь, медкӱ  
сӱр арын коркӱ ӱтчӱд петӱс  
выль пачысь асья пӱжас, гортса нянь?..  
Мед нимкодясъны  
пӱжӱм пӱлӱн сернас и...  
Быд гожӱм сиктын  
тырйыс воӱм войтыр,  
а тулысын на абӱӱсь,  
и радлӱм  
пӱль-пӱчлӱн синмас,—  
мудерӱсь жӱ найӱ,—  
мед эськӱ эз и волены нин сӱсся,  
эз дӱзмӱдчыны,  
сьылӱдны да мойдны,  
эз нуны сӱрсьыс  
ӱбраз ли важ небӱг...  
Выль керка тшупӱ  
томиник на зон,  
став чужӱм тырйыс  
сотчӱ тувсов берин.  
Ме выль чӱвтлас синсӱ,  
быттӱ ӱзъяс нӱмӱн:  
— Но, мый нин гижан-сӱран  
эськӱ бара?  
— Ог эськӱ сӱр да,  
гижа сиктса олӱм,  
дзик сӱтшӱм нога,  
кутшӱм танӱ — мича, югыд...  
Зӱв осьса сӱлӱма,  
бурнога...  
И весиг юсянь тӱлыс  
танӱ шоныд!—  
йи кылалӱгӱн?!  
Мыйла, эськӱ?..  
— А тӱ выль керка лӱптан?  
— Шнички выльӱс!—  
серӱктыштӱс зон.  
И сыкӱд ӱттшӱтш  
меным лои нимкодъ.  
Ме эска, арнас петас  
зонмӱд татчӱ овны.  
Оз вояс кежлӱ лӱпты оланӱнсӱ,  
а нӱмъяс кежлӱ,

некымын рѡд вужлы...  
Ми бокті уялѡны  
татчѡс зарни аньяс,  
зѣв мича кышѡда,  
оз тѣрмасьны,  
оз дзѡрны,—  
став муывивса чѡв-лѡньыс  
быттѣѡ накѡд,  
став ашпод выныс,  
нѣмѡвѡйся кадыс...  
И видзѡдласныс налѡн веськыд,  
нѣѡти повтѡм...  
Тан весиг понѣяс  
весьшѡрѡ оз увтны,  
оз усьласьны тѣ вылѡ,  
кѡть тѣ коді.  
И менам чужѡ кѡсйѡм:  
медкѡ ставыс,  
мый меным мѡрччис  
сьѡлѡмѡ и юрѡ,  
ѣз некор вунлы.  
Медкѡ ме ѣг сорсьы.

\* \* \*

Кань моз  
нюжѡдчѡмѡн  
курга-гожѣяла  
керка вевт выланым.  
И шондѣыс менѡ гѡгѡрвоѡ —  
мынтѡдчылѡ кымѡрѣяс сайсьыс,  
петкѡдчылѡ.  
Вит судтаа керканым  
сулалѡ-гоньвидзѡ  
мукѡд пѡвстас,  
выль на.  
Сѡмын, коді тѡдас,  
дыр-ѡ пондас сулавны...  
А меным ѣськѡ колѡ —  
мед нѣмѣяс чѡж сулаліс!  
Вылісяньыс ставыс сѣтшѡм бура тыдалѡ:  
со комын ѡтикѡд патераын  
быдтысьѡны серпасалысьѡс,—  
новлѡдлѡны музейѣсті,  
а сылѡн (Енмыс ѡд аддзѡ!)  
юрас сѡмын «техника»,—  
мый ки улас сюрѡ,  
сйѡс и «дзоньталас»,—  
будильник кѡть,  
кѡть самокат...  
Ѧні самокатыс сылѡн  
быттѣѡ самолѣт,  
сѡмын оз на лѣбав...  
Змей-Горыныч моз

бордъяснас шенасьö...  
Ме гөгөрвоа зонкасö.  
Ме ачым коркö кöсйылi  
быдтыны нылöс велöдысьöн,—  
а öнi меным пырджык ковмывлас  
видзтысьны быдсяма краскаяс вылö.  
Мый вöчан?!  
Миян керкаын олысьяс тöдöны,  
мый ме ачым  
кывбур гижысь...  
Кутшöм ичöt миян  
му шарыс!  
Миян вит судтаа керка —  
быттö талунъя му шарыслөн  
нэм пертас (модель)...  
Танi чужлö и сöвмывлö  
и радейтчöм, и лöглун,  
и ёртасьöм, и кось...  
Эмöсь миян быдсяма войтырыс.  
Сидз, вузасьысь войтыр —  
зэв юр садь кутысь.  
Быдөн — политэконом.  
Маркслөн формулаыс  
«Товар—деньги—товар»  
йиджöма налы  
мус выйöнöдзыс...  
И «прибыль», дерт, тшötш.  
Шойччан лунö  
быдөн петö ывла вылö,  
медся нин быдсяма ковёр  
пыркöдны...  
И быттö асыывывса базар  
миян керка дорным сэки,  
сöмын арабскöй вöвъяс  
оз тырмыны...  
И мыйла сы мында ковёрыс?—  
персияса княжнаяс ми  
али мый?..  
А кöкъямысöд квартираын  
век öшалö ыджыд томан,—  
гусьясысь...  
Кöть эськö сэн быттö  
нинöм и абу.  
Но гусыс кö пырас  
буретш сэтчö?!  
Бöрд кöть серав...  
Бур йöзö! Дорся олысьясö!  
Гижны эськö тiян йылысь,  
быдөн йылысь небöг,  
но кызд?!—  
оланныд кö томанъяс сайын.  
Нöшта на топыдджык кöрт томанъясысь  
миян пытшкöсса томанъясыс...  
Некор весиг кыв вежны

---

өта-мөдкөд,  
став кадыс,  
став вын и лов —  
гаражъясын да дачаясын...  
...Здук кезлө сөмын вежлө ловсө  
школаын велөдыс:  
сйө — титан!  
Помасьлытөм удж уджалө,  
некор весиг аслас  
челядь котыр вылө  
синсө чөвтлыны...  
...А пилотъяс —  
гожъялөм чужөмаось.  
Налы — вылын лэбалысьяслы —  
некор майшасьны  
гортпом удж вөсна...  
...Кипом удж вөчысьяслөн,  
сьод удж вөчысьяслөн  
вежөрас  
бытьё югид гөрничайн,—  
быдөн философ!  
Көнкө кодкө пөжасьё...  
Ставлөн өні кынөмыс пөт,  
а лов вылын — тшыг.  
Меным яндзим, мый тадз.  
И мыйла ми бара  
сөмын олөм пыдөсас нин  
гөгөрвоам ставсө лючки,  
кор нин и вынтор, ни эбөстор  
оз коль...  
Ньөжйөник ме  
курга-гожъяла  
керка вевт вылын,  
и өні менө позьё  
өткодьявны  
и шонді көчкөд,  
и индейскöй ньөввужкөд,  
и зарни вурункөд...  
Дорся олысьяс  
аддзасны зарни вурунтө,  
да шыбитасны кө му вылө,  
пыркөдасны да вольсаласны  
кок ув пыдди...  
Налы, гашкө, и юраныс оз воны,  
мый ме Номо sapiens,  
а муна кө,  
керка вевт вылас  
мый и кольё?—  
гашкө, сөмын кутшөмкө  
вуджөр,  
мый ме волі таладорас...



## Эм-ö олöмас мыйкö вынаджык кывйысь?..

Видза оланнЫд, Галина Васильевна! Гижö Тiянлы Ирина Калинина, Удораын Важгортса школаын велöдысь. Дыр кад чöж нин окотапырысь видзöда Тiян творческой удж бöрсянЫд. Кор лыддя кывбуръясныдтö ли туйвывса пасйöдъясныдтö, век шемöсма, кызди гижысьлөн кывйыс вермö лыддысьысь син водзö сувтöдны уна рöма-кöра олöмсö. Кутшöм пыдöстöминысь Тi гумовтанныд мöвпсö и ловъя кыв пыр нуанныд мöд мортлөн лов джумйö?..

«Бог с тобой» кывбура сборникöн Тi пыриннЫд менам олöмö. Вöли тайö во дас вит-дас квайт сайын. И тайö кадколастöн Тi лоиннЫд менам ловлы зэв колана, зэв вына пыкöдөн. Сэтшöм мортöн, кодлы ме эска. Ладөн-бурөн тэчöм кывбуръяс пыр тыдовтчö збыльыс. Ме выльысь и выльысь шоныд юö моз дзумгысьла сьölöм вöрзöдысь здукъясö, корся сынöдсö... Ву вывса уна көленаөн ладөн-бурөн тэчöм оласног, мортлөн подув, мöд ловкöд йитчöм, муыввса мичлун аддзыны кужöм, уна туй тальöм — ставыс лоö матыссаөн, донаөн да сьökыд здукö шонтысьöн. Тшöкыда овлö и сiдз, мый гöрддзасьлö горшö... Помтöм вежöрсö (а сийöс кисьтöмөн кисьтöма Енэжас, сöмын чатöртчыв...) кыйны кужанлун — Поэтлөн медыджыд вермöм.

Школаын челядьöс кывбуръяснад тöдмöдiгөн пукта ас водзö мог: водзö нуны Тiянлысь пыдi мöвпсö, медем быдмысь морт пытшкын сийö вужъяссис, сетiс лолыслы сöстöмлун. Тi век орчöн мекöд кызди велöдыськöд... Лыддям, мöвпалам, кывзам Тiянöс, и со быттö нин Тi нуöданныд уроксö... Коми кабинетын котыртла творчество туй сертинын стендъяс, а урокъяс нуöдiгөн тшöкыда видзöдлывла Тiян портрет вылö... Ачымöс юавла: збыльсö-ö висьтала? Артмö-ö нуны Поэтлысь Кывсö?..

Тiялнөн быд гижöд вайö меным ыджыд вежöртас, весиг сiйöс, мый ме ичöтсянь нуа сьölöмам и та йылысь некодлы ёнасö ог и висьтавлы. Воддза воö лыдди Чуб станция йылысь казътылöмъястö. Сэни заводитчöма Тiян уджалан туйныд. Меным тайö местаыс тöдчана жö: танi олісны мамöлөн рöдвужыс: бабыс, тьöтыслөн семьяыс, чойыс верöсыскöд. Танi ме гожöмъяснас вöвлi батьöкöд да мамöкöд. Танi, квайт арöсаөн, Саратовö мунiгөн, медбöръяысь аддзысьлі Парасковья прабабкöд... А öтчыд, поезд виччысигкості, ме, ар сизим-көкъямыса нывка, тэчи туйдорса изъясысь «Чуб» кыв... Öнi, машинаөн Сыктивкарö мунiгөн, Микуньянь неылын паныдасьö «Р. Чуб» табличка. Кöть ачыс юыс ёнасö и оз тыдав, а ме бара вöйтчыла аслам казътылöмъясö, но Тiян ним пыр нин тшöтш... Да, некор он тöд, кызди кутас кывны лыддысьысьлы гижысь кывлөн йölöгаыс...

Öти статьяын Тi вайöдiннЫд «Российский писатель» газетса шöр редактор Н.Дорошенколысь казътылöмъяс. Сийö нуöдö сёрнисö изьваса эновтöм аэропорт дöзьöритысь морт йылысь. Артмис сiдз, мый неминучаö сюрöм самолёт пуксис сэтчö, и кыксö

---

мортысь унджык колины ловйөн. И не сёмын кыксё — быдён-лөн мыш саяс ыджыд рөдвуж... Николай Дорошенко шуё, мый быд гижысьлы колё видзны ассыныс аэродромъяс, медым лыддысьысьлы, код көсйө кольны морт лолаён, вөлі мыйён спаситчыны. Артмис на и сідз, мый тайö кывъяссö ме лыдди во мысти, буретш сійö лунас, кор самолёт пуксис Изъя му вылö (сэк воис «Арт» журнал, да мыйлакö медводз тайö статья-сö и лыдди)... Со сэсся и мөвпала, мый ставыс — тыдаланаыс и тыдавтомыс — йитчöма öти гөрөдö. Аттьö Тіянлы, Галина Васильевна, ассыныд «аэродром» видзöмысь. Кымынös нин мездінныд и мезданныд на! Шуöны, мый Ен водзын Поэтлөн аслас торъя лов ректанін — Кыв вöсна кывкутöм, Му вылын олысь ловъяс быдтöм...

Тайös тöд вылын кутöмөн и окота юавны Тіянлысь:

— *А эм-ö мыйкö Олöмас вынаджык Кывйысь?*

— *Сöмын Радейтöм восьтö морт ловлысь пыдöстöмлунсö да пытшкös вынсö. Кыдзи Ті кыланныд Радейтöмсö?*

Чолöмала чужан лунөн! Мед олан туйныд и водзö лоö татшöм жö югыд да йöзлы колана...

Ирина Калинина

---

Видза олан, Ирина! Видла вочавидзны.

1. Коркö ме чайтлі — чöвлун... Но неважөн көнкö лыдди: «Эг на удит кыв ни джын шуны, а менö нин абу гөгөрвоöмась»... Мыйла? Гашкö, кор ми чöv усьлам, кодлыкö вoссьылас миян пытшкöсса сёрниясным,— öд ас кежысь, чöv олігөн, ми кыв отсөгөн жö сёрнитам...

Сідзкö, артмö, мый олöмас кывйыс медвына?

И век жö ёртасьöм дырйи, чайта, оз кыв отсөгөн ков петкөдлыны, кутшöма кодös тэ радейтан-донъялан, а аслад вöчöм-торъяснад, бур кывсьыд бур вöчöмыс, ме ногөн, донаджык, вынаджык... Сідзкö — бур вöчöм?!.

2. Менам радейтана художникъясысь öти — Роберт Фальк шуліс, мый Радейтöмыс — сійö зэв паськыд венжöртаса. И ме сідз жö чайта. Та понда и аттьöала Ыджыд Енмös «олöмыслөн быд здукусь, став вөр-ваыслөн быд öттшöтшъя ловшыысь», быд бур ёртысь, коді нэм кежлö коли ёртөн, и чужан му дорö, чужан кыв дорö век содысь радейтöмысь...

И аттьöала ай-мамös, и öти сиктса войтырös, и ассым велöдысьясös,— быдөнös!

Збыль Радейтöмлөн вежöртасыс и паськыд и джуджыд.

А тайös кылöмөн и олöмыд быттьökö кокниджык, кыпид-джык, шудаджык...

Галина Бутырева



## Чолөмалам!



**Андрей Гельевич Попов** чужис 1959 вося сентябр 25 лунö Вөрку-таын.

Помалис Сыктывкарса государ-ственной университетын филоло-гия факультет. Уджалис журна-листөн, велөдіс образование кузя Россияса академия университет-лөн Вөркутаса юкөнын. Öні — Коми гижысь котырын веськөд-лысьöс вежысь.

Андрей Поповлысь медводдза гижөдъяссö йöзöдісны республи-каса «Молодёжь Севера» газетын 1977 воын. Петіс кывбурa некы-

мын небöг: «Сокрушайся, сердце», «О любви и смерти», «В гордом мире, роковом», «Смысл дождя и листопада» да мукöд. Гижö рочөн.

Кывбуръясыс петалисны «Наш современник», «Москов-ский вестник», «Север», «Крещатик» (Германия), «Родная Ладога», «Аврора», «Войвыв кодзув», «Арт» журналъясын, «Братина» да «Связь времён» (США) литература альманахъ-ясын да с.в. Кывбуръяссö вуджөдöма коми да венгр кывъяс вылö.

А.Попов — «Литературная Россия» газетлөн лауреат, «Золотое перо» войтыркостса поэзия конкурсын дипломант, поэзия кузя Пётр Суханов нима войтыркостса конкурсын вермысь (Сургут).

Коми Республикаса правительстволөн И.А.Куратов нима премия лауреат. Коми Республикаса заслуженной уджа-лысь. Россияса гижысь котырын.

Пыдди пуктана Андрей Гельевич! Чолөмалам Тэнö чужан лунөн! Став сёлөмсянь сиам кузь нэм да бур шуд! Мед Енмыс сетас Тэныд уна во кезлö дзоньвидзалун да мыв-кыдлун!

Мед Тэнад зумыд поэзияыд быдмис-сöвмис, восьлалис-паськаліс пыр водзлань и водзлань да шонтіс сёлөмъяссö уна йöзлысь, ышöдіс том войтырöс радейтны да видзны чужан мунымöс!

ГИЖЫСЬ КОТЫР,  
«ВОЙВЫВ КОДЗУВ»  
ЖУРНАЛ РЕДАКЦИЯ



*А.Г.Поповлөн юбилей водзвылын ськөд сёрнитіс журналист  
Артур Артеев. Сёрнисö вöзъям лыддьысьысьлы.*

## Ола надеяөн

— Андрей, «поэтлөн судьба» — мый тайö?

— Стöчасö ог и шу. Гашкö, тадзи: олан-олан, а олан туйыд сэтшöм артмö, мый лоö мый висьтавыны-шуны. Казьтыштам кö нималана роч поэтъяслысь олан туйсö, унджыкыслөн сійö шог. Виисны, лыйлісны, öшöдчис, гöтырыс помалис... Но эмöсь, дерт, и мöд нога примеръяс — кузь нэм да унатор гижöм. Шуам, Арсений Тарковский, Николай Тряпкин, Юрий Кузнецов. Эз, дерт, налөн олöмас ставыс мольыд, лöз ной вольöсөн вольсалöма, вöв. Но найö кужисны кутчысьны да эз сетчыны. И меным тшöтш окота лэптыны ставсö, мый олöмыс сетас. Сэки и поэтлөн судьбаыс артмас.

— Тыдалö, судьбаным Енсянь?

— Ставыс Енсянь. И судьбаыд тшöтш. Но мортыс кувкутö сыысь, мый бöрйис ачыс. Кымын бурджыка гөгөрвоан — ставыс Енсянь, сымын ясыдджыка аддзан, мый став вöчöм-бöрйöмсьыд юаласны. Бокиянь кажитчö, быттö тан мыйкö сорсьöма, но öд мöдарöсö артмö, мый мортыс нинöм понда оз кывкут, ставсö Ен вöчис. И морт тöдчöдö ассьыс кывкутöмсö — кад, сөвесът, шуöм кыв, бур ним водзас. Быдöнлы вичмö Енсянь сям, талант, и мортыс ачыс бöрйö, мый ськөд вöчны — гуавны либö вöсьтны сійöс. А бöрын кывкутö.

— Андрей, Ті православнöй морт. Окота юавны, эн-ö кöсйöй вичкоын служитны?

— Дум вöлі... но крепыдлуныс эз тырмы. Бать кузя кö, унаөн рöдсьыс вичкоса. Прадедöй, Михаил, Кебраса вичкоын служитіс. Гражданскöй война кадö красноармеечъяс кöсйöмаöсь сійöс лыйлыны, да став сиктыс сы дор сувтöма. Куратовъяс рöдысь петавлöм ылыс рöдвуж — Григорий Бронников да Николай Доброумов священникъясöс Роч Православнöй Вичко шуис вежаясөн. Но ме бöрйи рöдвужлысь жö, Антонина прабаблөн вокыслысь, Иван Алексеевич Куратовлысь, туйсö. Сыктывкарын опера да балет театр водзын сылы сулалö памятник. Кор муна сы дорті, пыр зіля шöпнитны: «Помяни, Господи, душу усопшего раба Твоего Иоанна...»

— Таво Иван Куратовлөн юбилей, Ті ветлінныд Куратовлөн местаясöд. Мый аддзылінныд? Мый вөрзöдіс? Мый сетіс ветлöмыс творчестволды?

— Вöлөгда да Алматы — зэв мича каръяс. Йöзыс сэн зэв бурöсь да сибыдöсь. Рад, мый тöдмаси Россияын да Казахстанын паськыда тöдса поэтъяс да гижысьяскөд — Михаил Карачевкөд, Валерий Михайловкөд, Ольга Фокинакөд, Александр Цыгановкөд, Анатолий Ехаловкөд, Кайрат Бакбергеновкөд, Римма Артемьевакөд, Ибрагим Исакөд, мукөдкөд.

Торъя рад, мый Иван Куратовс сэн абу вунöдöмаöсь, сылы сійоны краеведение да литературоведение уджъяс, Алматыын



эм сы нима улича. Вёлөгдаса государственной университет стенин ошалё И.Куратовос казытылан пов.

Аддзыломасо ко казытывны — сийос, мый вөрзёдис,— то Вёлөгдаын тайо вичкояс, Алматыын — гораяс. Кык сюрс метр вылнасянь лэччи канатной туй кузя: гогорыс пыдос-том и помтом. Ставыс тайо оз вун, кыдзи и Вёлөгдаын вичкояслон чуналана кыпыдлуныс, да оз вун Пошехонской шойналон быттьо дзебасын



гусятор видзысь протлуныс — тані помассис муыв туйыс ярьюгид роч поэтыс Николай Рубцов, Сергей Чухин, Виктор Коротаевлон. Кута лача, ставыс тайо корко мыччыяс кывбурьясын.

— Тіанос тшөкыда комиодлоны, а ті рочо вуджоданныд миянлысь авторьясос. Сьокыд-о вуджодчыны?

— Ме верма висьтавыны сомын комисыс рочо вуджодом йылысь. Вуджодча сидз шусяна «подстрочникьясысь». Ме серти ко, тан кык сьокыдлун. Первойис — кыдз поэто стөчдыка вуджодны кывбурсо мод кывйо. Модыс — первойсо тод вылын кутомон, кыдзи тайос вочны сидз, мед и рочнас вуджодомыс тшотш колис кывбурон.

Ме вуджодлі Иван Куратовос, Владимир Тиминос, Александр Лужииковос, Михаил Елькинос, Анжелика Елфимоваос, Нина Обрезковаос, Алёна Ельцоваос, Надежда Павловаос, Александр Шебыревос, Алёна Шомысоваос, Алёна Старцеваос, Любовь Ануфриеваос. Рочнас артмом кывбурьясыс кызвынсо мен кажитчоны, но сточа вуджодом серти, чайта, кытсюрө мыйко и вежсыштлывлө. Но надейтча, мый поэзия ловруис кольо.

— Тіан кывбурьяс медводдзаысь петалисны «Молодёжь Севера» газетын, сэк ті велөдчинныд Сыктывкарса университетын медводдза курсы. Вөлі-о тайо сэки Тіанлы тодчанаон?

— Чайті, менө пондісны гогөрвоны да пондо воссыны литературао туй. Но ставыс, вөлөм, ёна сьокыдджык.

— Помнитанныд, кытчо видзинныд медводдза гонорар?

— Ньоби кык шампанской доз, унджык вылас эз тырмы.

— Гижны заводитігид Ті ёнджыкасө ёртасинныд землякьяс-код?

— 1987 воөдз поэтыс костын ко быттьо общение менам эз вөв некутшом, и тайо ёна джомдөдис менө. Быттьо пузчужом кагаос эновтісны бать-мамыс — мода-мөдкод сёрниттог. Татшом челядыс сэсса сьокыда верстяммоны-совмоны.

— Гашко, сийон, медым не эновтны «пузчужом поэтысөс», Ті öні веськодланныд Сыктывкарса университет бердын литературной объединениеон. Бордьясянныд том авторьяскод уджалігид?

— Да! Торйөн нин, кор паныдасяс таланта том автор. Меным өнөдз на мойвиліс таын.

— Андрей, Тi — Коми гижысь котырын вескөдлысьёс вежысь и прөстө лыддысьысь — кызди донъяланнуд Коми Республикаса өнія литературасö?



— Миян олö уна аслыспöлöс, интересной гижысь, кöть проза, кöть кывбур лöсьöдысь, кöть комион и кöть рочöн. Эмöсь том йöз, код вылö кутам надея, кодъяс сетöны лачасö миянлы. Эмöсь литератураын и бур традицияс. Окота эськö, мед лыддысьысьыс унджык вöлі.

Унджык сэтшöмыс, код лыддысьö оз кадсö лотöм да шойчöм понда, а збыль литературасö радейтысьыс.

— Кызди арталаннуд, кывбуръясыд öнi аддзöны лыддысьысь дорö туйсö? Позьö-ö овны надеяөн литературной журналъяс, небöгөн вузасян сетъяс, библиотекаяс вылö?

— Надейтчыны код вылö кө ли мый вылö кө оз позь. Но ола надеяөн, мый менö лыддьöны. Гашкö, оз сэтшöм унаөн, кызд эськö окота вöлі.

— Мый поэзия вермас вöчны Чужан му спаситöмын?

— Не ылöдлыны. Асьсö не вузавны. Кывкутны шуöмасьыс.



Андрей ПОПОВ

## И шуöма кө лоны мен поэтөн...

КЫВБУРЪЯС

\* \* \*

Юль тöлысса асыв, а енэжыс кымрасьö-дурö.  
И öшинь пыр ньöти оз тыдовтчы олöмлөн сер.  
Вот татшöми гожöмыс. Татшöм и литература,  
Зэв букуш, и гажтöм, и курговат виналөн көр.

А поводдя сэтшöм, мый кыв ни джын шуны он вермы.  
И öддзö да гусьöник видзöдчö öшиньö зэр.  
Юль тöлысса букушмöм серпаслы муслун оз тырмы,  
И гажтöммö кывбур, и виналөн курыдмö көр.

---

\* \* \*

Енманой, Лазарыд, кодос Тэ радейтан, висьё,  
Оломыс эновто сійос, кийс и кокыс нин кын...  
Воч, медым бурдас на сійо Тэнад радейтысь кисянь.  
Сёрнитны сылөн ни чеччыны абу нин вын.

Сьолөмөн кызди не усьны нө миянлы, Енмөй!  
Эновтин миянос. Лазарькод кулам ми сэн.  
Кысь нө ми тодам, мый нималам, куломсө венам?  
Мый нө Тэ виччысян, радейтысь сьолөма Ен?

## Ва вывті ветлөм

Ваті муна, чорыд муті моз,  
Инмө киö ылі кодзув роз,  
Вуджрасьö код войся саридз ваын.  
Ылалас нө лолöй али оз?

Синмөй воштö кодзувъяслысь би.  
Кокъяс улын вöйö саридз гы.  
Эскытöмьд, мыйла нө ме повзи?!  
Ва пыдöсын лои кок и ки.

Сьöкыд изйөн вöйö менам мөвп,  
Сэтшöм пыдöдз, мый ме эг на тöд  
Оломыслысь татшöм джуджыдлунсö —  
Кутшöм сійö кöдзыд, кутшöм сьöд!

Кутшöм пемыд саридз пыдöс му.  
Сәті змей моз, кодлөн ыргян ру,  
Шлывгö менам мөвпöй, кызди видзны  
Ваті муніг, енэжвывса шуд.

*Комиöдіс Алёна Ельцова*

\* \* \*

Ёртъясыд абу да гажтöмтö коран,  
Локтас нин, эськö, дерт.  
Матöджык пуксяс дай водка на корас,  
Да-й ловтö на сылы сет.  
Олöмтö сет, а не асья пöкмелля,  
Сет сылы вöльнöй свет.  
Вольпасын юктöдас кутшöмкö зелля,  
Вөтъясад пырны мед.  
Шöпкöдны кутас сэк кутшöмкö кывъяс,  
Енмыс пö скөр, быттö би.  
А гажтöмьд босьтас тэнö ас сывъяс,  
Чужас и кывбур, и пи.

\* \* \*

Юр пытшкөй яр биён öзйö,  
Сьöлөмöй тiпкö, тэ кылан?  
Кодкö мен думыштны вöзйö  
Сурым да гижöдъяс йылысь.

Олöмыс кокниа нуö  
Шуда да гаж тыра вояс.  
Енэжлы, гижысьлөн ловлы  
Дзик öтмоза арыс воис.

Енэжам пемыд нин вольöс  
Кытсюрö визьнитöм вижөн.  
Мый сэсся казътивны кольö?  
Сурымыд абу нин гижöд.

*Комиöдiс Нина Обрезкова.*

\* \* \*

Мый мем дона көлуй, мый мем дача,  
Мый мем ыджыд чинöдз каян сод.  
Меным колö эскöм, колö лача,  
Колö тöдöм, мый ме збыльысь морт.

Пöт кынöмыд öти биён сотö,  
Ловлөн аслас ыпъялана би.  
Юала кор Енмыслысь: «Ме кодi?»  
Кöсья кывны: «Медся муса пи!»

*Комиöдiс Анжелика Елфимова*

\* \* \*

Поэтлөн лолыс пемыд.  
Но му выв олысь рöд  
Пель чошкöдöма нэмыс,  
Оз казав ни оз тöд,  
Мый векджык шоммöм юра,  
Син водзыс – помтöм вой,  
Оз эскы ньöти бурас,  
И ачыс – ставнас дой....

\* \* \*

Поэтъяс асьсö донъялöны кор,  
И кок ув вутшкыс чайтсьö налы рöчөн.  
Но гижасны кө — ладмö шөр и дор,  
Быд шуöм кывйөн веськалöны стöча.  
А пöръясьöмнад кывбурьд оз чуж...

И шуома кӧ лоны мен поэтӧн —  
Ов нӧшта нэм джын,  
Сӧмын овныд куж,  
Мед бӧрнас райӧ сибӧдісны сэтӧн.  
А сьӧлӧм дойыд лӧняс!— шуа тэд.  
И быдса нэм джын  
Эм на миян  
Водзын  
И шог  
И гажсӧ ӧтвыв юкны мед,  
Да оланін  
Да енэж шӧрын кодзув.

Мед сӧмын нэм джын,  
Эм на миян кад  
И шондіыскӧд сёрнитны,  
И Енкӧд.  
И овны сэтчӧдз —  
Ачыл он ло рад.

И тэысь водзджык ковмас кувны  
Мен кӧ,  
Ме дінӧ попӧс мунан лунӧ кор.  
Мед тэрмасьӧ!  
Жаль, оз ло орччӧн пиным.  
И висьтасьӧмӧс помӧдз шӧпка кор,  
Син куня,  
И ог садмыв нин, Марина.

А лолӧй мӧдас артавны быд сод,  
Мед коркӧ судзны енэжвывса сарство.

...Тэ дӧзмін?  
Ладнӧ, бергӧдчам —  
Вот-вот  
Тэ сьӧлӧм дойтӧ вунӧдан.  
Вай вод,  
Мед отсаласны  
Кевмӧм да лекарство.

И кывбуръяс...  
Эн серав,  
Шуа тэд,  
Мый кывйыд сійӧ асьыс уджсӧ вӧчӧ.  
Мед ичӧтика — век жӧ ме поэт,  
И шуа ылӧсас, да мыйкӧ-й збыльмӧ стӧча.

*Комиӧдіс Евгений Козлов.*



Елена АФАНАСЬЕВА,  
Любовь АНУФРИЕВА

WWW.KYK\_YU.RU.

ПОВЕСЬТ-СЁРНИ

Кык ю  
Кык рөдлы  
Сетісны  
Ветлөм вылө туй  
Оланін вылө берег  
Сёян и юан

Кык ю  
Кык рөдлысь  
Сөвмөдісны аслыспөлөс кыв да вежөр

Кык ю  
Бать да мам пыр  
Сольнитчисны мейн

Челядьлөн  
Лооны асланыс юяс  
Но тайё кык юяс  
Мөдасны овны и наын

Е.Козлов.

Е. — Елена  
Л. — Любовь

## Медводдза юкөн

Е. Ветлөдлі талун Ву<sup>1</sup> дорті, корсялі изъяс... эг изъяс, а өтик из... Ёсь йылаёс, кодзув кодъөс аддзи. Лэпті, ки пыдөс вылө босьті. Мыйла эськө тайё изсө, а эг мөдөс... Тайё изйыс, гашкө, коркө вөлі кодзулөн... либө весигтө Шондіён?.. И ме радла. Изйыслы? Луныслы? Кодлы?.. Либө тырмымөн вөлі локны Ву дорө, восьлавны кодзыд лыа вывті, радейтны визув васө да лыа вылө сьвкнитөм посни изсө... а на пыр — оломсө, ыджыд-ыджыд, помтөм-дортөм оломсө.

Вом дорө матысті кодзыд изсө. И сійө шоналіс менам лов руысь.

Вот тадзи гортын, менам югыд пельёсын, ставыс тырөма радейтөмөн: быд туй рөч, быд турун сі, быд гурантор. Радейтөмөн ме дорө... и менам радейтөмөн.

Ветлөдла, нылала сынөдсө... Да шудсө... тайё рытсьыс, шондісьыс, турунсьыс, туй бокас кисьтөм ичөтик лөз дзоридзсьыс... этша өмөй наын оломыс!.. мед видзөдны помтөг, видзөдны да югдыны лолөн... а мый эм таысь мусаджыкыс тан?!

---

<sup>1</sup> Ву — Удораын Вашка ю.

---

Л. Чайта, абу. Мусаджыкыс тан сэсса нинөм абу! Радуйтчан шондіыслы, луныслы... и тайө кө тырмымөн,— кылан асьтө медся шудаөн. И быдөн кө тадз кужис нбылавны югыдсө — бурыс эськө му вылас вөлі унджык...

Өні Изьва ю пөлөн восьлала... сы мында тан катшасиныс! Өтиөс, и мөдөс, и коймөдөс босьта. Найө шонділөн муывывса чойяс, сөмын югөрнас еджыдөсь. Дзоридзсө пукті вадор из вылө... да төв ныр пөлыштис, пөлыштис, и найө разалісны ваас... и визулыс пондіс нуны... гашкө, кодкөлы оломас...

Е. Кыр йывсянь видзөда ва вывті кылалысь дзоридзтө — и найө кутшөмкө здук<sup>2</sup> топ<sup>2</sup> дзодзөгө пөртчылісны... и морөс пытш-кам садмыліс жө лэбачыс — шпорк вөчис борднас. Тайө Изьва-ыд тадз меным ыстіс чолөм. Мед и төдтөм юыс меным, некор адзывылтөм, но муса. Карын олігөн мөвпъяснам тшөкыда жө вола Ву дөрө. Сиктөдыс ветлөдлышта... гортө пырала.

Видзөда өшиньө — ылыс вөрыс ясыда тыдалө, матынджык — байдъяс<sup>3</sup>, корйыс налөн зарни рөмөн ворсө... Рытъя шондіыс ыстөма югөр: и байдйыс сылы воча нюмъевтө. Некумын лун мысти ставыс вежсяс, балыдджык и балыдджык лоас платтө-ыс пу-байдлөн... чөвлун поздысяс морөс пытшкө!.. И ми пондам виччысьны выльтор. Кыдзи тай виччысян радейтөм — морөсыд төдө нин сы йылысь, а вежөрыд нинөм на оз: кыдзи поэьө водзвыв вежөртны лов веркөсад югыд лэбачлысь борд йывнас төкөтө инмөдчылөмсө?..

Л. Он и удит вежөртны. Тайө здук. Чужлас и бөр вошас. Но сійөс верман кывны сьөлөм тіпкөмсьыд...

Менам вөлі жө татшөм здукыс, сөмын сійө абу югыд лэбач, сылөн нимыс — төрытъя лун. И слабог, сійө кытчөкө саймовт-чис. Төрыт ме кувлі и выльысь чужи. Кор меын жугаліс олом, син водзам ставыс пемдыліс... здук кежлө веськавлі тыртөм вичкоө, сэн өзйисны сисьяс, быд өбраз видзөдіс зумыша — веськыда лоам, а ме шөпкөдөмөн кори мездөм... Лоөмторйыс өдйө сыліс, и пемыдыс бара сывъяліс менө. Кытчөкө муні кималасөн. А кытчө? — вөлі дзик веськодь. Друтысь джөмді, а гашкө, кодкө сконйыштис, да уси кодзыд ваө... визулыс пышйөдіс менө пемыдсьыс... берегас кыдзкө петөм бөрын адззи мыччы-сьысь Шондісө. А гашкө, тайө и эм менам Шондій?! Со өд кыдзи синмөс ёрө! Сы вылө видзөда, и югыдыс мыськө лолөс... Ме унмовси... Бөрыннас садми паськыд видз шөрын, видзөда енэжас и кажитчө мен сійө ыджыд вичкоөн. Тадзи ловзи... енэжыс меын восьтіс выль оломө өдзөс... Өні ме сэтшөм на вынтөм, став дойыс сьөлөмам восьса... Но, гашкө, му вылас выйым дзоридз, ловтө бурдөдысь дзоридз... Кутшөм эськө сылөн нимыс?— төдан кө, шөпнит пелям... ме өд ловзи, но колө на бурдны...

Е. Сійө дзоридзыс, дерт жө, эм. И сійө тэ пытшкын. И сылөн нимыс — лов вын...

---

<sup>2</sup> Топ (уд.) — *дзик*.

<sup>3</sup> Байд (уд.) — *бадь*.



Тэ кӱ адзылӱн ӱнӱ, ӱшиняс кыаыс кутшӱм! Быттьӱ ыпмунӱма дзоридз. Видзӱд да чуймав сӱмын. Регыд гӱгӱрсӱ тупкас сьӱд вой. Кутшӱм ыджыд лӱбач сӱйӱ, сир пемыд войыс, но вежӱн, кор коляс кадыс да пондас му весьтӱд лӱбавны еджыд бордья лӱбач — ру, кутшӱм лӱсьыда ылькмунлас морӱс пытшкӱ раддун. Шондӱ мыччыяс ру пытшкыс — гӱрд шар. Сӱйӱ тӱрытъя кусӱм дзоридзыслӱн сьӱлӱмыс. Выльыс чужӱ.

**Л.** Корсюрӱ мыйкӱ кутӱ, кутшӱмкӱ тӱдтӱм вын, и сӱки он гӱгӱрво весиг, кӱнӱ шондӱыс. Сӱк быттьӱ мортыд синтӱм. И думнад виччысян кодкӱлыс мелӱа шыалӱмсӱ, оз-ӱ сӱйӱ бергӱд тӱнӱ шондӱланьыс...

А талун вӱтам ме вӱлӱ гортын, Гамын<sup>4</sup>. Мыйлакӱ эг на тӱр-мась чужан керкаӱ, ветлӱдлӱ вадортӱ, шойччи чӱвлунас. Локтӱ муса Петыркоам<sup>5</sup>, сӱтыс корси кальчуньсӱ<sup>6</sup>, быд из бергӱдлӱ-малалӱ... и со ӱд — адззи! Зептам кальчуньсӱ дзебыштӱ, радпы-рыс вӱсьлалӱ Мича нырдлань... ылысян нин адззи тӱдса мыгӱр... да тайӱ жӱ менам ае<sup>7</sup>! «Ае, ае!» — горзӱ ме. А сӱйӱ эз шыась. Тӱрмасьтӱг мунӱс лыа вывтӱ, ме думыс да, кӱсӱйс вуджны Курьясӱ. Колӱ вӱтӱдны сӱйӱс... Став вынсьым котӱртӱ сы бӱрся, кори виччысьлыны... ю дорас нин ае сувтӱс да мелань бергӱд-чис... а ме ичӱтик нывка моз шамыртӱ<sup>8</sup> сӱйӱс, гӱгӱрвотӱм дойыс топавлӱс морӱсӱй... аеӱс кори косны гортӱ. А сӱйӱ видзӱдлӱс мӱд-дар берегас гажтӱм синмӱн, сӱсся довкнитӱс юрнас, мунам пӱ... ӱнӱ аекӱд нин вӱсьлалам лыа вывтӱ, ӱна огӱ сӱрнитӱй, прӱста чӱла вӱсьлалам... со неылын тыдалӱ эновтӱм-жугласьӱм пыж. «Коддӱн нӱ сӱйӱ, ае?» — бара на юаси. А сӱйӱ видзӱдлӱс пыж вылас, чайтӱ, водзӱ нинӱм нин оз вись-тав, но вочавидзис, тайӱ пӱ миян пыжыс... Кыдзи миян? Гортын ӱд пыжыс некор эз вӱвлы?! Миян пыжыс пӱ... Тайӱ пыжнас коркӱ Сӱбысяс ветлӱм, а ӱнӱ некодды... вывтӱ водз ставӱн мунӱсны таладорсьыс... коли сӱмын жугласьӱм пыжыс... Ме садьми. Мый висьталӱс меным тайӱ вӱтыс? Ае ӱд кӱсӱйс вуджны Курьясӱ, но менам горӱдӱмыс бергӱдчис да косӱс бӱр... и ме удитӱ сы лолӱ кольны ассьым югӱрӱс!

**Е.** А ме эг вермы кутны батӱс, сӱйӱ югыд лӱбачӱн кайис енӱжӱ. Мыйла тӱрмасис сӱтчӱ?.. И вӱлывлӱ-ӱ тулыснас лӱбачьяс-



<sup>4</sup> Гам — *Изьва районын сикт.*

<sup>5</sup> Петырко — *места ним.*

<sup>6</sup> Кальчунь (иж.) — *кульчунь.*

<sup>7</sup> Ае (иж.) — *айӱ, батъ.*

<sup>8</sup> Шамыртны (иж.) — *сывъявны.*



көд мяннө? Лолыс оз өмөй вись... Лэбалыштас Мозын весытын, тыяссө кытшовтас, көні чериасис. Нылыслөн да пиыслөн өшинь дорө пуксылас: ставыс-ө ладнө?..

Батьö менам чужлөма Мозын<sup>9</sup> вылын, а мамö — Ву вылын. Мамö визув — Вуным кодъ жö — нывка, батьö — Мозын кодъ жö — ыджыд дум думайтысь зон.

Кык ю ме пыр визувтö — Мозын да Ву. Кутшöм найö вына-öсь!.. и налысь вынсö лолын нуа да, радла — кутшöм ыджыд шуд тайö: кывны ас пытшкад кык ю. Челядьдырöй коли Ву дорын да, дерт, меным Вуыс матынджык, Мозыныс тöдтöмджык... кызди и батьö. Мозыныс шлывгö. Олö. А сы дорö радейтöмыс — көнкö меын пыдйын-пыдйын. Абу садьмöма на. Узьö. Но сылы ас йылысь юöрсö мөдöда Вулөн ва пырыс — югыд мөвпөн, ки-ам шонтöм изторйөн, öд Вуöй көнкö сэнi (аб ёна и ылын), Лешуконск дорын, усьö Мозынö.

Л. Кык ю тэ пыр визувтö, кык ыджыд вын! А менам сийö öтик... менам Изьва. Кор сийö гызьö, быттö ыджыд шог песö ас пытшкас, и верма-ö ме сылы вайны личöд? Дерт, ог. А сийö менсьым шогöс вермö нуны аслас визулөн. Öд юыс сийö менам кад.

...А сэки вöтам, кор аекöд ю дорсянныс восьлалiм гортö — ставыс разалiс... А бöрыннас нин, вемöсас, ськöд паныдасим... сэтшöм шуда сийö вöлi!.. и мамö радлiс! Öта-мөдкöд быдтор йылысь удитiм варовитны, а кор ме водi нин узыны, ае мыйкö висьталiс мамöлы Вадим йылысь, налысь сёрнисö ёна эг кывзы, но Вадим нимсö кылöм бöрын унмöй дзикöдз торксис... Вадим — тайö менам вок. Сийö мугов чужöма, неыджыд тушаа, и сэтшöм мусаник... Сийö абу нин... Но аелы висьтавлöма коркö, Михаил Архангелыс пö волiс вöтам и шуис: «Дыр олан...» Та бöрын, гашкö, сöмын тöлысь и олiс...

Аддзылi вöтөн — лэбисны юсьяс... ме дзорги на вылö, и на пиысь öти ёна чуксалiс менö... Гашкö, вокöй?.. Вочакыв пыдди гырысьыс-гырысь лым заводитiс усьны и тупкис меысь кельöбсö... Чöла сулалi и бара виччыси юсьыслысь чукöстөмсö — лымсö син водзысь вешталi, но выльысь эз шыась...

Е. Му вывсьыс вошисны чой-вокъясным, но воывлöны лэба-чөн. Вермам-ö ми найöс аддзыны... Коркö, гашкö, кывлам сöмын борд шынысö...

А менам Важгортын талун усьöма медводдза лым. И сиктöй сэтшöм жö кыпид лоöма, юсьяслөн лэбöм кодъ...

**Пöкрöв лунö  
Медводдза лым усьö.  
Менам сиктöй  
Пöртсис еджыд юсьö...**

Челядьдырсянь видза вежöрам серпас: ар, школаö котöрта, нач орччөн поски<sup>10</sup> дорас зарни кыз пу сулалö. Арбыд ысталас

<sup>9</sup> Мозын — Мезень ю.

<sup>10</sup> Поски (уд.) — пос.

миянлы ичөтик зарни письмөяс, а ми сійөс лыддыны ог кужой, кианым бергөддыштам да бөр сетам төврулы.

А кор уяс медводдза лым, быд чаль-вожө ляскыяс — бара раддам вөлі кызнымлөн выль платтьöлы, став письмөнөмөс



лыддöма нин төвру-  
ыс, тупкөма öнi мед-  
воддза лым, ветлөд-  
лам, перъялам мия-  
нөн лыддытөм пись-  
мөяссö, бара киын  
бергөддам сьодасыш-  
төм нин, му көра,  
медводдза лым көра  
корсö. Тайö нин  
выль юөр. Но мый  
йылысь?.. Аскинас  
садьмам, да пасьтö-  
мось вожьясыс кыз-  
лөн, лымйыс сьлө,  
төпалö — пуным бөрдö.

Коли уна во. Дерт, гортö волігьясөн видзöда вөлі пусö, окала думнам быд кор, ректа морөс часьысь<sup>11</sup> кузь туйын чукөрмөм шогсö и радлунсö, а мукөддырйи и бөрда, бөрдöда томлунөс, öд сійö юасьтөг-висьтасьтөг исковтö менам чужөм вылысь...

А öтпыр вои, да кыздзöй водöма муас. Мый сыкөд лоöма?! — шымыртис менö помтөг шог да дыр-дыр эз лэдз аслас зэлыд сывйысь. Лолö сибдис морөсам: став зарнинас водöма вөлі кыздзöй ва гуранö, нйит туй шöрас, да сьлөн вожьяс вывтi жургисны-мунисны машинаяс...

Кадыс мыйөн сöмын эз тыртлы лолös, а кыздз пуйи эз вун. Öнi гөгөрвоа: кызди и челядьдырйö, кыздздыс мейн пыр на öзйö сöстөм биөн.

Л. Ме гөгөрвоа тэнö. Көть мыйөн кадыс оз тыртлы ловтö, век кыскö да кыскö югыдтор аддзан. А сэсся лолыштан да бара пондан овны...

Төдан, а ме корсюрö сэтшöма ставсьыс мудзла. Олöмыс гугнас бергөдчылö. И мый олан либö он ов — дзик öткодь... Кор ог төд, кытчö пышйыны — дзебся шьпөлэсам<sup>12</sup>. Пемыдінас синва быртөдз вашкөдча чөв-лөнньыскөд. А öтпыр унмовссьöма. Ясыда аддза татшөм вөт: гожөм, шондіыс пөжö, ме водзын вөр туй. Гөгөр кыззьяс... Пуясыс кышөдчöны корнас, тайö шаракылöмыс нуөдö менö төдтөминö... Сэсся другысь ме водзö петкөдчö паськыдсьыс-паськыд видз. Сэн зэв уна морт, и мыйлакö ставөн еджыд паськөмаось. Коді косаөн, коді чарлаөн, ытшкöны турун. Муна йөз пөвсттіыс и чайта: ставлы тыдавтөм. Некод мекөд оз сёрнит, и оз шыасьлы весиг. Видз шöрсьыс аддза ыджыд пач, öти морт сэн ноксьö... гашкö, мыйкö сёйны-юны дасьтö. Восьла-ла пачланьыс... и со! Öкмыс во кольөм бöрын первойысь паны-далі Микул Öндрейös! Тайö менам олöмын вөлі зэв шань морт!

<sup>11</sup> Морөс чась (уд.) — морөс куд.

<sup>12</sup> Шьпөлэс (иж.) — ийрк вьв, чердак.

бур сёлёма! Но мыйлакё эз вермы ловнас кыпöдны олöмсö да муніс. Ставлы висътасътöг. Матыстчи сы дорö, окота вöлі сы мында сылысь юасыны... А Микул Öндрей, менö аддзис да, кыв шутöг мыччис радейтана шоколад кампетöс (сöмын сійö чöсмöдлывліс татшöмнас). Видзöдлі сы вылö, кампетсö топöді киын... и синвайö шорөн ылькнитіс... татшöм пöсь синвайыс важөн эз вöвлы. Сійö эз лөньюд менö и быттьöкö лолам видзöдöмөн висъталіс: «Ставыс лоас бур. Олöмас юмовыс уна, видзöдлы гөгöрбок, сюся видзöдлы... Ас кадö эг куж казавны мичсö, олöмös оровті... йöй! Думайтан, шудаджык лои? Эг. И арын, и тöлын, и тулысын, и гожöмын ломта тайö пачсö. Керкайö абу. Ывласö шонта. А сёлөмö и лолö век йизьöма. А позис дзик мöд ног овны. Эг кө тэрмась. Асьтö виöмыс медыджыд грек!.. Олöмыс öти. И весиг сьöкыд кө лоас, прöста думышт — аския луныс ставсö вежас. Бурланьö. Нюмъяв, пыр нюмъяв. И пемыдыс повзяс тэнад югыд нюмысь!..»

Понлөн тывгöмысь садьми. Лэччи шыпöлэсысь. Дыркодь на юрын бергöдлі Микул Öндрейлысь кывъяссö... А сэсся пасътасикöмасы и петі лавкаö да ньöби радейтана кампетöс. Наөн гежöдика нин ачымös ышмöдлі, а талун позьö...

Восьлала, чöсмася юмовторнас, видзöда гөгöрбок — кыз пуяс кышöдчöны корнас. И кыла Микул Öндрейös, сылысь кывъяссö... Сійö видзö и радейтö менö. А ме муна водзö, водзö... Бурас эскöмөн.

**Е.** Кымын водзö ола, сымын ёнджыка понді гөгöрвоны: лолыды выныс чужанінын, сиктад олысь бур йöзын да бать-мам мывкыдын...

Мамö коркö пасъявлöма места нимъяс. Лыддя найös — и быттьö аддза чужаніннысь югыд пельös: Чеснög вöм ёль, Черань-ёльдін, Мурзавар нюр, Лячкейшор, Тучкан ёль, Мупырвадор. Абу нин став кывйыс гөгöрвоана. Миян, талунъя вежöрысь вошöма налөн ылыс вежöртасыс. Он нин сійös некысь босът, он öкты... Но мед енköлаам олöны и Шудэй таса ёль, и Енма, и Перакырöм. А меным найö водзös сетасны — лöзаласны юөн, малаласны юрсіös небыд төвруөн да синлы козьналасны купаль-ничаа видз, отасыс-ота...

**Л.** Миян сёлөмным сэтшöм дзоля, но збылысь — сэтчö төрö чужанінным... И ставыс-ставыс! Но унатор, дерт, огö вермöй гөгöрвоöдны. Менам выйым Крукасян, и Куръя, и Дандöбича, и Сьöd шор, и Сім ёль, и Кобра ты... А коді думыштіс налы татшöм аслыспölös нимъяссö? Збыль, мукöд кывйыслысь вежöртассö кадыс эжаөн тыртöма. Но выльысь и выльысь гөгöрта став местасö, ю дорсö... Вочакывйыс ва вылас ли, паськыд видз шöрас ли... Колök, вөр-ва сёлөмас гижöма дзонь книга Изьва йывссьм... Но кутшöм ордым вайöдас сы дорö?..

**Е.** Ордымыс öти — радейтöм... Сійö медвына тані.

**Л.** Радейтöм... Кутшöм эськö сылөн видзöдласыс? Син рöмыс? Гашкö, тувсов енэж кодыс жö — мича?! Но мыйла тайö мичыс дойдывлö? Тöдан, мен коркö коліс сöмын öти лун, мед гөгöрво-

ны ачымөс... Век тэрмаси кытчөкө, чайтi, удита на ставсө, удита. А олөмыс зэв гусьöника вештiс менö мөд туй вылө. Кыв шутөг миритчи. Öнi со видзөда карса öшиням и кедзовта ачымөс... менö нинөмөн оз гажөдны тайö уличаясыс. Зiля корсьны көть ичөтик ордым гортам, Изьваö. И со аддзи сэтчө өдзөссө... и бара на веськалi Петыркоам... Зэрмис! Менам Петыркой бөрдзис шуда синваөн, и ме пөттөдз мысси тайö синванас! Кутшөм этша колө, мед лоны шудаөн!.. А Петыркойсь мунiгөн нин пытш-кам ставыс топавлiс... и другысь кажитчис меным кодкөлөн шыасьом: «Гашкө, кольчан, он мун?!» Чуймөмөн видзөдлi гөгөр-бок,— некод эз вөв... но ме вочавидзи гөлөсыслы: «Ог төд...» Ачым вөли сэтшөм шудаөн танi, а бара на лысьтi шуны — ог төд... Восьалi водзө, и ышмысь шор дорсьыс төдмалi радейтана мортөс... колис сизим во, а ме сийөс сiдзи эг и вунөд, сьөлөмөй некор оз сорсьы төдмавын сийөс... Котөртi сы дорө, но кымын өдйөджык воедi<sup>13</sup>, сымын ылынджык сийө кажитчис. А гашкө, радейтана мортанөй и чуксалiс менö? И шуи кө — «Кольчча...», эз пышйы эськө...

Менам сы мында здук и весиг лун вөли, мед вежны олөмөс... эг слөймы. И мыжа ачым. А сьөлөмөй, коньөр сьөлөмөй, эз велав сизим онас овны татөн, да и кыдзи вермас лоны олөмыс шудтөг?! Йөрми татчө. Ставсө, буракө, колiс вөчны ас кадө. А öнi сөр нин... Ме гөгөрвои тайөс. Сөмын öнi.

**Е.** Зэв векныд ордымөд нуөдө мянөс кодкө. Жежан туйыс өдвакө вийым<sup>14</sup>...

Талун лунтыр зэрө. А зэр пырыс и олөмыс нырччө водзө.

Коркө кобис жө, лун төв пөльыштiс. Пу чаль йылө кольөм нач öти корсө вөрөдыштiс — нюкыртчөма нин корйыс, но кутчысьö, оз сетчы. А сэк, кор лолыд бөрдө да оз аддзы петан туй аслыс сьөкыд лунъяссьыс, быд татшөм ичөтикторйыслы чукөстчан. Петi уличө. Уна рөма корсө вөли вольсалөма му вылө. А син водзтi мыйлакө мунiсны вөйдөр олысь йөзлөн чужөмъясыс. Мышкыртчылi да лэптi кусөм нин кор. Сэсся нөшта öтиөс, и нөшта. Найө казытыштiсны Агней, Анкей, Тоня тьөтъясөс... И тадз чукөрмис корйыс ки тыр. Морөс бердө топөдi, быттө став радейтана тьөтөс, и ковтаөй көтасис синвасыныс. И ме öнi ог төд, кыдзи бурөдны найөс — олөмас колана кывйыс абу. Но эм чөв-лөнъ. И сийө медвына тайө звукас.

**Л.** И менö тайө чөв-лөнныс зэрөн моз мыськис.

Мыйлакө матыстчи пач дорам. Со өд гөлэвняыс<sup>15</sup> пачас мында... и лөз биыс... быттө ыпгьялө кодлөнкө дой, уна чужөм быттө петкөдчылө биас, но öти на пиысь өна кырыштө морөсөс. Тайө гөгөрвотөм дойыс — кольөм кадас өдзөс. Ставыс руын. Ставыс төдтөм. Но кыла кодкөлысь лов шысө... И аддза: важиник керка... садйын дзоридзалө льөм. Кутшөм вося тулысө веськалi? Некод оз шыась... сөмын олөма ань пукалө лабич вылын. «Кодi нө тэ?» — юася. «Клавдия, мадаö...» — гусьöника шуис. Филос

---

<sup>13</sup> Воедны (иж.) — котөртны.

<sup>14</sup> Вийым — эм.

<sup>15</sup> Гөлэвня — сэрапом, гөлөвня.

Клавдия... Клавдия баб!.. Зэв нин важөн, арын, кор льёмйыс кисьмёма вөлі... восьлалі... кытчөкө, но Клавдия баб сэк тадз жö пукаліс лабич вылын, и ме вöзйыси сы дорö чöсмасьыштны льёмнас... Сійö радпырысь лэдзис садъяс... Льёмйыс юмовсьыс-юмов...

А мöдысь... Тöв нин, буракö, вөлі. И бара восьлала тöдса туйöд. Кыла чöсöдана дойөн тырём гөлөс... Клавдия баб керка весьтын сулалö вöла-доддя. Бабыд оз кöсйы керкасьыс мунны, горзö, менö пö эн нуöдöй гортысь... Но тöдтöм йöз тэрмөдлöны сійöс...

Регыд и кувсьёма... Дерт, некор сійöс некыз эг шулы... но талун лöз биас видзöдигмоз шöпкөдi сылысь нимсö. Кевмөм моз. Колөк, лолыс лöз биас и олö сылөн дойөн. Мыйлакö биыс вавровджык лой, и югзыштiс.

И öнi со син водзам бара розъялö льөм... Клавдия бабсянь кад вомöныс меным ыстөм тувсов козин.

**Е.** Менам эм жö козин. Аслам дед-бабсянь. Катша<sup>16</sup>. Öнi сэн ни öти керка абу. Рай-рай<sup>17</sup> вöсьсаин. Кыр йылын. Уліас — Вуным визувтö. А енэжыс матын-матын, и лолыд кокниа кайлö сэтчö пыстаөн. Катшаö öнi воывлам челядькöд öктыны öмидз. Миян пöльяс то мыйта вож тшукöдöмаöсь керкаяс местаö... Миян пöчьяс то мыйта синва тусь пöртöмаöсь вотöсö. А ми öктам да öктам, да тэчам йилöмнымлы<sup>18</sup> воманыс: сейö да тöдö — тан овлісны тіян дедъяс, тан овлісны тіян бабъяс. Вир тусьяс ті налөн, энö вунöдöй. Ой-луннас юмовтөм синвасö ньылалöй.

Катша... Енмыс соддзас мыччö миянлы. Но кужам-ö ми босьтны да лелькуйтны сійöс... талунтя йöз?..

**Л.** Ог вермы та вылö вочавидзны. И пола вочакывсö аддзыны. Пола сорсьыны. Абу öд ставыс ми сайын... Кылан, кызди джуджыд ниа пуяс шувгöны Изываам?! Уна нэм. Кымын йöзöс адзылісны, кымынöс кольöдлісны... Он лыдды, он артав. Ниаыс веніс кадыслыс чардбиөн вочкалөмсö. Сылөн вужйыс — йöзыслөн лов пыкöд, сылөн вожъясыс — дед-бабсянь аския лунö лача.

Талун садъям пуктi ниа. Ассиянь. Челядьбйлы. Нук-нучкалы. Но сійö сэтшөм на нэриник, лэчыд төв кö кыпöдчас, вужнас нетшыштас!.. — и бöрдыс кагаöс моз топöда сійöс морöс бердам. Колö, мед ниаыс быдмас... мед Изыва муыс оз тыртöммы... мед оз ло яндзим бöрыннас, дед-баб водзын. Кор паныдасям. Мöд олөмас.

**Е.** А верма-ö ме кöдзны сійö быдмөгсö, кутшөмөс ньылыштöма ой-луныс<sup>19</sup>?.. Син водзö вайöда сылысь кыа рöма корсö да сöмын на мыччысьом шондi рöма сьölөмсö. Мыйсяма тайö быдмөг? Сійö выльысь и выльысь шызьбöдö менö аслас мичөн, вынөн, бурлунөн. Но кызди меным кольны сійöс олөмас?.. Гашкö, кывйын?

<sup>16</sup> Катша — *Ву вылын вöвлөм грезд.*

<sup>17</sup> Рай-рай (уд.) — *паськыда.*

<sup>18</sup> Йилөм — *челядь.*

<sup>19</sup> Ой-лун (уд.) — *вой-лун.*

А. Мед сійö ассъыс шудсö вуджöдiс мортлы?.. Гашкö, и збыль — кывйыд мездас кодöскö сьöкыд здукö да вештас веськыд туй выlö... Менам бабö кыв пырыс аддзöма эскöм дорас ордымсö...

Микöла Чуднöй<sup>20</sup> лунö шондiыс веськыда пырис шыпöлэс öшиням. Кутшöм вын кыйис шондiсö сэтчö? Чöв-лөнъ. Бусыс мыйта... со важ көрöбын вижöдöм кабала. Ме аддзи тöдса кырымөн гижöм кывъяс. Корöм... Бабö олöм чöжыс эскöма бурас. И шудыс, и радлуныс сылөн вöли... Микöла Чуднöйыс эз öтдортлы, буракö. И весиг сэки эз энöвт, кор бабö бөръяыс нюмдiс асылыслы. Тувсовъя Микöлаыс нуöдiс бабöös аслас тулысö...

Корöмсö выльысь лыддя, лыддя... и кыла баблысь гөлöссö. Сылөн ыджыд эскöмөн кевмыся. Но Дивöсö кора, гашкö, неуна унджык... Шондiыс Микöла Чуднöйөн видзöдö веськыда синмам. Бөрда...

Е. И радлуныс, и шогыс олöмас орчöн. Ме көсья жö эскыны бурас. Но тölөн вайывлö шог юör: важ пöль висьтавлöма, Ву пыддiыс пö татi шор пондас визувтны...

И збыль, менам Вуö ямö воысь-во.

А. Чайта, кадыс сiйöс бөр джудждаммöдас. Менам Изьваö ямö жö. Но сiйö оз вермы бырны. Ме ог сет. Тöда: кывйын олö зэв ыджыд вын.

**Изьва кывйыс — изъя ю...**

**Тэрыб визулыс**

**оз слöймы воштыны**

**изъяссö ой-луныслөн**

**йирас<sup>21</sup>.**

**Изъясыд — олöмыслөн пыкöд,**

**сэтчöс йöзлөн лолыс, налөн оласногыс...**

**Мамлөн морöс улас и вöли на ме,**

**но кывлөн мелi шыясыс йöлöгаалiсны нин**

**дзoляник сöлöмам...**

**А бöрыннас гöгөрвои —**

**кывлөн выныс зэв ыджыд. Корсюрö петкöдас югыдас либö**

**лэчыд тölөн вачкас чужöмад.**

**Сылөн выйым<sup>22</sup> олан визь. Торъя. Аслас.**

**Изьва кывйыс — изъя ю... Шань йöзöс вочаалас,**

**ва вывсьыс югыд дзирдъяссö койыштас сöлöмад,**

**пöлыштас ыркыдсö лолад...**

**Скөр мортöс... прöсьтитас.**

**Прöсьтитöмсьыс нöшта на вынаджык лоас.**

**Изьва кывйыс — изъя ю...**

**А ме — ю веркöстiыс ветлысь шытöв<sup>23</sup>...**

Е. Вöвлöм кадсö ыджыд югыд лэбачöс моз топöдывла морöс бердö. Öд воис кыскö ылиысь да регыд вошас бөр.

Лэбачыс некымын здук олыштö ме дорын. А син водзö петö серпас: зарни лун. Ывлаас жар. Бабöкöд лэччам ва дорö, көмтöг

---

<sup>20</sup> Микöла Чуднöй — Николай Чудотворец.

<sup>21</sup> Йир — джуджыдин.

<sup>22</sup> Выйым — эм.

<sup>23</sup> Шытöв — гөлöс.



вуджам пымалом лыасо, сото кокнымос... ме нель арөса, и дась бөрддзыны:

— Бабо, пым лыаыс да.

— Мед, ныло, мед.

Восьлалыштам да, бара:

— Бабо, сотас кокос да.

— Мед сотас, мед.

Югнитас вежорам да, радломон юала:

— Бабо, позьо комася?

— Ин, сөкато, ин.

Лөз юөдзыс коли кык воськов...

Л. А менам юөй сэтшөм на ылын. Лежнэг йөн<sup>24</sup> костод колө лэччыны сы дорө. Лежнэг емыс пысасьо быдлаө: вөсни платтьо пыр кырышталө, парсалө кийс, но чөвлунсө ог повзьод аслам ойзөмөн. Восьлала водзө. Юлань. Сийө бурдодас бытшлалөм лолос... сөмын колө лежнэг йөн пиөдыс вуджны ю дорам... Аслам Ен дорө.



Е. Меным юөс колө вуджавлыны унаысь. Сийө миянөс паныдалө и коллялө...

Миян ветлом-мунөмыс өд Удораад кутшөм... Поезд локтө войнас. Сэссия сө сайө километр колө тюргыны машинаөн. Воан берег дорө водз асывнас.

Отчыд воим. А пыжыс вуджнысө абу. Ми челядькөд Ву талапөлын сулалам, мамө локтөма миянөс паныдавны да — мөдлапөлас. Вуджны гортө ог вермөй, виччысям пыжаөс. Ю вомөныс мамө горзө миянлы:

— Йилөмтө пасьтөд! Кынмасны!

А ме сылы воча:

— Мыйла нө локтін? Асьным өд воим эськө!

Кылам, а талапөлас көк көкны кутіс. И сылы воча, мөдлапөлас, мөд көк шыасис. Ми ланьтім, кывзыны пондім. Дыр көкисны. Сэссия коркө ланьтісны жө, и ми бара на горзім өта-мөдлы:

— Мый нө та дыра оз лок?..

— Узьө, көнкө, колі садьмөдны-а! Код нө тайөс төдіс!

Мамө, мамө, нель час асылын он жө лок Перевозөдз. Но локтөма со, көкө.

Шондіыс медводдза югөр койыштіс — ва вылас зарни сос шевкнитіс, а сэссия и ачыс вөр сайысь кыпөдчис — мыча шоньгейным<sup>25</sup>, и ми, көть и кынмөмсьыс тіралам асья вадорас, но

<sup>24</sup> Лежнэг йөн (иж.) — лежнөг.

<sup>25</sup> Мыча шоньгей (уд.) — гөрөд шонді.



став ловнаным чукөстчим мыччөм радлуныслы воча. И кыпыд-джык лой, и шоныдджык. Тан нин ми — гортынось.

А мөдысь — Мозын вуджны колө вөлі: сөмын на юыс сувтө-ма. Видзөднысө полан — бырөд<sup>26</sup>. А мянлы мамөкөд вуджны сэтi, өдва төдчысь кок туйяс серти (кык-ө-куим морт и мунөма на). Ыркмунлө лолөй — коклябөрам лэччылө,— но колө восьлавны, бөр өд он кос... Мамө — водзын, ме — сы кок туйөд. Ог кө сідз тальыштөй и — тюпкысям рыө. Сёысь казтыла Енсө: любейө Енмө, өтико Енмө, вошты кызкө мянөс, ки пыдөс вылад моз ну. Матын нин, матын берегыс... Ловным нин сэтөн. Асьным воим жө сэсся. Гашкө, эг ю вывтис, а неуна вылітіджык восьлалім... Эг кө өд збылысь тувчалөй Енлы ки пыдөсас.

Л. Кымын помасьлытөм туй тальөма, кымын ва вуджөма... кымын йөзөс паныдавлөма... кымын мудз лолам пыдзралөма... Öнi та йылысь ог мөвпав. Олөмас выйым сөмын өтик туй, и сійө медся дженьыд туйыс — гортө... өд сэн век виччысьöны.

Пыри керкаам, мамэ пачысь кыскө пымсьыс-пым нянь, менө аддзис да — чуймискодь. Öта-мөд вылө чөла видзөдам, а ловным сёрнитө, и тайө кывйис гөгөрвоана сөмын мянлы. Сэсся ае петө мөд жырысь, юрсиыс неуна сивеймөма<sup>27</sup>, чужөм вылас содөма чукур, а синмас югьялө шуд! Недөрөвя<sup>28</sup> мысти гортө пырө Ванө вокө... сійө абу зэв варов да сөмын нюмдіс аслас радлунысь. Сэсся мамэ ставнымөс корис пызан сайө... Ае видзөдліс ми вылө... кокниа лолыштөмөн вашкөдіс:

— Ми гортынось. Ми ставөн гортынось. И эськө век кө тази...

## Мөд юкөн

Е. Мен кажитчө, тайө мян сёрниыс помтөм, и мөдас визувтны ю моз — кад пырыс. И тайө сёрниыс эрдөдас ю пыдөсысь изьяс. Кутшөмъяскө пондасны югнитлывлыны шонді югөр инмөмысь... (но өд весиг шонді оз вермы дзирдовтөдны быд из). Берегдорса став изсө нуөма кад визулыс, а мый тулясьө морөс пытшкын — пөрас кывйө да резыштчас шондіа ва моз уналы лов пытшкас. И тайө содзтырсьыс кодкө, гашкө, аддзас асьыс олөм здук.

Л. Тайө олөм здукыс вермас кодкөлөн ловті пым синваөн визувтны, эрдөдны гөптө вөйөм дойсө... либө кодөскө сибдөдас места вылас, мед корны прөща матысса мортлысь... И колө эскыны олөм здукыслы — выль туйө петкөдас...

Чайта, эскөмтөгыс мортис абу. И ме эскөмсө öнi зили куравны кушмөм ловсьым. Куралі, куралі... вирөдз дойдали сійөс. Но абу эскөмыс! Абу! И став олөм өдзөсыс син водзам сиптысис. Неуна бокө кө кежышта — вөя... А места вылам вөрзывтөг сулалігөн — косьма арся кор моз. Дзикөдз чукрася, сотча шонді югөр улас... Мен колө эскөм-сынөдыс... Кылан?..

---

<sup>26</sup> Бырөд — *йи сора ва*.

<sup>27</sup> Сивеймыны (иж.) — *дзормыны*.

<sup>28</sup> Недөрөвя (иж.) — *недыр*.

А төрыт вөтам уськөдчыліс Микул Өндрей. Паныдасим вөрын. Сійө өктіс гөрдсыс-гөрд пув. Шыаси сы дорө — эз кывлысь. Сэсся горөдчи: «Дядя Өндрей, он али мый кыв? Тайө өд ме!..» Микул Өндрей бергөдчис мелань да нюмуніс. Матыстчи сы дорө. А сэсся ми пуксим му вылас, и помнита, дыркодь сылы висьтаси олом йывсьым... висьтаси, мый ёна ставсьыс мудзи и тыртөммис лолөй эскөмтөгыс. А сійө менө эз жалит. Чөла кывзіс. Сэсся мыччис мен китыр гөрдсыс-гөрд пув. Та бөрын вөтсө ог помнит. Но асывнас вежөрам югнитіс мөвп: гөрдсыс-гөрд пувйыс — выль сьолөм. Мед выльысь заводитны овны. Виль туйсянь. Став шөгсө вунөдөмөн. Пувйыс — эскөм. И Микул Өндрей мыччис сійөс меным...

Вөтөс тусьяснас юкся тэкөд... Колө эскыны аслыд, өта-мөдды, оломысы. Тайө и эм лолыдлөн выныс му вылас гөсьтитігөн...

**Е.** Босьті чим гөрд тусьястө, и збыль, шоныдджык лои морөсын. А нөшта на, найө козыналісны мича арсө, став сук рөмнас. Арсө козынавны оз быдөн вермы, а тэнад со артмис.

Талун ветлі гимназияса челядь дорө. Сёрнитім кывбурьяс йылысь, кызди найө вооны — лэбачьяс моз — чукөрөн, а эмөсь и өткаяс. Мөвпнам тайө аддзысьломсө сии Уитни Хьюстонлы (сійө некымын лун сайын кувсис). Кор петі гимназияысь да пукси автобусө, радио пыр юөртісны: талун прөщайтчисны Уитни Хьюстонкөд. А ме видзөді өшиньө, вөлі тувсовъя рыт, и кор автобус лои Стефановскөй собор весьтын, шөнді югөр инмөмысь юрвывса крестыс өзйис-югнитіс. И менам морөс пытшкын пымавліс тайө бисьыс. «Уитни, прөсьтит...»

Тадз прөщайтчи аслам радейтана сьылыськөд, кодлөн сьылөмыс востө шөндіөн ойдөдөм ордым оз му веркөстіыс, а вылітіджык — енэжөдыс, и сэті поэьө востлавны сьлөн сьыланкыв бөрся помтөг, и став шөндісө, мый менам өксис олом чөж, нуны сылы — став челядьдырся шөндіөс — купальнича чукөр моз... Уитнилы.

**А.** Видзөда та мында шөнді вылад, и кывсө оз артмы шуны. Но ме сета шөндіясыдлы турунвиж вазьом видзөдласөс... Тэ кый сэсь чөла кывсө...

Паськыд видз шөрын кольөм кадыслысь ловшысө кывза. И сьөкыд гыяс топөдоны лолөс. И кык вөвлөмтор мыйлакө сувтө син водзам: Свето чойө дзоля на. Паськыда нюмъялө. Көмтөм. Туй бокысь өктө катшасиньяс мамысы, Лена бабөлы... и гашкө, меным тшөтш... И мөдыс — Төв. Өтка гу дорын өтка ичөт коз сулалө. Лап вылас югъялө чача. Югыдыс синтө ёрө, но сысянь өвтө пемыд вой. Тайө козйыс, чачаыс — Светолы... Неылысь аддза мамсө, Лена бабөөс... И чөв... Лэбалысь төвруыс мыйкө шөпкөдө пелям. Но ог гөгөрво сылысь кывсө. А гашкө, Свето көсйө висьтавтөмсө төврунас шуны?..

Син водзам ю моз ылькнитлөм кык серпасыс некыз оз йитчыны вежөрам. Сэтшөм том на сійө вөлі... Нывка.... Но мыйлакө Енмыс сэтшөм водз корис Светоөс ас дорас... Но ме кыла: чойө воліс му вылас ыджыд радейтөмөн йөз дорас. И гашкө, өти здукө сійө эз вермы муслунсө кутны... и уси... А ме и мукөдыс тшөтш казялім та йылысь вывті сөрөн...

Талун Светолы өкті катшасинъяс... талун нуа сылы помасьлы-  
төм радейтөмөс...

Е. Тайо ичөт нывкаыс казтыштис менсьым чой-вокос, челядь-  
дырся олөм-вылөмнымос, Путшкымдинө ветлывлөмөс.



Туйыс эз вөв кузъ:  
Важгортсянь Путш-  
кымдинөдз, дас нель  
верст. Но тайо кык  
сикт коластөд пы-  
жөн мунөмыс вөлі  
шудөн. Челядьдыр-  
сянь радейта туйсө,  
но нөшта ёна — ва  
туй. «Сашкө волас ті-  
ягла, сійө ва туйсө  
төдө», — шуө теле-  
фон пыр Нина тьөтө.  
А ме ог гөгөрво вөлі,  
кызди ва туйыс Саш-  
көлы вөсьсө, ме тай

видзөда и ог аддзы нинөм, быттө тай юыс быдаті өткодь. Öні,  
дерт, гөгөрвоа, мый Сашкө төдіс, кыті джуджыджык ваыс,  
йирджык, мукөд вокъяссыс тшөкыджыка волывліс миянө да.

Пуксялам пыжө, пөвторыяс вылө. Сашкө заводитө моторсө  
да, пыжыс надзөникөн вешйө берег дорсьыс. «Мөдөдчим!» —  
нюмөс ог вермы дзебны. Сашкө нюмъөвтө жө, казялө менсьым  
радлунөс да. Сашкө абу сёрниа. Век думайтчө мыйкө. Но вокъяс  
пиысь сійө меным медся матын. И öні на миян сыкөд ловъясным,  
чайта, лэблывлөны таті, Ву весътөд. Сылөн лолыс енэжсьыс  
лэччылө, а менам — му бердсьыс кор ордчывлө (овлө, сунгысьла  
гожся лунъясам).

А луныс шоныд. Ва веркөссө видзөдны синмыдлы гажа —  
кытчө шонді югөрыс усьө, эзысь да зарни посни пыжъяс (быттө  
найөс кужөмөн вөчалөма кодлөнкө пони кийс) гожся небыд  
төвру пөлялөмысь лайкъялөны. Сук лөз кымөръяс өшөдчөмаось  
ю весътө, и ваыс пемыд, джумъяс сэн — чайтан. Но ваыс абу  
быдаті өткодь, кытъястікө, лэччан кө пыжысь, кок шегйысь оз  
ло вылынджык (кутшөм мича сэті ваыс, югыдвиз, лыаыс матын  
да). Ляпкыдінтіыс вок йөткасьö зібйөн.

Сашкө тайо луныс кодъ жө — бур. Ме пукала сылы воча  
да коръяскө гусьон видзөдлывла сы вылө. А вок быттө оз ка-  
зяв, синйө юсө, кыті эськө кокниджыка лыбас пыжыс, да пыж  
бөжас чукөрмөм васө көшөн койыштлывлө. А ме гажтөмтчөмө  
вокысь да бара кыйөда сійөс, кызкө окота сыкөд сёрнитыштны,  
мед көть и синъяснаным.

Эг чайтлы некор (да он өд вермы мөвпыштны татшөмсө!):  
вок менам лёка помалас олөмсө. Бырөдас асьсө. Вокөй, Сашкө  
вокөй, менам югыд лэбачөй! Кымынысь миянөс новлөддывлін  
Важгортсянь Путшкымдинө да бөр. Сөмын тэныд ме верми нюмъ-  
явны повтөг, и тэ кылін менсьым радейтөмөс, тэ дорө ловнам  
сибөдчөмөс.

Сашкө, ме ог төд, көні тэ. Пөртчин лэбачө, ли кымөрө, ли

юö. Но меным тэтöг ва туйыс тупкысис, потшисны юсö тэтöг меным. Некор нин оз нюмгёвт Вильгорт горувтí вал валитысь Вусö мунöм бöрын Путшкымдíнлань петкöдысь вомын. Ота. Визув. Вына.

Сашкö, Сашкö... Тэ мянлы вöлín пыжөн и поскөн. Радлунөн. А лоин шогөн. Ыджыд шогөн. И коли ме эськö тайö шогсö кытчöкö, но кытчö колян?.. Вир синваöн талун тэ визуван ме- нам синмысь, мыскан чужöмöс. Некор на ми эг вöлöй татшöм матынöсь, Сашкö.

А. Лоам öнi зэртöг гымалö... Бөрда ачым... Но чайта, мортыс кö тэн вöлi пыжөн и поскөн — тадз лоас пыр, олöм помöдзыд. Тiян костын колис ыджыд радейтöм, сiйö йитö ловнытö. Ыджыд радейтöмыс вевтыртас медся ыджыд шогсö. И танi, и мöдлапöлас.

...Важөн полi öти туйöд ветлавны чиганкаяскöд. Но öтчыд веськалi ме больничаö. Висысыяс пиысь палатаас мекöд орччөн куйлiс Аза нима чиганка. Быд асыв сiйö любитiс йöктыны джодж шöрас. Чуймалi мыйлакö сы вылö. А сiйö тшöкыджыка и тшöкыджыка мекöд корсис сёрни. Эг пышгьяв сыысь. И ёртасим. А öтчыд мен окота лои тэрмасыштны водзö, вуджны уна бузгысь ю и тöдмавны лоанасö... Азаöс кори войнас столоваö, мед тöдмавны ставсö. Сiйö кöсийысис. И кор ки пыдöсöс книга моз лыддис — нинöм эз шу. Вештiс бокö. Чöла олыштiс. И некор эз тшöкты некодлы ки пыдöсöс петкöдлыны. Мен кажитчис сэки сiйö тешкодён. Эг петкöдлы сылы слаблунöс. Эг бөрддзы, эг горöд. Но лолöй зэлавлiс... а кор бөр пырим гусьөн палатаас и водiм узыны... мыйлакö Филько пернайе йылысь казтылöмъяс войся ыркыд юөн йöрмисны меö. И другысь серпас вылысь моз аддзи тшöтш ачымöс ар вит-ö-квайта нывкаөн... Чужан лун менам. Керка тыр гöсьт. Но найö öнi мен ру пиын кодь. Пернайес медъясыда синъя. Сiйö козыналiс меным алöй сикöтш. «Ин вошты некор», — шöпкöдöмөн шуис меным. Ме эскöдi, мися, ог вошты. Но öтчыд сикöтшыс ори. Ышмöм пондаö. И молясыс киссисны поскас, быдлаö пыралiсны... И пернайен шуöм кывъясыс быттö нöшта öтчыд йöлöгаөн шыасисны лоам и ко- лисны чöсöдана лöньлун... Моляссö бара на öтикөн-öтикөн öктi, но эз ставыс ликмы...

...Мый öткодыс чиганкалөн сёрниын да Филько пернайес казтылöмын? Гашкö, ачыс олöмыс? Пернайелөн олöмыс? Либö шудöс воштöмыс? Гашкö, эг кö сикöтшсö орöд, и нэмыс сылөн вöлi кузьджык?! Ме öд сэки, дзолянам, эскöдi пернайес, мый видзны кута сикöтшсö... и мен позис сiйöс сайöдны йöз синмысь, вомидзысь. Но эг кар сiдзи. Ошйыси ставлы. И лэдзи пернайелысь ловсö водзджык кымөръяс костас...

Ки пыдöсам öнi видзöда... ог аддзы алöй моляссö, и чиганкаөн пыдiдö дзебöм мöвпгьяс... А сьöлöмöс пурт йылөн моз, ёся сатшкöмөн дойдö Филько пернайелөн пöим рöма видзöдласыс... Сiйö оз вид эськö менö. Но ме öд вида и кöрита ачымöс! Но оз позь кольöм кадыслөн юас мöдысь пырны. Оз позь. И такöд он миритчы, но и вежны нинöм он вермы...

Выйым быд лöөмторлы, здуклы — кад. И шуин кö мортыслы видзны мыйкö зэв донаторсö — видз! Эн прöста кывнад висытав.

А лолад кйдысѡс моз пукты и дорйы олѡмлѡн гымысь, и зѣрысь, и чардбиѡн пусѡ поткѡдѡмысь...

Ставыс морт сайын. Прѡста тшѡкыдджыка огѡ казялѡй Ен-сянь пассѡ и мунам боктѡ. И сорсям. И жалитам. А сѡмын ѡд колѡма гѡгѡрвоны пас либѡ сѡмын пастор... И ставыс эськѡ вѡ-лѡ мѡд ногѡн...

...Филько пернайе, прѡсьтит ставсьыс...

Аза, кѡнѡ тѣ?... И мыйла шудыс мен ѡнѡ алѡй сикѡтшѡн оз сетчы?... Аза...

**Е.** Лыдди сикѡтш йывсьыд и казътыштѡ ѡти вѡт. Мукѡд вѡтыс мыйлакѡ кольѡ овны... ловзьѡдѡ абутѡм серпасъяс либѡ олѡмас важѡн вѡвлѡмтор.

Коркѡ олѡма ань. Тайѡ аньыслѡн морѡс вылас зарни чиръясѡн ворслывлѡма сикѡтш. И тайѡ сикѡтшыс вѡлѡма войтырлѡн медся ыджыд озырлуныс.

Но воѡма кад, кор лѣк вын нетшыштѡма ань морѡс вылысь сикѡтшсѡ. Кѡвйыс орѡма, и молясыс гылалѡмаѡсь кад-джумъяс. Некод нинѡм важѡн нин оз тѡд тайѡ сикѡтш йывсьыс, и сѡмын ѡткымынлы сы йылысь восьтылѡны юѡр — шондѡн ойѡдѡм жыр (тѡкѡтѡ кезлѡ жоркѡдлѡны<sup>29</sup> ѡдзѡс, мед тѣ удитѡн сѡмын синтѡ чѡвтлыны сѣтчѡ да аддзывны лолѡ йиджан югыдсѡ, мед сѣсся нѣм чѡжыд новлѡдлыны ас пыткад и выльысь и выльысь казътывны тайѡс. Нѡштаысь кѡ ѡтпыр позис эськѡ видзѡдлыны сѣтчѡ!.. Но мѡдысь ѡдзѡссѡ оз восьтны. Некор. И тѣ пондан корсьны кыв, некымын кыв, мед висътавны и мукѡдыслы да выльысь овны сѡйѡ неыджыд кадколастсѡ. Но весышѡрѡ. Ковмас виччысьны кадсѡ, кор тайѡ гыыс бара воас да ойѡдѡдас ловтѡ... гашкѡ, сѣки... сѣки сюрас колана кывйыс?).

Тадз кымын жѡ меным восьтылысьны вѡтѡн важ книга. Эз сетны киѡ. А листалысьны. И сѡмын ѡти лист бок и коли син водзѡ. Зарни сикѡтш йылысь кывбур. Гашкѡ, збыль — сѡйѡ сикѡтш йывсьыс и вѡлѡ кывбурыс? Но кодлѡн? А мѡвпыс тѡдан кутшѡм вѡлѡ?... Кыв — кѡв. Коркѡ орѡма. И молясыс гылалѡмаѡсь кадас. И морт век корсьѡ тайѡ зарни моляссѡ, мед йитны бѡр найѡс сикѡтшѡ, да эскѡ — сикѡтшыс коркѡ чукѡрмас, и чужас сылан — кад вомѡн сѡлѡмъяс йитысь кыв.

Кыв — кѡв. Коркѡ орѡма. И ми йитам и йитам кывъяссѡ ѡта-мѡдыскѡд — корсям зарни Кыв. Но сюрас оз миян пиысь кодлыкѡ сѡйѡ талун?..

**Л.** Тайѡ зарни моллыс быд ловъя лолын. Сѡмын кутшѡм джудждаын? Ѳдвакѡ висъгалан. Лолыд — помасылытѡм. И сылѡн мывкыдын и эм зарниасъысь кывйыс.

Но лолыдлы шуѡма вуджны туй. И сѡмын мунысьыс сѡйѡс венас.

Кывйыс и эм туй. Кузътаыс быдѡнлѡн аслас.

Кыв — компас. Ѳтчыд тувсовъя Микѡла Чуднѡй лунѡ пыри вичкѡѡ. Сѣн олѡма ань сулалѡс ѡбраз водзын. Вомгорулас мыйкѡ шѡпкѡдѡс. Но мѡвпсѡ эг куж кыйны. А вазьѡм видзѡдласыс сы-лѡн корис Микѡла Чуднѡйлысь Кыв. Сѣсся аныд ѡзтѡс сись. Сиськыс перчкыс-ымзѡс-сотчис... Гусьѡнмоз Микѡла Чуднѡйлы

---

<sup>29</sup> Жоркѡдны (уд.) — муртса восьтыштны.

чепöльті сьölöм рöчсьым югöртор и кори тайö аныслы ликтыны туйсö Кывланыс... И бурдны...

Чайта, Микöла Чуднöйыс вайис аныслы Чудö — пуктіс лолас компас. Ми век вермам отсавны öта-мöдлы. Сöмын бокті эн мун...

**Е.** Чайта, коръяскö вермам. Но ог век. Оз быддырйи артмы мыйлакö. Аслам чойлы весиг отсавны нинöмön эг вермы. Гашкö, и ачыс эз кöсйы.

Оля вöлі ёнджыкасö чöв олö. И ми сыкöд бурног некор нинöм йылысь эг сёрнитлöй. Ставыс быттö вöлі гөгөрвоана и кывъястөг. Ю визувтö, кымөръяс кывтöны, пуяс сулалöны — чöла. На кодъ жö кымын и чой вöлі. Ас тырнас олысь да этша сёрниа. Öнi кызди казтыла, некор нинöм сылы эг козынавлы. Гашкö, сöмын мыняяс, югьдвиж мыняяс<sup>30</sup> челядьдырйи. А öнi козынавны мыйкö сёр нин. Чой абу. Сöмын кыв либö мöвп вермасны вайöддыны син водзö вöвлöмасö, кöнi ме выльысь и выльысь корся шондi паса изъяс. Чойöлы. А найö уна во мысти то пöртчисны кывйö. Оля йылысь кывйö. Вот кызди овлö. Некор он тöд, мыйöн бергöдчас козиныд.

Но тайö изъясыс вöліны шондi морöс выльысь — шоньдöсь, югьдöсь, тельскöдышта вöлі ваын, и найö пондылöны лöставны.

Тадзи жö гижигөн кывъясöс öнi пожйыштла лов ю ваам, мед найö шондi инмöмысь нöшта на югдiсны либö синва сора вöліны. Мед Оля аддзис сэтгысь Ву дорса шоньд мыняяссö и ва пыр тыдалысь изъяссö. И бара — кызди и век — нинöм эз шу...

**А.** Олöм-юыс век визувтö водзö... Оз думышты миянлөн шог-печаль йылысь. Сылөн выйым визув... а ми абу гыяс, ми абу вабергач... И став йöзыс... и матыс, и сöмын тöдсаяс, волöны могөн олöманым... и кор кадыс сылас — найö мунöны бөр. И öд нинöм он вöч. Найö мунöны, мед воны, паныдасыны, гашкö, мöд олöмас выльысь... Кывзышт чöвлунсö... сэн гөлöсьяс кылöны... Кывзышт, гашкö, тöдсаöс казялан...

Чöвлун... Вежöрам дикейа бузгысь шорөн петкöдчылöны чужöмъяс... Тайö йöзыскöд некор эг варовитлы. Тöда найöс сöмын Парасья бабöлөн висьтасьöм серти...

И другысь мöвпöй став юсö олöмас бергöдiс бөр... И веськалi кадас, көн эг на чуж, эг котрав веж турун вивтi. Аддза дженьыд серпас: нывбабалысь ар дас кöкъямыса зон мыйкö корö. Неуна кывзысьышта. И кыла: «Мамö, мися, колö мен кызь ур кино вылö». Зонмыс нюмъялö. Еджоват юрсиыс шондi улас лöсталö... Ань сетö сьöмсö. Мöд серпас: ставыс ру пытшкын. Но аддза кыр, сэн улiас машина. Жугласьöм. Сэсся недыр мысти воöны йöз. Мыйкö машина дорас карöны. И сэсь ме другысь синъя сийö зонсö...

Кор кадыс воис — лэччи векныд поскöд му вылö... и Парасья бабö татшöмсяма вöвлöмторсö висьталiс меным. И гөгөрвои: кадысь водзджык паныдасьлi аслам рöдвужкöд. И сийö мичаник зонмыс вöлöма меным дядьöн. Иван дядьöн. И киноас сi-

<sup>30</sup> Мыня (уд.) — *галя из.*



йö абү ветлöма. Куритчан вылас кольöма сьöмсö. И сölöма код юра мужичöй дорö машинаö. И кор найö Нöлынъ пос дорö воö-маöсь, машинаыс другысь тыралöма<sup>31</sup> гöра улас. Абу кыкөн вö-лöмаöсь. Унаөн сэк кулöмаöсь. И Вылыс Гамын, и Улыс Гамын — йöзыс бöрдöмаöсь крамын моз...

Бабö олöм помöдзыс тшöкыда шулис: «...Иван дядьыд олís свет вылас дас көкъямыс ар, дас көкъямыс төв, дас көкъямыс тулыс, дас көкъямыс гожöм... и кызь куим лун...» Парасья бабö тайöс шуалигас синсö вештылис бокö... и кельыдлöз синмыс век вазылис. А та бöрын сийö корсюрö содтывлís: «...ай-мамысь водзджык челядыс оз вермыны вошны свет вывсьыс. Ай-мамыс öд мунöны первойөн...»

А сийö кызь урыс öнi истöг көрöбын куйлö. Бабö сьöмсö сe-тöма аелы. Неважөн на киам бергöдлi сийöс... ыргөн урсö... и лолö вир-яйсыйм быттьö тэрмасис петны. Быттьökö көсийс мыйкö вежны. Сийö кадсьыс. И лоöмасьыс. Но бабö, Иван дядьö абү-öсь... Выйым память. И көмтöм кокөн, лысваа веж турунтi сэн воеда... и чайтсьö, лысваыс — тайö бабөлөн синва...

Шондiыс ломалö. И олöмлөн юясыс юасьтöг ыджыд визулөн пышйöны водзö. А менö мөвпöй оз лэдз, киöд топыда кутö. По-зьö кө... кадсьыс кольчышта... Чöвлунсьыс нöшта кывзышта гөлöсьяс...

Слöйма кө — вöтöда кадсö...

**Е.** Ме тэнö чукöста волыны аслам туй вылö. Тэ аддзылан арся биөн сотчысь пелысьöс, чукля льöм пуöс, и менсьым енэ-жöс, и лов пыр визувтысь юöс. Лоқ, туйыс кытчökö öд петкöдас... Кыдзи и кывйыс — вайöдас кутшöмкö мөвпöдз. Но некор водз-выв он тöд, мый тэныд козьналас кыв.

Эм менам ичöt туй, сэтi ми важөн ветлывлím турунла. Туйыс васöд, нюраинтi вуджö. Кузяланог лöбöдöма<sup>32</sup> некымын пöв, но зэра лунгясö и тайö оз отсав, ва гурангяс кор пуксясны. Но эз ниятнас да ванас чуймöдлы тайö туйыс. Пöв öтар и мöдар бокас кельыдлöз посни чвет петалö — незабудка (рочөн кө), быттьö енэж платтьöсьыс дöратор орома да плавгысьöма тайö яг рöчас, ният шöрас. Колö жö, татчö... И ягас пыран, и ниятсö мöдан вуджны гажтöма, а тэныд козин — кизь кодь посни лöз-лöз чвет, и туруна кузолөн либö корöсь кор нöбийөн кор петан видз вылысь, бара кыпыдджык лолö, видзöдалан найöс да — енэж платтьö серсö синъян.

Бöръясысьö ветлím корöсь корла тайö туйöдыс Ванякöд ко-льöм воö. Кымын во эг нин пыравлы тайö ягас, а нинöм абү вежсьöма: пыр сэтшöм жö ният да ва, а нöшта на и зэрмис. «Ваня, колö вöли сапöгасьны тэныд, висьталi öд — татi туйыс ният», — шуи пилы. Но эг весиг мөвпыштлы, мый и пöвъяс тан важ моз жö куйлöны, а пöвъяс бокас... да оз вермы лоны: енэж платтьöысь лöз дöраторйыс плавгысьöма... Ваня мунís, быттьö сiдзи и колö, а ме нинöм сылы эг шу, а радлунöй син-ваөн ылькнитís. Мед сöмын эськö Ваня оз жö бергöдчы, мед эськö оз жö аддзы синваöс. Но эз. Нырөн мунö югыдланьыс.

---

<sup>31</sup> Тыравны (иж.) — пуккыльтчыны.

<sup>32</sup> Лöбöдны (уд.) — пуктыны.



Сэні и видзным. Кодкө тай бур морт ытшкөма. То кыздзясным-чойясным. «Мам, видзөд, а озйыс... кутшөм гырысь...»

Ичөт туй. Но сэтшөм колана ловлы. Абу кө ас пытшкө туй, көні ставыс тайө и оло, көні быд турунторлөн, быд ва рөчлөн төдчанлуныс вывті ыджыд. Мыйла эськө тадзи оломас, ог төд. А сьолөмыд төдө, но ставсө оз висьтав. Сылөн мөд ногаджык могыс таладорас.

А. И збыльсь, мөд ногаджык... но сьолөмнымөс ог век кывзөй...

Но мөвпинам тон бара муна ставсьыс Вис ты дорам... Юль. Көка вой. Ыркыд. Мудзөм шондіыс корсьө ассьыс керкасө... Еджоват руыс и турунсө, и чветьяссө шебралө лысваён... Ты дорас матыстчи. Видзөдча сьө рөмпөштанө моз. И друг орччөн кыла кодкөлысь лов шысө. Неуна повзьөмпырысь бергөдчи, мед көть төдмавны — коді... Тэ төдан — кодөс паныдалі, и ме тшөтш. Но тайө мортыс весиг вемөсас оз казьяв та йылысь. Бур... Но мен сійөс өні колө кывны орччөн. Мед кө и сулалө мышкөн меным. Но лөныс сьолөмсьым оз быр...

Еджыд сюзь кыпөдчис турун пиысь. И гөгөрвои: ты дорас коля өтнамөн. А мортыс мунас. Со нин руыс пискөдіс сылы еджыд туй... Чөла колльөда сійөс видзөдласнам...

Шондіыс аддзис ассьыс керкасө. Мортанөй саяліс, и туйыс быри. Коли ты. Ме. И еджыд сюзь йылысь казьятылөм. А көні жө аския луныс? Кор воас? И мыйла? Кодлы?..

Тысьыс синйи чери... Югьдөс... Тальма, буракө. Уялө ваас, тельскөдчө. Тайө шыыс матыстө асывсө. Босьті киа катшасин, бергөдлышті да ваыслы козин пыдди чөвті визуvas...

Абу өти мортө көдзөма оломсө... И өткалуныс абу. Асьнымөс жалитөм могысь ми думыштім сійөс...

Чериыс уялө. Садьмөны лэбачьяс. Шондіыс восьталө керка өшиньяссө. Сынөдыс сөдз. Вуджа ота видз. И водзын — дзонь олом...



Е. Лыдди письмө-тө, и син водзө воис тавося гожся серпас: вөрса визув ю шөрын еджыд дзоридза ді. Быд гожөм воывлам тайө местаас, но некор эг аддзылөй татшөмсө. А таво кодкө быттө көдзөма ва шөрас посни коръя чветсө. Час-мөд мысти лэччим кор чой горув, нинөм нин эз вөв, и кытчө сійө во-

шис — еджыд діторйыс?.. либө дзоридзьясыс кунисны синнысө да өні виччысьоны выль лун, медем бара өзйивны недыр кеж-лө?..

Ва шӧрысь дзоридза дісӧ ми аддзим Варуккӧд, и тайӧ мичыс олӧ ӧні тшӧтш и сы лолын. Кор восьтылӧны синсӧ вачачаяс, Варук, кӧнкӧ, нюммунлӧ...

Л. Тӧрыт кытшовті тшӧтш еджыд діӧс. Вачачаяс сэн вашкӧд-чисны лӧньыскӧд. Сёрнисӧ налысь эг торк, рытывбыд гуляйтӧ вӧрас и ӧкті вотӧс моз сэсь лов-чуманам мичсӧ, вӧр-ваыслысь серсӧ. Гортӧ эг воы. Вӧрас кылі ачымӧс чужан керкаын. А сэсся лэччи рас сайӧ...

Регыд шондіыс палялас... но ӧні ставыс ру пиын. Татшӧм лӧняс дыр нин эг веськавлы... Кежи Петыркӧӧ... Кок улам тырыс из. Но мыйлакӧ ӧти на пиысь корис сійӧс босътны киам. Тайӧ дзимбыр. Сійӧ шондітӧгыс киам югъялӧ. А кор шонді югӧрыс веськавлӧ сэтчӧ — эзысьӧн сотчӧ. Дзимбырыс петкӧдлӧ менсьым кадӧс. И ӧнія йӧзыслысь тшӧтш. И тайӧ кадыс абу кокни. Век быттьӧ колӧ мунны векни пості. Думайтӧмӧн. Воськолыд кӧ бокӧджык веськалас — поскыд оз ло. Мыйкӧ мӧд кутас виччыны тэнӧ. И нинӧм он вӧч. Татшӧм кадӧ веськалін.

Дзимбырыс чуньяс костӧд киссьӧ. Со ӧд кадыслӧн визулыс... Вевтырас югыд, а пытшкас... коды мый. И менам кадӧй дзимбырӧн чуньяс костӧд киссьӧ... И аслам кадкӧд вуджа Куръясӧ, Рас сайӧ, паськыд видз былӧ. Лӧньыскӧд вашкӧдчыны. И кор шондіыс восьтас синсӧ, ме кора сылысь, мед кадлӧн вевтыс и пытшкӧсыс век вӧлі югыд да сӧдз. Мед йӧзыслӧн кад-визулыс лоис мырпом рӧма...

...Рас сай. Тані быттьӧкӧ рай... Пуяс. Джуджыд турун. Чветъяс. И шонді. И дзимбырыс киам эзысь. А сьӧлӧмам ыджыд надея, мед корӧмӧй збыльмас... И мед эськӧ збыльмас.

Е. Пуясыс, мыняыс, юыс — тайӧ ставыс и менам олӧмысь. А нӧшта... Путшкымдінын, Палэй баблӧн керка дорӧдыс, визувтӧ вӧлі шор. Сы вомӧн пуктӧмаӧсь дженьыд пӧвтор. Тайӧ поскыс олӧмас менам медрადейтана. Некор сэсся эг аддзыв татшӧм ичӧт да татшӧм муса поссӧ, кыті бузгысь шор вомӧн вуджавліс Палэй баб, воывліс мянӧ орчча керкаысь Марей баб, бедъя<sup>33</sup>, котш — ӧтпыр и котшнитас пӧвтор былӧ, и воас нин талапӧлӧ, а ме сулавлі сэнӧ да видзӧді пышйысь, нюръясысь сӧдзӧдчысь васӧ. Сійӧ сэтшӧма тэрмасис лоны юӧн, котӧртис кыр горув, мыняыс костӧд, сёй берегсӧ нюлӧмӧн. И ми, челядь, сы былӧ видзӧдӧмӧн тшӧтш лэччылім вадорӧ да сэсь ӧктім шуда здукъяс.

Некор сэсся ни ӧти пос эз вермы овмӧдчыны сьӧлӧмӧ, кыдзи тайӧ сойтыс. Сойт — сой кузя, сідзкӧ. Кодлӧнкӧ сойыс. Но кодлӧн? Кутшӧм-сэтшӧм бур мортлӧн ли ловлӧн?.. И ӧні на огтӧд. Но сылысь зумыдунсӧ кыла лолын. И ӧні на сійӧ пуктӧ ассьыс пӧвсӧ кок улам да вуджӧдывлӧ менӧ, мукӧддырйи чайта, ог нин во, но бара синмӧс куньӧмӧн тувчча водзӧ, и чайта — став вывтырнам муна джумъяс, но бара кок улам чорыд сюрӧ, и бара нюмъевта аслым ли кодыкӧ — ичӧт сойтыд бара отсаліс. Палэй бабӧн бласлӧвитӧм сойт. Ыджыд ловлӧн сой.

Муса ичӧт сойтъяс! Олӧй да бурмӧдӧй морт сьӧлӧмсӧ, и мед век лоӧ олӧмас кык берег, кык олӧм йитысь пос.

---

<sup>33</sup> Бедъя (уд.) — беддя.

А. И мед эськө век лоас кык берег. И мед эськө поскыс оз сісьмы. Мед век коляс туйыс кослыны бөрө... көть нин мөвпөн. Эг чайтлы, мый мортыс вермө овны сөмын кольом кадас. Сьывны, мөвпавны — сөмын сэні. А өніяыс — вуджөр кодь. Мыйла таdzi овло? Он төд?.. Со талун аекэд мунім Куръя дорас, майттэн<sup>34</sup> лыаыс пымсьыс-пым! Аекөд восьлалім кыкөн. Но сійө казтыліс и Микул Оңдрейөс, и Шөк тош Вальөс, и Тихон Васьөс. И мен кажитчис, мый орччөн став казтыланаыс...

Но мен тайö здукас окота лои пырны Куръяас, вошны сылөн гыясө. И сунгыси юас. И кор ваыс сывъяліс менö — чөвлун пуксис лолам...

А сэсса аекөд бара тэрмасим водзö... И кор изъя берегтіыс мунім, гөгөрвои: йөзыс — юас. И быд мортлөн сійө аслас, сөмын сылы лөсялана. А кор мортыслы сиптысьö таладорсьыс өдзөсыс, ме думысь, сійө пырö торъя юö и лоö гыөн. Гы вылас налөн кутчысьö ловныс... Найö сэтшөм кокныдыкөсь, югыдөсь... Ад-дзан?..

Гыяссö орччөн нуöдам олөманым, вашкөдчам накөд, кевмысям налы, корсям вочакывъяс... И найö отсалөны пасөн ли, вөтөн ли.... Ми эскам налы.... Огө лэдзөй сьөлөмсьыным... И корсюрө чайтсылө весиг, мый ог олөй ассыным олөмнымөс — өнджыка гудрасям важас. И кадным визувтө бокө. Ме думысь, мунөм йөзыслы эг удитөй ставсө шуны и та вөсна корсям накөд паныдасьөм. Быдлаын. Вемөсын. Вөтын. Кадас сорсим. Кутшөм эськө кадын олам? Часі вылам стрелкаыс абу. Тэнад выйым?..

Аекөд вуджим мөдар берегас... Чөла век на восьлалам водзö...

И век кө эськө таdz аекөд мунны, мунны... И вашкөдчыны изьватас ногөн... ю дорас пестыны бипур и виччысьны шонді чужөмсö...

— Ае, мөд асысö виччысьлам?

— Виччысьлам...

— ...Кыкөн кутыштам выльөн чужөм шондіыслысь югөръяс-сö... Миянлысь кадсö...

— Кутыштам, Любко... Сөмын асылөдзыс дыр на...

— Төвзис тай... Асылыс өдйөджык миянлань воас...

— Гашкө...

—...Ае, видзөдлы-видзөдлы! Асья енэжсö поткөдіс зарни югөр!

...Кианым топыда кутам шонді югөрсö!..

Е. Вит час асыв вөлі. Чеччи, медем тшөтш кутыштны соддзын медводдза шонді югөрсö. Шондіыс садьмөма жö, но талун сійө ку пытшкын, муртса төдчыштö. Видза олан, выль лун! Ме тэнö кыла нин став ловтырнам. И юа тэнсьыд сөдз ватö, быттö аслам Вуысь либö Куысь.

Олөмад овло лун, кытчö пыран, быттö төдтөм сажйö. И тайö луныс пондас лэбны тэ весьтын нэм, и сійө лоö өртөн оз сы понда, мый кодкө ылыстчис тэ дінысь и тэ колин син на син Шондіыскөд, Пуяскөд, Юыскөд, а сы понда, мый тайö Луныслы эскан: сійө оз эновт тэнö. Некор. Сійө сөмын тэнад.

<sup>34</sup> Майттэнö (иж.) — кутшөм.

Ог тѡд, мый тэ шуан, но таво гѡгѡрвои: козынавлѡмторйис вермас воны вояс мысти выльысь. Тѡвнас меным вайисны чача — йѡрапиѡс. И кор босьтѣ сѣйѡс киам, син водзѡ сувтѣс ѡти тувсов лун: ме локтѣ школаысь, а бабѡ пукалѡ машинка сайын да вурѡ меным юбка. Сѣйѡ юбкаыслѡн рѡмыс вѡлѣ шондѣа гожся лун кодѣ (сѣрѡнджык нин тѡдмалѣ: бабѡ аслыс кулан платтѣѡ вурѡм бѡрын кольѡм матерѣялысь, вѡлѡмкѡ, вурѡма меным козинсѡ — ѡтар помыс мунѣс бабѡкѡд, а мѡдар помыс коли овны). Но тайѡ абу на ставыс. Телевизор вылын сулалѣс мырпом рѡма йѡрапи.

Сѣйѡ лунсяныыс коли комын сайѡ во, и меным бара мыгчѡны йѡрапиѡс, ыджданас и мыгѡрнас сѣтшѡмѡс жѡ, сѡмын рѡмыс мѡд. И ѡнѣ тайѡ йѡраыс сулалѡ книга джадж вылын да казѣтышт-лѡ меным важас сунѡм лунсѡ. И, дерт, бабѡѡс. А йѡра пырыс, чайта, воис бабсянѣ ышѡдѡм, мый сѣтшѡма колѣ тайѡ кадѡ и колѡ век.

**Л.** Важас рѡмпѡштанѡ моз видзѡдѣгѡн выльысь и выльысь гѡгѡрвоан став донаторсѡ и мусасѡ. Тшѡтш ѡнѣ кадсѡ бѡрѡ листала... Ог помнит нин, но тѡда: могѡн пыри керкаас Филько пернайѣ дорѡ. Керкаыс пемыд. И весиг чайтсис, мый некод абу. Ѳдзѡсас котшкѡдыштѣ, мед кодкѡ кывлысяс. Недыр мысти Филько пернайѣлѡн бабыс, Усьта (сылы сѣк вѡлѣ ѡкмысдас вит арѡс), шыѡдчис. Сѣйѡ мыйлакѡ эз юасѣ, кодѣ пырис, мый вѡсна, а мудзѡм гѡлѡсѡн, весиг бѡрдѡмсорѡн, шуис: «Мудзи, мудзи овнысѡ. Дзѣбѡй нин менѡ. Мудзи...» Ме повзи. Збыльысь. И сѡмын тайѡ здукас верми бѡр петны керкасыыс...

Мортис олѣс пѡшти нѣм. И дѡнзис олѡмсыыс. Эз нин радлы сылы. И тѣрмасис пышйыны... Мукѡдыс мыйлакѡ чужѡны и оз овны ѡтик лун...

Усьта бабыслѡн гѡлѡсыс дыр на быттѣѡ кыйѡдѣс менѡ. И кор сѣйѡ пыжѡн вуджис мѡдлапѡлас — чужѡмыс югѣялѣс нюмѡн. И тайѡс сѡкыд вунѡдны. Сылѡн вуджѡмыс — ловсѡ мездѡм...

Ѳнѣ ог гѡгѡрво, мыйла казѣтыла сѣйѡс. Ѳд сѡмын некымын лун олѡмам сѣйѡс тѡдлѣ. Но тайѡ некымын луныс колѣс и меным, и сылы. Гашкѡ. И чайта, олѡмыд мед кѡ абу кузѣ, но кужан кѡ радлыны, тыртны мѡвпѡн сылысь сѡлѡмсѡ — тайѡ и эм шу-дыс. А олан дзонѣ нѣм, и олѡмас нин асѣтѡ бѡрдѡдан, и сынѡдыс мустѡм — лолыд висѣѡ. Му вылас ми волам гѡсѣтитны. И колѡ став шоныдсѡ ѡктыны сѣсѣ, мед мѡдлапѡлас вуджѡм бѡрын мѡв-пыштны: «А таладорас лѡсыд! И мед эскѡ бара на артмас вуджлыны сѣтчѡ!»

Усьта баблѡн чужѡмыс вѡлѣ тырѡма нюмѡн. Пыжѡн вуджигас... Выльысь воис-ѡ таладорас?... Волас-ѡ?

Видзѡда ѡшиням. Ар. Гылалѡ шондѣ рѡма кор. И чѡвлун. Гашкѡ, Усьта бабыс лоис чѡвлунѡн?... Ѳд мудзѡма вѡлѣ ставсыыс, мудзѡма... Ог понды, му вылѡ вольсассѣѡм корсѡ моз, вѡрѡшитны лѡнълунсѡ. Мед лолыс шойччѡ...

**Е.** И мян сиктын чѡв. Ставѡн на узѣѡны. Водз-водз асыв. Ѳшинѣѡ видзѡдлѣ да эг аддзы рѣа струбасѡ<sup>35</sup>. Кор нѡ сѣйѡс бы-рѡдѡмаѡсѣ? Дыр эг волы гортѡ, да сы мында вежсѣѡма сиктаным.

---

<sup>35</sup> Рѣа струба (уд.) — журавль.

Риа струба... Ыджыд лэбач тэ мян сикт шöрын вöлн. Челядь-дырйи ми васö новлывлм нин чепта струбаясысь. Но пывсянö да, киськасьны да новлывлм васö риа юкмöсысь. Казытыла: медводдза лым вывтi вöсьлала вала, бöр локтигас нин кок туям

таяла, мед не торкны лым эшкынсö. Мичсö. Кодкö öд сэтшöма пелькöдöма сиктным-öс войбыд. Югзьöдöма. Но муыс сыв, и няйт да лым сора кок туй коли, да вала уна-ысь ветлöм бöрын пуксис няйт туй. Лун-тырнас лымйыс сылас, еджыд эшкыныс сьöдасяс, мисьтöм лöб. Но и тайö гажтöм серпасыыс корсян рад-лун. Бара пуяс гору-лын, кöнкö, эрдаммис корйыс, петала да бедыторйөн вöрöдышта найöс, ляскысьöмаöсь нин öта-мöд бердас эськö да, шонтысьöны, дасьтысьöмаöсь тöвйыны. А пуяс вылысь тёпалö ва, югыд, сöстöм, вöсни вожъястi визувтöны войтьяс, и тöвру пöлялöмысь гылалöны му вылö. Еджыд лым чиръяс пöрöны войтьясö.



А риа юкмöсьяс пыдди сиктын лоины чепта струбаяс, а сэсся и мотора ичöt струбаяс...

Юкмöсö чепня лэдзигөн риа юкмöслөн юрыс вöли качлö вылö-вылö. Быттö мян пöляс вöчлисны татшöм струбасö сы понда, мед ми казялм: öтар помыс кö кöповтö олöмыслысь джудждасö (ва йирсö), мöдар помыс сэккостi тöдлö вылнасö. И тайö риа юкмöслөн кыв — олöм йывсьыс. Чайта, зэв бур кыв. Тадзи кö эськö кывбурын тшöкыдджыка артмас...

**Л.** Олöмыс збыльысь корсюрö юкмöсөн кажитчö. И джудждасö огö тöдмалöй. Сöмын вермам вежöрнаным судзöдчыны и донъявны сийöс ас ногөн... Со мян Гамын выйым жö Як бурня. Ваыс сэн чöскыдсьыс-чöскыд. Сöстöм. И ме дзöлянам думайтi — кымын унджык васö сэсь юа, сымын лолöй лоас сöдзсьыс-сöдз. И ваыскöд тшöкыда вашкöдчи, сёрнитi та йылысь. И чайта, сийö кылис менö. Вояс мысти. И ме ола öнi, мед радейтны йöзсö, отсавны налы, корсьны вочакывъяс. Сöстöм лолөн. Сöдз кывйөн.

**Е.** Письмötö лыдди, да збыль быттö бурняысь лэптöм чöсмунысь ва гулькнитi-юи, и мыськовтiс сийö морöс пытшкöсöс, весиг сьöлöмöдз воис сылөн кöдзыд визöбыс. А ме талун гортын, дзоридзьяс киськалi, посни розаясöс — косьмöмаöсь да, босьтi ваысь да пуктi пу дозмукö. Мед сэнi сулалыштасны. Найö и косьмöманас мичаöсь тай — кольöма дзоридз мыгöрныс, мед и ловныс лэбöма ылö.

Кадыс оз инмы косьмöм дзоридзлы, сийö вуджöма нин мöд олöмö. Мыйöнкö на и мича, но сьöлöм оз нин чукöстчы сылы.



А мортыс, коді козыналіс тайё розаяссё, вошис олёмсыым — ру пытшкысь петалис, ру пытшкё суніс. Овлё өмөй тадзи?..— мортыскөд весиг эг удит кыв вежны, сійё весиг эз юав нимөс... Но кысь менам киё колины розаяс сылөн мунём бёрын?.. Пуксысь шонді рёма розаяс — вөсни чальяс... төдтөм мортсаян козин. Нэм кежлө.

Л. Корсюрё он удит мортыскөд кыв вежны, но мыйлакө сійё тэн кольё донаён. И тайё донаторйыс со лолад, кызди ыпъялө... Кывлін, Юрий Вэлла кувсьома... Кывбурьяссё сылысь войёдзыс лыдди, и став войвыв муыс син водзам петкөдчыліс... и ышмысь турөбнас, и көдзыд зэрнас. А талун тайё мортыс абу. Сійё колис гижөдьясас. И сёрниным сыхкөд помасьлытөм. Лыддышт сылысь кывбурсё, лыддышт...

**«Ты берег пөлөн ми  
Некытчө тэрмасьтөг  
Мөдөдчам...**

**Ты сайын ми моз жö  
Кörьяс көрпиянкөд  
Вөрзясны...**

**Ылысса вөр сайын,  
Гораа годзөмөн,  
Юсь ассыс гозпөвсö  
Чуксалас-корас...**

**Ми чөв олам».**

*Комиöгіс Евгений Валериан.*

И мен гажтөм лои гижөдсö лыддьöм бёрын. Вай олыштам чöла. Тан кывйыс оз ков. Нöшта видзöдлам төдса ты вылас... А юясыс! Арся визулыс аскөдыс нуö каднымөс. Тшöтш видзöдыштам, кызди войлө зонка-төвруыс да зильö пуясыслы козынавны уна рёма платтьö...

А ми олыштам чöла, ньöжйö кытшовтам берегсö... А юыс пеляным шöпкөдас выль олөм. Чайта, шудаөс. А важ Юсö век кутам видзны пыдын... лов джумйын. Но тайё юыс матын лоас. Дзонь олөм... Кора кывзыштны чöвлунсö... Сійö сибөдас миянөс морөс бердас, и кага моз бөрддзылам, бөрддзылам... И көнкө аскиас пым синва пыддиным ю бокас Кодкө кисьтас лөз синма чветьяс, еджыд катшасиньяс... А ми сылысь нимсö огö төдмалöй... И нинөмла... А öнi чöла олыштам...

Е. Кывлі. Неважөн на öд лыддим тэкөд сылысь гижөдьяссö «Север» журналысь — матушка Людмилакөд сёрни «Этот совершенный мир: О тебе и обо мне». Быттьö менсым мөвпьясöс лыддьöма — сідзи гижöма кывбурьяссö. Вай ас кежысь казгыштам миянлы öтпырйö төдса и төдтөм мортсö.

А кызди меным колö öнi төла луныс... Кыдзи көсья, мед төвзыысис да нюкляліс пуяссö — личкыліс муөдз, а öшиньясöс — чар-чар восьталіс да керкаö пырис олөмыс ыджыд төлөн. А ме эськө — шызьöма — понді пöдавны öшиньяс, а сэссия видзöдны бушковлысь ыджыдалөмсö. Но медьёна колö, мед öнi некод эз

сёрнит. Мед йёзыс чөв олісны асланыс дойяс йылысь — ме моз жё видзёдісны өшинё да чуймалісны төв нырлы. Сөмын ыджыд төв вермас ланьтөдлыны шызьом йёзөс, кодлөн оломныс — му пыр и ва пыр мунөм.

Л. Аддза төла лунтө... Төв нырсьыс кыла дойөн тырөм гөлөсьяс. И өні ыста ассиянь, ловсьым, мелі майлысь ловшысө. Муна туйөд, шоныд төлыс окалө чужөмөс льөм чветьясөн. Со өд кызди дзоридзалө льөмйыс! И другысь енэжсьыс кыла юсьясөс... И чайтсьө, гөгөрбок ставыс еджыд... сөстөмсьыс-сөстөм... Абу көдзыд. Слабог, төлыс вольсалис нин туйсө тулыслы... И мен колө өні, мед чветьясыс окалісны чужөмөс, и синваөс... мен окота дырджык видзөдны паськыд енэжас и аддзыны юсьясөс... Дерг, тайө луныс помасяс. И мөдысь татшөмыс оз ло. Но лолам койыштөм югыдыс быдмас, нөшта на паськалас, тыртас сьёлөмөс дзонь шөндіөн. И өтчыд сылысь торпыригьяссө разөда йёзыслы. Дзик доналөмсө. Бурсө мычча. А өні окота осьлавны дырсьыс-дыр... Нинөм йылысь думайттөг. Тувсовъя асывнас нимкодьясьөмөн.

Е. Тулыс. Кутшөма сійө вөлі кужө шымыртны ловтө. Кутшөм сійө овлө чөскыд көра медводдза тувсов луньясө, и он төд, кызди пөткөдны асьтө тувсов ывланас. Осьты ловтө, өд бөрыннас сэсся некор тайө оз ло.

А өтпыр... тайө вөлі тулысын... кылі топ өткаөн ачымөс му вылас. Дзик өтнам. Сулала кодзула енэж улын — вөсни турун идз, и быд төлыштөм меным инмө. А енэжыс отасьыс-ота, кодзулөн гылалө киам. А радлуныс абу, юөмаөсь радлунос пыдөсөдз, войт абу кольөмаөсь. И өні меным абу ни колян, ни локтан кадыс. И дойыс пытшкөсам абу, ме — турун идз. Гашкө, сэки тадзи и вөлі колө, мед венны сьөкыдсө.

А енэжас видзөді да, казялі ылысь-ылысь өтка кодзув — сійө вөлі ставысь бокын, но мыйөнкө кужис чукөстны менө: аслас көсийөмнас овны?... Сійө видзөдіс синмам, и сөмын. И нинөм сэсся эз ков. Сійө кужис висьтавыны медқолана кывъяссө өні: овны, овны, овны...

Тайө рытсыньыс коли уна-уна во. И збыль, ставыс ладмис оломам. А кодзулыс воши. И некор сэсся ме сійөс эг аддзыв енэжсьыс. А гашкө, өйыліс өти рыт кежлө — мед меным выльысь козьнавны олом.

Л. Кодзулыс оз вош. Сійө өні мукөдыслы аслас югыдөн писькөдчө лолас, мед ладмөдны-бурмөдны оломсө. Талун то бара выльысь листала важ альбомөс... сы мында фото, сы мында казгытлом... Енмө, мада Енмө... и шензя өні — сөмын тайө альбомас синмасьла мен дона йөзкөд. И то... керка... тайө керка дортыс важөн бурняысь<sup>36</sup> бидонөн кыскалі ва. Бурнясянь туйыс гортөдз вөлі дженьыд, но менам сійө артмис кузьөн. То өтикөд, то мөдкөд удитла вашкөдчыны. А өні мөвпнам сөмын вола тайө кадас, и верстьө мортөн нин муна тайө важ керка увті... и гөгөрвоа өд, мый керкасьыс оз пет нюмъялысь Вадько вокөй.

<sup>36</sup> Бурня (иж.) — ва труба.



Туй вылысь ог паныдав тётя Оляёс, кодкөд сэтшөм-сэтшөм дыр варовитлім. Став йывсыс и нинөм йылысь... öні накөд йитöдын думайта туй йылысь. Коркө олöмыс сетіс миянлы кад накөд мунны орччөн, корсюрö паныдасыны... а сэсса оровтіс ставсö. Но чайтсьö — туйыс коли. И найö, коді абуйсь, öні во-лывлöны миян дорö еджыд гулюөн. Корсюрö öшинь дораным пуксьылöны. Корсюрö лэбыштöны орччөн...

Альбомс листалігөн окота лои звöнитлыны Вадимлы, и бабелы, и уналы-уналы... И телепон номеръяссö эськö аддзи, и звöниті ыджыд эскöмөн кывны налысь гөлөссö, и сьölөмöй ёвкнитліс эскöмсыс, и йирмөг босьтіс... Но чöвлун... И повзи чöвлунсыс... и гөгөрвои — думыштöм эскöмöй мен шудсö эз вай. Весьшөрö, и ёнджыка на лолös пыдыртіс... Но мый туйыс выйым — век на чайта... Талун гижі ставлы письмö. Шоныдös. Дженьыдös. Кузыыс оз артмы. Восьті öшиньös. Öшинь дорас пукті гижöдь-ясös. Арся шондіыс чусмöм югөрнас койыштіс югыдөн письмö-ясös. Сійö гөгөрвоис менö: воласны еджыд гулюясыд...

Туйыс век кольö... Сöмын эн пов сэті тувчавны...

**Е.** Да, мунысылы туйыс век вossьö. Колö сöмын аслад туйöд ветлөддыны. Неважөн пыраліс миянö Маиса да висьталіс: «Сикт помас талун разьöны важ керка. А ме мөді могөн помö. Керка весьтасас вои, и кодкө быттö чукöстөмөн чукöстіс кежавны рöбитысьяс дорö. Матыстчи, көлуйсö петкөдалöмаось: важ шкапъяс, улөсьяс, быдкутшöм шыльö-мыльöссö, паськөм. А бокинджык, лым пиас, еджыд вылын сьöd пöv тыдалö. Думайта, мый тайö татшöмыс вермас лоны? Келі лымъяс, нюжөдчи пöv-йысла. Бергөді, и көдзыд ваён менö киськовтіс быдөн: ме вылö видзөдö ачыс Матерь Богородица.

— Мый нö öбразсö лэбөдöмныд?— скöрысь юалі рöбөттшей-ыслысь.

— Босьт, колö кө...— горөдісны воча.

И ме, важ öбразсö морös бердö топöдöмөн, мөдөдчи. Корис öд, корис... асыв-сянь корис, эг сэті на и көсйы мунны, а... то öд кутшöм выныс Ен мамыдлөн. Öні сі-йö ме дорын».

Маисалөн тайö висьтыс коли овны меö.



**Л.** Ен мамыд тэн осьтас уна пölös öшинь. И муыввса, и енэжыввса. Удит кывны да гөгөрвоны сійös. Лолад пуктöма Ен мам дорас туйсö... А ме то талун бара муна Изьва ю бокті. Гөгөрбок изьяс... Водзын — катшасинъяс. И сынöдсö окота юны, сэтшöм сöstöм сійö! Но другысь мөвпнам лэби Печора ю дорö. Сэн татшöм жö ыджыд изьяс... А юыс паськыдсыс-паськыд. А сы мында берегас и ю вылас еджыд каляыс... Чайтсьö, мый

найö меысь ыджыдджыкось. Наысь весиг повзылан... Печора дорын вöлі во сайын. Вадорас песті бипур. Тан эз вöv чöвлуныс. Чöвлуныс вöлі сöмын меын. И таысь позис дикмыны. Но тöдтöм ань матыстчис ме дорам. Кытысь сійö воис? Öнöдз на ог тöд. Но бур тöдса моз дыркодь меным висьтасис олöм йывсьыс, зэв шогалис, мый öнiя кадыс сьöкыд и гортас весиг няньыс абу. Нывбабаыс бөрдіс. И сöмын сэки чöвлуныс вошис меысь. И Печора юлön сьölöмнас дыркодь сёрниті аныскöд. И кор сійö нюмьёвтис меным, кор видзöдласас югнитіс эскöм — вичкосянь кылі жыннiяны шы... И казялі — тайö нывбабаыслы козыналі ю! Дзик Печора кодь!..

А бипурсö быттö пестылі аныслы... и кор кусіс сійö и колины сöмын öгыръясыс — миян сёрнилön колясыс... бөр берегöд муні... Мед паныдавны выль лун, и кывны выль жыннiяны шы...

**Е.** Козьнавны ю! Сэтшöм бур пöдарок. Тэнад тайö козиныд казгыштис öти гождя лун. Гожöм. Жар. Ми верöскöд мунам Елабугаті. Корсям керкасö, көні овліс Цветаева. Ог аддзöй. Мунам кладбище вылö, и кысь миянлы сюрас сылön гуыс?— майшасям. Но сöмын пырам кладбищеас, сэнi и эм. И медьёна чуймöдö — гу вылас озйыс!.. И пыр жö юрö вартö Мариналön кывйыс: Кладбищенской земляники вкуснее и слаще и нет... Воöма, гөрä öшалö. Олыштам чöv. Дона дзоридз эг вайö. Сöмын локтігөн туй дорысь чеги иван-чай, некымынös — миян войвывса дзоридзыс и тані, вölöмкö, быдмö и нинöмön оз торъяв. Мед лоö Мариналы месянь татшöм дзоридз, войвывса нывкасянь — воййив. И кор öнi аддза тайö дзоридзсö, нюмö петö — вот ведь, Цветаевалы! татшöм дзоридз нуи... Но Марина — ыджыд поэт, и, чайта, донъялас ас ногыс, оз сідзи, кыдзи миянлön велалöма.

**А.** Да. Сійö ыджыд поэт. И сьölöмыс сылön восьса. Ме ду-мысь, иван-чайыс сылы аслыспölös шань козин. Коми мортсянь. И та йылысь, чайта, Марина эськö гижис кывбур...

Письмötö лыддьöм бöрын матыстчи öшинь дорам. И сывъялі кабалаысь вöчöм гөрä розаясös. Ме найös уна во видза аскöдым. Найö оз сьödöдны, оз дөнзöдны...

А öтчыд, помнита, кодкö юалис, мыйла ме сэтшöма найös радейта. Сöмын гусьön шöпкöдышти — тайö Паметь. И нимсö сылысь некод оз тöд. Тайö куим розаыс мен сетöны вын... кор-сюрö мövпавны, радлыны букаш лунлы... Со и вочакывйыс. И сэсса нинöм татчö содтыны.

...Куим роза дзоридзалö öшинь дорам. Гашкö, тайö шуд?.. А гашкö, ме пöръяла ачымös?

**Е.** Некор он тöд, мый вермас вайны козин. Кодлыкö тайö розаясыс — сöмын кабала, а тэныд — радейтöм йылысь юөр.

А ме петі вала, пелысьö войбыд бөрдöма, кисьтöма синвасö — векныд гөрä корсö — трубаö. И ме лэптi пелысь синва сора васö и дивуйтчи: кутшöм мича... Норасьöма пуыс важ трубалы — ар йылысь сьылöма шог сьылан. Кылі тайö сьыланкывсö и нимкодзяси, öд сэтчö олöмсö ылькнитöма.

Важ трубаыс велалöма пелысь дөрö. Нэмсö нин öтлаынösь,

и тайо синваис лэччо струба соддзо быд ар, но коло виччы-сьыштны неуна, и пелысь нюммунас — чим горд туся розйон ыпнитас. И став синваис сылон порас радлуно. Важ струба тайо каддырсо медъёна радейто, кор съоктасъыс пелысь лэзас юрсо сылань да лоло матын-матын. И пемыд ваас пондас тыдавыны пелысьлон съоломыс. Татшомыс овлё вонас сомьын отпыр, и ваислы сэтшом окота окавлыны сийос, но ставыс тайо од сомьын вуджор, и сэтшом ылын збыльсьыс, мый некор и некыз он судз.

Кутшом джуджыд струбаис! Кодйыломаясь тай корко бур йозыс. Но кодко на и сы дорё пелысь садитны думыштома, гашко, водзвыв аддзома художник синмон тайо арся, уна ромон серодом серпассо, кони ыджыдало пурпур да парча. Абу сомьын юкмос кодйома да пу садитома мортыс, но и съоломсо татчо пуктома: мед корко кодлонко сонас вирыс пымавлас.

А. Ок и мича пелысьыс! Быд тусьын ловто сотыштана кыв. Таысь вирыд збыль пымавлё... Пымавлё и сыысь, мый тшоқыджыка и тшоқыджыка ме мамекод абу восьса. И сийо тшотш...

Корко, зэв важон нин, менам воли турунвиж рома дневник. Сэтчо гижали и бабелысь казетыломъяссо, и ассым думъяссо... и ставсо-ставсо... Но отчид маме воли лыддьома сэтысь съоломос. И мыйлакё ясыда помнита сылысь пинясьомсо, помнита, кызди лоло дойсьыс бордис да термасис вошны му вывсьыс... Эг гогорво сылысь скораломсо. Но пачас сюяли пес и турунвиж рома дневникос соти сен... турунвиж видзодласос вундалис ыпнитом биыс... Та бoryн сэсса дневнико нином эг пасйивлы. Ставсо зили видзны паметям. А талун казетыла дневникос, и думайта да, сэки од позис дзебны сийос шы полэсам, важ сундукас, сийос некод оз восьтывлы. Они эсько гижом оломос выль пов донъяли... Помнита оти лист бокусь мисьтом почеркнам гижом казетылом, маме мен сийос висьтавліс: «...Ванько вокто чужтом водзын вотали пемыдгорд вор керка (Илья дядьыд сен сотчыліс). Дядьыд сен сулало. Миянто торйоддо ю. Но выйым пос. Но сийо сэтшом лекиник, сись. Иллылы горза: «Вуджод, вуджод, мися, мено!» А сийо шпыньмуніс да пырис керкаас... А вуджодис ко модар берегас... Пола думыштны, мый вермис эсько лоны вокидкод либо мекод...»

Илья дядьос эг тодлы. Сомьын фотоысь аддзыли. Бур морт волома, уджач. Но туйыс му вылас — дженьыд. Сийо вуджис модлаполас... Но видзо матыс йозлысь оломсо, волю вотто, мед весиг кыв шутог отсавны, мездыны. Илья дядьолы шуа ыджыд аттьо, мый дорйис и мамеос, и вокос. Сийо видзис и мено. Од мамтог оломой эсько дзик мод ногон артмис.

Мамекод абу восьса. Тадз велахсьома нин. Но миянос йито помасьыгтом радейтом...

Е. Мамъяс козыналісны миянлы олом. Чужанин. Да ношта сы мында буртор. И юнымос. Нэмъяс пыр визувтысь юнымос.

Ме ог тод, коди кодйылома ю сертассо, коди тырттома сийос лоз ванас, коди сетлома юислы ним... ме ог тод. Но сийо ставсо вочома сиди, кызди коло, медем ме отпыр аддзи ю визувтомсьыс ачымос, мед ме совми, тайо ю вылас видзодиг, мед ме и ылын

олігөн кылі сылысь ыджыд вынсö да кужи радлыны сылы моз — быд юлы. Тайö юыс велöдіс менö радейтны.

Л. Радейтöм, радейтöм... Та йылысь и миян бöрын мөвпавны-сёрнитны кутасны. А дзик тайö здукас мен колö öти бушков февральысь! Мен колö лымйыс! Мен колö, мед бушколыс визувтас чужöмам шуда синваён. Мен окота төвся туйсö кок улам кывны! И паныдавны öти мортöс, коді мөймуся февральнас, дикей пурга дырйи, мыччис мен öтик вижовгöрд мандарин. Прöста. Кыв шутöг. И асьсö сёлöмам колис. И вошис феврялс...

Быд лун öшиням асывнас видзöдла, ыджыд эскöмөн виччыся сійö мортсö... но син водзам сöмын вежласьö вогөгöрся кадыс. А воас кө февральыс, кызди бара-й лолавны? Енмөй, шöпкö-дышт тайö мортаныслы пеляс ме йылысь. Ме сылы ог көйы лоны нöдкывйөн. Дзик осьса...

Кöсья... мед бушколыс чужöмам визувтас шуда синваён. Мед ывлаас лоас рöмьд... И ми паныдасям. И мед некод сэсса оз вош. И вижовгöрд мандариныс пöнарөн моз югзьöдас туйнымöс. А войыс гусьöник мед лэбас сьöд бобулөн... миян бöрся...

Е. Ставыс на лоас! И февраль, и мырпом рöма мандарин... А сійö мортыс, гашкö, и оз.

Ме виччысьлі жö, но весышöрö. Найö бөр оз локны. Зэв öд-йö вуджöны мöд туй вылö. А тэ осьлав водзö. Тэнад эм аслад ордым. Аслад ю. И олөм.

Талун войбыд зэрис. И асывбыд. Тэ он тöд, кытысь корсьны радлун — көть öти тусь?

Синмöс куни и пондi лов-вежöрысь корсьны югыд серпас, и мыйлакö вои Палэй баблөн керка йöрас. Йөр бокас вöлі быдмö сэтöр куст. А куст саяс öградасьыс öти рейка чуктöма. И ми Олякöд тайö öшиньöдыс коркö петім, Оля шуис: «А ме век таті ветлöдла. Весытасджык лоö». Дас кымын метра и колö кытшовтны, а чой ветлöдлö аслас туйöд. Тайö лунсянныс ме, гашкö, и пондi корсьны ассым туй, мед сійö вöлі сöмын менам. Аттьö, Оля. Чуйдöдöмысь аттьö. Тэнсьыд туйтö мунöм бöрын пондi выль ног вежöртны олөмсö. «Менам тшöтш лоö аслам туй»,— шуи сэки. Чайта, аддзи ме сійöс сöмын уна-уна во мысти. Но ог вермы нуöдны сэтi чойöс, сійö öнi ветлöдлö нин енэжтi.

Оля, тэ мыйла корсин каны сэтчö меддженныд туйсö? Тэ век корсин меддженныд туй.

Сёрнитлывла аслам рöдвужöкöд тадзи. Но найö чöv олöны. Ыджыд чöвлун шымыртöма му-васö. Мыйта чöвлуныс Вашка вылын — юны и юны сійöс помтöг да казетывны Палэйöс, Нинаöс, Сашкöös, Оляös и ставнысö, кодъяс колисны миянлы ас пыддиныс чöвлун.

Л. Ми дона йöзлөн меддженныд туй йылысь, чайта, кутам гижны дзонь олөм, кузь туй...

Öнi горзöмөн шöпкöда, быд кыв бöрын горöдан пас сувтöдöмөн шöпкöда енэжыслы, мед көть öти юсь петкöдчылас да корас аскöдыс менö, окота енэжсö киам кутлыны — выль лов шыөн лолыштны. Окота арсö öти лунөн овны и оськавны го-

жөмө... Абу! Сюрны сэтшөм кадө, көн чөвлуныс корсьö бур мортлысь гөлөссö и көнi быд здук арся кодь зарни. Овлö-ö та-дзи? Либö тайöс думыштам сöмын вежöраным?..

А төдан, мөд олөмас лэбачөн ме лоа. И шудсö бордсьым кылас сийö, кодi öнi оз куж тайöс вöчны. И таысь лоас шудасьыс-шуда. Сийö пуксяс ю дорö, кывзыштас валъяслысь сёрни, лэбачлысь чукöстөм, öктас берегсьыс посни из — измөм синваös...

...А öнi ме сулала берег дорас и шöпкөдөмөн горза енэжас — кора юсьöс, чуксала сийös... И другысь кыла шы! Бергöдча вижөдөм ар вылас и аддза Вадим вокös, Микул Öндрейös, Свето чоес, Парасся бабeс, Иван дядьös... Найö ставөн шамыртöны менö и быдөн меö кольö содзтыр кöйдыс мында чöвлун, содзтыр радлун. И юсьясөн кыпöдчöны енэжас. Пым синвай чужöмтiö шорөн визувтö... и ме сöмын талун найös ставнысö лэдза сьölөмсьым... Ыджыд радейтöмөн на дорö...

...Видзöдлы-видзöдлы, кыdzi юсьясыс мичаа лэбöны, ю веркösд...

Аддзысьлытöдз...

## Коймөд юкөн

*Е.* Аддзысьлытöдз, Люба. Мыйта тэын олөмыс... радейтöмыс... шудыс... Тэнад гижöдьясысь кыла олөмыслысь аслыспölös горсö, шыалöмсö, и став сьökыдыс и лөкыс вешйö ме дорысь, и шань төвру малыштылö лолös... тувсов шоньд төвру. Ми тэкöд пондам виччысьны выль тулыс, шöпкөдны аслыным: «...ми гыяс тэкöдыд, лөнъ гыяс... ми енэж тэкöдыд, ми енэж... ми сюрс кымын тулыс, Люба... ми видз весьтын лэбалысь джыджъяс, ми төврусö суöдысь сьылан...»<sup>37</sup>

*Л.* Ми ог öтпыр на суödöй төврусö. И сы мында на тулыс аддзылам!

Локтi ю дорö. Пестi бипур, а сэсся пукси ыджыд из вылö, зепсьым кыски кабала да ручка. И пасийи ва вылын ворсысь шондiсö, и енэжас горзысь калясö... Сьölөм веркөсам югъялис шондi, а пытшкөссö — кокалис каля. Да сэтшөм горша! И та-дзи уна тулыс нин... Но! Öнi синийи лымув дзоридзьяс... öктi, öктi найös! быттö кösийи чукöртны ставсö, быттö бөръяысь четвтьяссö аддзи. А сэсся лэдзи ваас, и визулыс пышйöдiс найös водзö, водзö... Енэжас горзысь еджыд каляыс вötöдчис на бөрся. И регыдөн лоис чутөн. Колис ю вылас сöмын ышмысь шондiыс. Каля и менам олөмысь воши. И кор лоам пуксис чöвлун, сöмын сэки верми гажтөм видзöдласös кольны енэжас. И сöмын сэки мен воссис туй... шудлань. Кора тэнö тшöтш восьлавны тайö туйöдыс! Шудыс эм! Сылөн öдзöсыс вossылö тулысын! И со, со тулысыс мян син водзын!

*Е.* А менам лэбачьяс көнкö саридз дорынös на. И пуяслөн гарйыс пыдiын. И сöмын туй пölөн сярвидзö еджыд балльөн

---

<sup>37</sup> Райнер Мария Рильке. Тайö строкасыс Марина Цветаевалы сiём кывбурысь: «Волны, Марина, мы волны... Небо, Марина, мы небо... Мы тысячи вёсен, Марина... Мы жаворонки над полями. Мы песня, догнавшая ветер...»



берба — тулыслон медводдза сибодчом. Кутшом ыджыд вын колон ортсыянь, мед садмис мейн тулыс. Став няйтнас, лон синма ва гураннас да ыркыд ывланас. Да гож водзын сьодасьом кор пиысь мыччесьом шель турун йывнас.

А гашкн, колон кодсянкн сомьн оти шоньд кыв? Мед садмис тулыс!

Но му вылас талун сэтшом лонь. Некод мой некон абу?..



Л. Ставыс лоас бур. Тайон лоньсон кодкн вештас бокн. А онн тэньд сийон колон. И тэ сылы тшотш. Некор эн пов кольны отнасон. Век кодикн миян борся видзодчон... Кывзышт... то ю дорас кылон гармошка шы. Кодн нон сэтшом нора ворсон? Мыйла бара калясыс горзонь? Кывзыштам... Шыыс бырис... Но син водзам петкодчылис Васьон дядьлон чужомыс. Енмой! Тайон шытолыв, буракн, век на новлодлон сылысь сылансон. Оз тырмы ю дорас Васьон дядьон. Голосыс сылон. Сы моз татшом бура некод эз сыывывлы. И оз кут сыывны... Мыйла Васьон дядьон волис?.. Кутшом юорон? Корсюрон вочакывйыс оз сюр. И думайта, тэ нинном татчон он шу. Проста лунысь-лун гогорвоа: му вылас мортыв абу отнас, весиг сэки, кор сийон чайтон, мый отнас. Таын мыйкн эм. Радейтом?

**Е. Тодан, кутшом судзсытом овлон синмыдлы енэжыс?**

**Тодан, кутшом джуджыд овлон лолыдлы юкмосыс?**

**Тодан, кутшом овмодтом овлон аслад жон сьолмомьд?..**

**Кор тэ отнад... бордан... радейтом йылысь.**

Л. Эн борд. Ставыс коляс. Мый сэсся вочан? Радейтомыд казгыломон порас. А сэсся, гашкн, и медвына кывбурон... Торыгья енэжсон помнитан? Сы мында кодзув гылалис... Адзылин кон эскон. Шемосмин. Дзырыдсыс-дзырыдьяссон окти лоам... А сэсся меон кодкн быттьокон тувкнитис, и котортн туйодыс, од сэнн, конкн ылас, менон виччысис морт. Шаньсыс-шань. Кор паныдалн сийос — ловсым став югыдыс мыйлакн чусмис. Вывтн зумышон мортыд кажитчис. Воньн эскон чусмом кодзுவьяссон сылы, чайтн, босьтас кон, выль енэж чужас. Миянлы. Но сийон модарон ставсон вочис. Мунис тайон рытсыс. А гашкн, и олмсым. Мый кодзுவьясыскон лоис? Хм... Разодн ставсон и тодсалы, и тодтомлы. Сьолмомой чорзис. А совйыс сы мында сэн... Адзылин кон эскон. Шемосмин.

То бара гылалонь кодзувьяс. Сомьн окты...

И тодан, эг повзы. Босьтн отикос, и модос... Бурлань ставывс вежсяс. Лоам чужас енэж.

Е. ...Лоам чужас ю... Вашкаам ваыс косьмон од, и пыжъяслы колон кывтны да катны тыдавтмон юод, воывылыны корьяскон и вотам.



Тэ он тѳд, кысь меным гумовтны Вашкаам васѳ, мед пыжъяс-ыс важ моз кывтисны да катисны тыдалана юѳд?.. А ме чѳв олѳ да видзѳдѳ эскѳ, кыдзи ѳтияс тшукѳны берегѳ, а мѳдъяс надзѳ-ник ылыстчѳны.

Быд здукѳ юыс вежсьѳ. И миян гижѳд — тайѳ ю. Джуджыд али ляпкыд лоѳ юным?.. Ляпкыд кѳ — пыжъяс оз лыбны.

Л. Юыс кѳнкѳ джуджыд, кѳнкѳ и ляпкыд. А пыжаыд век тѳдас, кытѳ кывтны. Ляпкыдас пыжыд веськалас — йѳрмас. Но весиг ляпкыдѳнас колѳ сибдывны, мед гѳгѳрвоны джуджыдасѳ. И мѳдарѳ. Тадз и гижѳданым. То ѳнѳ йѳрми ѳткалун юѳ. Кыдзи пета сзтысь? Сѳмын ѳти казтылѳм мездылѳ менѳ: паськыд видз вылын шоныд тѳврукѳд ворсѳдчѳны и катшасинъяс, и купальничаяс. И татысь век кыла Енсѳ, кор лѳнь пуксьылѳ лолам...

А тайѳ видз вылас паныдалѳ коркѳ мортѳс. Чветъяс пиас сѳйѳ мен кажитчис аслыспѳлѳсѳн. Либѳ сѳмын тайѳ юрам думыштѳм вѳлѳ? И кор паныдаси ськѳд, сѳйѳ мыччис мен дзѳляник ыргѳн крест. Радѳйла тшѳтш лои дзѳридзьяс пѳвстас аслыспѳлѳсѳн. И босьтѳ крестиксѳ олѳмам. Кѳть и пернатѳм ачым. А мортыс мунѳс. Вошис.

Кокныдык крестыс сзтшѳм сьѳкыдѳн вѳлѳма. Весиг сынѳдыс эз ло меным, бырис. И эг гѳгѳрво, мыйла тадзи... А сзсся вѳталѳ, мый крестикыс усис юѳ, дыркодь васьыс корси сѳйѳс, но юыс син водзам пемдѳс, и вѳтыс орис...

Асывнас вои уна рѳма видз вылас, мед паныдавыны мортсѳ и бѳр сетны пернасѳ. Но некодѳ, некодѳ сэн эз вѳв! Но и мѳд олѳм эг вермы сьѳлѳмам кольны! А сзсся кылѳ жыннѳян шы...

И пыртѳ крестиксѳ важ вичкоѳ... Гашкѳ, кодкѳлѳн кевмѳмыс отсалас на аддзыны олан визьсѳ мортыслы, кодѳ ѳтчыд эз вермы нуны ассъыс олѳмсѳ и воштысис четвѳъяса виддзас!

Кор ѳткалуныс пуксьылѳ бокам... вола мѳвпнам Енмѳн кольѳм лѳняс... и корсьѳрѳ весиг чайтсьѳ, мый дзѳридзьяс пыддиыс — кокныдык ыргѳн пернаяс... и тѳвруыс вѳрѳдѳ найѳс. Кылан шысѳ? И шѳндѳ улас найѳ уна рѳмаѳсь...

И ме век на кыйѳда вошѳм мортсѳ эскѳмѳн, мый петкѳдла туйсѳ вичколань... сзнѳ кевмысьѳны сы понда. Ме кыла...

Е. Жыннѳян шына-нас тырис гѳгѳрыс. И ми, йѳзыс, сетчим тайѳ горыслы, и став шогнымѳс ѳнѳ тоньгѳдѳс жыннѳяныс, и ловнымѳс весалѳс. Лолѳй ойдѳс радлунѳн. Некутшѳм кутѳд, потш ни йѳр абѳ тайѳ радейтѳмыслы, эм пытшкѳс вын, ставсѳ нѳбальсѳ-нуысь.

«Таво ваыс берегысь берегѳ», — шуас



кодкө нывбабаяс пиысь сёрнитигөн. А ме вомгорулын выльысь шуа: берегысь берегө... Кутшөм бур, кор эмось берегыас, и вассө кутёны найө сиктө ылькнитөмысь, өд нөшта неуна кө и, ой-додас сиктнымөс. А көн нө мян пыжным? Мян пыж абу. Йөр дораным дыр кад чөж куйліс важ пыж. Косьмөма лолыс вөлі ва вылө петаवлытөг.

Юыс вермас овны пыжтөг. А пыжыс юыстөг — оз. Но куим нывбабалы кутшөм мог пыжөдзыс. Сідзи и сісьмис.

**Л.** Юыс ваяс выль пыжъяс. А важ пыжъясыс ас йывсьыныс казтыштёны ю вылас валъялысь дзоляник сисьясөн. Көсьян кутыштны — ки увсьыд пышйёны! А ме со кути! И сійө би чырыс югзёдыштіс меным тодса керкалань туй. Восьлалі, восьлалі... И таркөдчи сійө керка өдзөсас, көні важөн нин менө некод оз виччысь... Сійө мортыс оло өтнасөн. Век на. И вайи сисьсө, мед разөдны и сылысь, и ассьым өткалун. Сиськыс өзйис здук, мөд... А сэсся мортыс пөльыштіс сылы лолас и тшынас бергалыштіс өткалуныс, быттьө радпырысь йөктыштіс, а сэсся гажтөма разаліс керкаас. Мортыд крепыда сывйыштіс менө... и ме гөгөрвои: сылы өтка оломас вйим и радейтөмыс, и лэбачлөн выліті-выліті лэбөмыс... и ставыс-ставыс.

Веший сы бокысь, а горшам сатшкысис пакулаа тшай, лолөй тыртөммис. Көть из сэтчө шыбит, көть мый коль... но сөмын йөла кывлысяс... Сисьсө коли мортанөйлы. Ог и төд, мый вөсна. Но сылөн биыс, другысь өзтас кө сійө, оз нин ло сэтшөм дзирыдөн, кыдзи ю вылас...

Ю веркөсыс бара тыри өзйысь сисьясөн... ог нин кутав найөс, мед бергаласны визулас, мед...

А ме ог вермы лэдзны думыштөм шудөс сэтчө... Од оломас ставыс мунө сьөрсён-бөрсён. И чайта, оз нин казтывлы менө өтка олысь мортыд. Но төдан, кор сійө сиптіс ме бөрын өдзөссө... и кор сы мында нин туй восьлалі... век на кажитчө, эг вуджлы тагессө<sup>38</sup> сылөн керкаысь... Но мөдысь сисьсө оз өзтыны...

**Е.** Кывйыд вайис син водзө эз сисьясөн өзйысь ю, а катшасинъясысь кыём юркытшьяса ю. Оломтіыд визувтас уна ва, но сьолөм гөгөртө медъёна пондас шонтыны ичөт ю, кытчө челядь-дырйи лэдзлім юркытшьяс. Ва гыяс вылын лайкъяломөн мөдөдчылісны найө визув нбылыд — кывтчөс. Да регыд и саявлісны.

Выльысь и выльысь мөвпнам вуджала тайө лунас, пөттөдз видзөда ва вывті кыалысь юркытшьяссө, синмөн колльода найөс, и юркытшьяс пыр вошөны ю чукыль сайын.

А ми, нывъяс, выльысь и выльысь котөртам катшасина видз вылө, мед окавлыны еджыд бордъя дзоридзьяссө...

А зарни шонді, рыгтя шонді сывъялө югөр соснас видзнымөс... Рыгтя лысваён мыссьөм виддзыс өзйө лыдтөм-тшөттөм би чирөн.

**Л.** Збыльысь, шуда лунсө верман овны унаысь. Мед сөмын и сьолөмад. Гусьоникөн. Но сылөн выныс ю кодь жө помасьытөм. Оні мыйлакө казтышті сійө парксө, и векныдык ордымсө, кыті воеді ыджыд из дорам. Ог төд, дыр-ө тані куйлө сійө, и

<sup>38</sup> Тагес (уд.) — өдзөс порог.

кодi эськö вайис изсö татчö? Гашкö, морт, а гашкö, дикей төв. Но сийö кужö быдмыны. И ачыс сэтшöм эзысь... Водзын ичöт-джык вöли, а öни со... верстяммöма. И кор гажтöм меным, век котöрта сы дорö. Сылөн кодзыдысь шогöй ямö сёлöмам. А гашкö, менам шогысь быдмö изйыс? Тадзи-ö?..

Таво сöмын öтчыд веськавлi из дорас. Сийö дзикöдз нитшся-лöма, и овмöдчöма сэтчö кодзувкот. Бурдöдö сийöс. Тырмö тай излөн выныс весиг кад пырыс ас пытшкас босьтны дойöс... Öни сулала из водзас, и бара кора мездыны менö. И кыла — öни изйыс чышкö паметьсьым став сёдсö... син водзын еджыд ка-бала. Мен колö сэтчö пасйыны колана кыв...

Изйыс дзикöдз нитшсялöма... но рöмыс век на эзысь... медся дона меным. Волы менам из дорö. Көть коркö. Тэн сийö олöмад сетас Вын, еджыд кабала да радейтöм.

**Е.** Еджыд кабала... А мый сэтчö пасъя, мед не торкны сылысь югыдлунсö? Гашкö, серпасала Анделöс ассым?.. Кодi век менö видзö неминуचाысь.

Син водзö воö челядьдырысь öти лун. Ми Любакöд кыкөн лэччам купайтчыны куръяö. Некод ва дорын абу. Луныс кымöра и йöшкыд<sup>39</sup>. Ми эг пырöй ваас, а сölим ва дорас сулалысь важ пыжö. И лои окота йöткысьны берег дорысь да кывтыштны пыжнас. Люба чеччылис да аддзис лыа вылысь кутшöмкö бедь-тор. Сийö миянлы и лои малльöн<sup>40</sup>. Йöткысим надзөн. Да петим ва шöрас.

А водзö мый лои, менам вежöрысь чышкöмаöсь. Ме ог тöд, кыдзи усьöмö ваас. Вежöрнам тай вошлi недыр кежлö-а. Кыдзи менö Люба кыскöма пыжас бөр — ме ог жö помнит. Но мыйлакö син водзö öни сувтö серпас: ва шöрын пыж, пыжас Люба, а ме мыйлакö видзöда бокиянь, берегсянь, но ог му вылас сулав, а му бердсьыс неуна вылынджык. А пыжас нöшта кодкö эм, еджыд паськöма. Но кодi тайö? Гашкö, анделöй да?.. Орччөн вöлöма да отсалöма Любалы мездыны менö вöйöмысь.

Любакöд восьлалам гортö. Та понда али мый и лэччылим ва дорас, медым та вывтi мунны? Но ме видзöда гөгöрсö и быттö аддза олöмсö валь синмөн: мыйкö быттö тай купальничаа видзыс эзджык татшöм вöв, öни сийö ойдöма шондiөн да став лов тырнас лолалö, и быд дзоридз — морт сяма, ловъя лов, вөрзбöд-чывтöг видзöдö ми вылö: чуймалö-ö-радлö, быттö пони<sup>41</sup> челядь юраныс кольквиж кöсынкаа сулалöны, а меным окота быдөнöс окыштны... а кымөръясыс кутшöм матынöсь — юсыас моз лэбöны да борд йывъяснас нымөн<sup>42</sup> оз веськавны миянöдз.

Көть вöйлi, а кылi ачымöс шудаөн. Но эг лысьт Любалы петкöдлыны радлунöс. Чöv-лөнъ восьлалiс менам нывъерт. Сийö вöли ёна повзбöма.

**Л.** Весиг виччысьтöм лоöмтор вермö вежны олöмтö. Дзоньнас. Кодкö повзбö таысь, кодкö шудаөн асьсö кылö. Но оз нин ло-öмторсьыс. А олöмыслөн ас пытшкын вежсьöмсьыс.

---

<sup>39</sup> Йöшкыд (уд.) — *ыркыд*.

<sup>40</sup> Маль (уд.) — *пелыс*.

<sup>41</sup> Пони (уд.) — *ичöтик, посни*.

<sup>42</sup> Нымөн (уд.) — *муртса*.

Эськө төдін кө тэ, төдін кө эськө тэ... кутшөм изъя берегө төрыт веськавлі, кок улам дзик ёсьсө найө... а ме вөлі көмтөм. А сэсся котөрті вичколань... ме бөрся тшөтш тэрмасис шондіс, эз кольчы некыз, и кутшөмкө здукин весиг чайтсис, мый вунөдөма мыйкө ме, кольөма изъя берегас, и шондіс та йылысь көсйө шөпкөдны меным. А вичкоас вои да кевмөмөн моз лыдди кывбуръяс сисьяс водзын. Изъяс йылысь. Тайө сисьясыс — кодлөнкө ловъяс, и сэсь төдтөм чужөмъяс мыччысьлісны меным. Но коли налы ме гөгөрвотөмөн. Чусмисны найө, кусісны... менө, пернатөмөс, эз кывны сисьясыс. Көть и лолөй вөсьса вөлі, сөмын биыс сэні мыйөнкө торъяліс...

**Муні ме  
ме муні  
вичкосыс  
и гортын  
унмовси  
ог и помнит  
кызди унмовси  
и вөталі  
шонді рөма  
паськөма мортөс  
сйө лолам  
мыйлакө  
вышивайтіс  
крестикөн**

**Е.** Нетшкысьö лолыд. Корö пыртчыны. Лолö крест пукталөмыс — сйө тэнö бласлөвитөм. Ачыд он пернапасав ловтө да. Но Енмыс абу зновтөма тэнö. Видзö. И чужанінтө, юнас и енэжнас, дзоридза видзьяснас и ягьяснас.

«Ай лов ю» — река души моего отца. Ай лов юөн лоө меным Мозын. Мам лов юөн — Вашка. Тайө кык юыс йитчöны менам лолын, оз вензыны некор — Вашка век усьö Мозынö.

Коркө өтпыр өти төдсалысь юалі: «Нина, тэ көні чужин да быдмин?» — «Ме, — шуө, — Архангельскöй областын». — «А кутшөм ю сэні тиян визувтө?» — водзö юася сылысь. Мөвпалыштис мыйдыракө, а сэсся шуис: «А ме вунөді... кызди нимыс сылөн и вөлі...» Татшөм вочакыв ме некызди эг виччысь. Тадз оз вермы кө лоны-а... Быд морт төдө, көні сйө быдмис. Али оз? Ю нимыс сйө өд морт ним кодъ жö, сиктад тай төдан быдөнөс нимөн, а ю да сикт ним, мен кажитчö, найө вежаөсь — важ олөмыс найөс мянлы козыналө, дай мыйта вежөр пыр сөдзөдчö кывйыс, мыйта йөзкөд йитчөма, мыйта шуда здук, казтылөм козыналө.

Петі Нина дорысь тыртөм лолөн. Вось-



лалі карті и сёрниті мөвпнам Ниналөн юыскөд. Нимтөм юыскөд. Сійө өд Вашка кодъ жө, көнкө, лөнь... сөстөм... да мича.

**Л.** Шөйөвоши. Мый татчө верма шуны? Юыс сылы нимтөм. А кызди сійө молитваын казтылө юсө?..

Став тайө мөвпнас локті Из улысь петысь ключ дорө. Сійө көдзыд да сөстөм. Мудзөм лолөй сөмын сы дорын ректө сьолөмам чукөрмөм сола васө. И мысся көдзыд ванас, мед некод оз казая синваөс. Васө синвасыс некод оз торйөд... Гашкө, сөмын айө. Мыйлакө сөмын сійө тайөс кужө казавны. Корсюрө думайта: өтик сьолөм джынъяс айөлөн олө бабъясөлөн мывкыдлуныс, а мөдас — дедъясөлөн вежөрыс да сибыдлуныс. А кор тайө өти морт сьолөмын — збыльысь, дивө! Öти мортын визувтө сы мында кад! Овлө-ө тадзи? Чайта, ог сорсы. Кыла тайөс айөын.

...Тан ваыс ловъя. Синва сора ванас мысся. Бара и бара...

И кыла, мый лолам тшөтш чужис из улысь кодъ ключ. И сы дорө волөны унаөн. Вемөсөн ли, вөтөн ли. Некодөс ог энөвт.

Ачым велалі котөртны мөдлаө. Сөмын сэн сөстөммыла. Кор кольччыла өтнам му вылас. И төда, мый сөмын айө казаяс сэтчө волөмөс. И сьолөмөс шонөдас аслас сьолөмын.

**Е.** Таво ветлі айөлөн чужанінас. И синванам мыськи сійөс кузяла и вомлала. Эг и чайт, мый челядьдырся став дойө ылькнитас тані синваөн. Сылі сьолөмсым сов изйыс. Лои кокни, и ме верми югыд лолөн өні сулавны кыр йылын да нимкодьясьны Мозынөн. Кызди меным колө юсө босьтны аслым. Мед сійө визувтіс орччөн Вашкакөд. Менам лов пыр. Олөмас найө өтлаасьоны. А менам олөмын — оз.

**Л.** Найө кыкнанныс вывті вынаөсь, мед өтлаасьны...

Ки пыдөсам пукалө еджыд липун. Войтөвсө разөдө. Вемөсыс абу вемөс. И ме весиг абу вемөсас. А колян во тайө кадас видзөді ылын тыдалысь лөз визь вылө. Саридз вылө! Дженъидик еджыд платтьөа котөрти ва дорас. Сьолөмам радлуныс, надеяыс кымын вөлі! И ставыс тайө олөм дорас! Саридз мында! Сэки эг чайтлы, мый во мысти еджыд липун кутас сөйны кольөм надеяөс, эскөмөс, радлунөс... Чөв ола. Виччыся гым. А сы бөрын вежсьөм. Көть кутшөмкө. Окота, мед гымыскөд воліс зэр да липуныслысь бордсө көтөдіс, и сійө некытчө нин менө эз ну. Төдан, мудзи корсьны Здуксө, кор лолөй вермө лөсявны олөмыскөд и мунны сылөн сетөм туйөд. Көні сійө Здукыс? Липуныс сөйис? Кора гым! Кора зэр! Сөмын сэк бара кыла Здуксө. И сыын саридзсө.

**Е.** Сэтшөм окота выльысь овны медчөскыд здукъяссө олөмад. Кывны енэжсө ас пытшкад, нетшкысьны, бөрдны, горзыны... А сэсся ланьтөдчыны да важ моз видзөдны ылө-ылө. И нинөм сэсся не корны олөмыслысь. Сійө өд сетіс ставсө: и дойсө, и сьолөм петөмсө, и ме вылө видзөдысь нюдз синъяссө. Сетіс и бөр босьтіс. Мыйла тадз? Коді вермас висьтавны? И кызди не йөймыны тайө кадчөжас? Кызди ловъя сьолөмылды тшөктыны: ланьт.



Выльысь и выльысь видзёда мёдлапөлө, ю вомён. Видзёда юыслы синмас: тэ кытчö, ю? А ме нö — кытчö?.. Меным некытчö муннысö. Эстчö — ог көйы. А сэнi менö оз нин виччысьны. Мыйла, юй, тэ тöдан век, кытчö визувтны? А ме талун ог и тöд.

**Тайö туйыс тэ дiнö оз вайöд.  
Тайö туйыс тэ дiнысь нуöдö.  
Ю дорö.  
Но мыйлакö и юыс —  
Тэ.**

**Л.** Тэ колян берегас. Юыс пондас визувтны водзö. Водзö? А гашкö, тэ тайö юыслы медся паськыд да джуджыд ю? А сийö бокитi визувтö... Полö лоны öти юөн.

А талун төвруыс вайис мен письмö. Сийöс лыддигөн гөгөрвои: бабөлөн чужом вывсьыс вешйис шондiыс — лолас шаракылöмөн гылалис косьмём руд кор. Арыс тайö коръясас абу. И кадыс абу. Абу... Кысь корсьны мунём шондiсö? Весиг бабөлөн радейтана еджыд хризантемаяс оз вайны сийöс выльысь. А төрыт на чветъясас коли сылы олём дорас эскём. Но кодi ме шондi водзас? А тöдан, хризантемасö нуигөн жыннаныс вичкоас горөн бөрдиc. Поткөдиc и енэжсö, и мусö. И туй вылас став паныдасьысь йöзыс быттö сисьяс öзйисны. И ме на костöд тэрмаси, тэрмаси бабö дорö... Сылөн чужом вывсьыс вешйис шондiыс. Руд коръясас мөвпъяс он пасйыны нин. Бабö мунiс корсьны мöд шондi. Котөрта сы бөрся еджыд хринзантемаөн. Суа на сийöс, суа...

**Е.** Аски чужас выль шондi. И луныс восьтас югыд керкаö öдзöc. Тэ пыран сэтчö, а сэнi тэнö виччысьö бабыд. И еджыд хризентамаясыс лöны тiян ловъяс костын йитöдөн, и на пыр тэ сетан эстчö кольём шондiыслысь чветсö. Кутшём мелiөн сийö вермö лоны — колян кадсьыс быйкнитём шондiыс... Сэтшöма колö эськö сийöс аддзывны.

Эскан, комын во коли школа помалём бöрын, и вот письмö воис Интернет пыр öти мортсянь. Сыкöд велöдчылiм öтлаын. Но некор эг аддзысьлöй сэсся... Сийö оз тöд, а сылөн козынавтём козиныс быд лун кытшовтö ме гөгөр.

Кор ми велöдчим дасöд классын, урок дырйи меным воис тайö мортсянныс записка: «Волы берег дорö, ме тэныд көсья козынавны шондi». Сылы эг вочавидз. Ланьтöдчи. А сыөн козынавтём шондiыс öнөдз на сетö югөр — Кыв пырыс.

**Л.** Тайö козин. Збыльысь. Видз тайö югöрсö.

А ме öнi компьютерöc кусöда. Дерт, кузь сёрниным эз на помассы. И оз помассы. Кодi лыддяс гижöднымöc — сылөн мянкöд чужас сёрни. А гашкö, и вензьём. Ми та йылысь огö тöдмалöй. А тöдмалам кө — нюмдам. Öд тайö ставыс Ю.

Час мысти мела воас поезд. Гортö муна, гортö. Письмöясыс, кывъясыс — ставыс бöрыннас. Менö виччысьö юй... А берегас — морт. Юлын сийö век ю дорас. Мен сыкöд колö варовитыштны.



---

Юыс гижас аслас паметьö сёрнинымöс. И ме юкся тэкöд. Став-  
нас. Көркө.

Компьютерöс кусöдa. И таын нин эм выль писъмöлы пансьö-  
мыс. Сöмын ставыс бöрыннас.



Ме муна  
выль сёрнила юкöд  
ю пырыс —  
морткöд  
и тэ ветлы  
ю дорад  
юлын сэнi  
век кодiкö эм

*Снимокъяс вылын: 1. Сэбысь ю. 2. Медводгза лым Важгортын.  
3. Мохчаын качай. 4. Куръя. Öтка пыж. 5. Джуджыг Чой. 6. Струба.  
7. Кöдж грезд. Пятнича Параскева часöвняын. 8. Ытва. 9. Пыжъяс  
виччысьöны мортöс. 10. Ву. 11. Чужан керка.*

Снимокъясыс: **Ирина Калинина**лөн (2, 4, 5, 6, 7, 8, 9, 10);  
**Любовь Ануфриева**лөн (11), **Денис Витязев**лөн (1, 3).



## Бөлбанö — пьеса гижны

Вөтөн тэон йойталі, вөтөн тэ ордö волі, вөтөн тэнö казь-тыла...

Өні, гожся көрсö апаліг, весиг оз нин быттьö и эскыссы, мый ставыс тайö коркö збыльысь вöлі... Öти аддзысьлöм вевттьысьö мөдөн, мөд — коймөдөн... Но кымын кадыс ылыстчö, мыйлакö сымын ясыдджыкöсь лооны торъя йөзлөн нюм-вашыс, син-чужöмыс, кыв-висьтасьöмыс...

Тайö вöлі кольöмвоя тöлын. Сійö кадас, кор Виль вося гажыс эз на дзикöдз йиджтысь сук көдзыдас, но анча да ыж ку пась пыр кыліс нин сълөн веж коз көра маласьöмыс.

Мыйöн воськовтан мамуклысь керка порогсö, тiянос вочаласны ыджыд рөмпöштан костö, важ ногыс кө, трюмоö, сюялöм открытка-снимокъяс. На пöвстысь син улад дзик пыр и шыбитчас öти, көні некымын морт сулалö еджыд лым-бус пиын туплясьöм бöрти.

Он кө матыстчы да синтö читкыртöмөн бура дыр видзöд фотосö, нинöм вылö он тöдмав, кодлөн сэн синъясыс дзирдалöны муртса тыдыштысь чужöмас. Быдөн йөз пельпом вылысь пöрччöдöм пася, пель-ныр-вомнысьö гартлöма-көртавлöма кодi



мыйöн кужöма да кодi мый аддзöма, йөзлысь босьтлöм гын сапöгабсь жö ставныс и. Ставныс эськö, да абу на дзик ставныс. Кодкö сэтөн öтнас торъялö мукöдсьыс — турунвиж маличаа, еджыд тöбöка. Позьö чайтны, мый кодкö татчöсса, «местной».

А тайö ми! Гижысьяс, журналистьяс Петрунь—Инта туй

костын: Елена Козлова, Анжелика Елфимова, Андрей Попов, Александр Суворов да Павел Симпелев.

Вот и тешыс тайо пастасьомнас вөлі! Вот и сюрліс кочкавтөдз сералөмыд! Отиос ватной гачо куимон төрөдоны, модлысь кык сы мындаон коксо сапогас суйоны, коймөдлөн пасыс некыдзи оз кизясь да, отар-модарсяныс йотконы-топодоны. Места вылодз кор воим да порчим ас вылысь став йоз колуйнымос, кык ыджыд ноб тыр лоис — джын сиктсо порччөдсьома, вөлөм.

Тадзи ертъясой, ота-мөдныскөд сёрнитчытөг ни, асьныс төдлытөг ни, портисны менам олөмын медся-медся-медся медыджыд көсиймөс, коді оліс-виччысис асьыс кадсо морос пельосын, виччысис ылі ичөтдырсянь на.

Эг, ме эг көсйи ичөтдырсянь нин воөдчывны Петруньөдз. Да и кутшөм Петрунь вермас лоны сэки, кор мусерпас вывсьыс төді сомын сэтшөм оланінтьяс, кодъясос пасйөмаось вөлі «Заря» теплоходын ошалысь расписаниеас. (Өнөдз на сэксянь помнита, кыдзи шензьөдісны мича да төдтөм нимъяснас Керчомъя да Сольвычегодск). Ме сэки, донаяс, став ичөтик сьолөмсянь көсйи лэбзывны вертолётон.

Со ме, мөд ли коймөд классын велөдчысь, школасянь гортө чой горув надзөник вөсылала, паськыд синъясон видзөда дзик сикт помас лөзалысь вөрланьыс. Юрын лөсьөдла, кодъяс эськө, мыйсяма йоз олөны тайо төдтөм ыджыда-ичөта пуяс саяс. Пуксьывны кө вертолётө да жбырнитлыны веськыда на дорө сук вөрас!..

Оз өд весьшөрө, вөлөм, шуны: «Тэ сомын ёна көсйи, и Енмыс коркө да аддзас позянлун збыльмөдны тэнсьыд көсийөмтө!»

Петруньөдз воөдчылөм йылысь мөвпыс, мед көть и эз дзик ичөтдырсянь, но важөнокдь жө нин ыззьөдіс-дэльөдіс сьолөмөс. Отчыд өд весиг мөдөдчылі нин, но джын туяс — Интасянь Уса юыс менө потшис. Сэки, гоз-мөд во сайын, юыд ёна водз босьтчис шонтыны асьыс еджыд пася мышкусө читкыралысь шонді улас. Усаыд ёна водз пондіс шпыньявны сылысь мышсө вомөналысь войтыр вылө, кодъяс зумыш чужөмөн тэрмасисны эштөдны асьыныс төвся могъяс Ыджыд муын.

Юаланнөд кө, мыйла буретш Петрунь, кор Коми муаным гөгөр и сытөг лыдтөм-тшөттөм аслыспөлөс сиктыс, вочавидзнысө өд весиг ог сяммы. Но кор гижысь котырын сёрни панім кытчөкө ылөджык ветлөм йылысь да кор вомысь муртса удитіс петны Петрунь нимыс, мыйлакө ставныс, коді вөлі, дзик пыр и ыззисны. Быттөкө нэмсө виччысьомаось, кор найос кодкө Петруняд босьтас да сой пөлөдыс нуөдас.

Весиг өд сьөмыд туй вылад быттө кыськө ачыс усис и. Юркаrsa администрацияө дасьтім проект (регыдъя кадө проекттөгыд весиг юр пыдөстө он кут лысьтны гыжйыштны), көні бурөн-ладон гөгөрвоөдім, мыйла миянлы, гижысьяслы, бытөн колө ветлыны Петруньөдз да мыйон сэтчө волөмысь карса чинаяслы лоас адөй бур.

Медыджыд мытшөднас мыйлакө лоис медічөтторыс — туйө петан кад. Ме кындзи ставныс окотитісны вуджны Уса юсө пыжөн да шуисны мөдөдчыны арнас. А ме көсйи став туйсө шуркнитны буран вылын да мырдөн сёрниті төв йылысь. Но ставныслы өд паныд он мун. Арнас кө и арнас... Дасьті карса

администрацияӱ колана кабалаяс да... И тані ме гӱгӱрвои, мый Енмыс бытӱн вӱчас ставсӱ, кыдзи колӱ.

Эг эскӱ тӱдӱмӱн, но ӱти лун кезлӱ сӱрми кабалаястӱ сетӱм-над. И миян гижыс-журналистяслӱн ичӱтик котырным эз удит пырӱдчыны сійӱ кадколастас, кӱнӱ сьӱмсӱ юклӱсны «арын кытчӱкӱ мӱдӱдчысыясыдлы», да та вӱсна миянӱс вуджӱдӱсны «тӱвсяяс» лыдас.

А меным сійӱ и колӱ! Ёртясӱй, дерт, пыксыйштісны, видлісны ӱвсьӱдны менӱ тӱвся бушкала да кӱдзыд серпасясӱн. Но ме эг сетчы. Мӱдарӱ на, мый выныс зӱли ышӱдны найӱс. Шуалі: быд гижыс вермӱ воӱдчыны туту йылас аслас лыддысыйс дорӱ шоньд гожӱмын, но сӱмын Енсянь гижыс локтӱ на ордӱ веж мороз дырйи. Эг чайт ме сӱки, мый татшӱм ӱтко-дьялӱмыс збыльыс инасяс. Бытӱӱ тунавсьӱма трачкакылыс кӱдзыдьястӱ.

Петрунь сиктса администрацияӱн веськӱдлыс Елена Анатольевна Артеевакӱд телепон пыр сизим ли кӱкъямысӱдыс сӱрнитӱгӱн, сійӱ меным шуӱ, мыйла пӱ тӱ ӱтарӱ и мӱдарӱ кутанныд бураньяс вылын тутьявны. Таланьӱсӱ пӱ ӱд позьӱ и вертолӱтӱн локны.

Вертолӱтӱн?!! Менам «ичӱтдырся» вертолӱтӱн?!!

Ме пӱ тӱяны билеттӱ весиг кольӱда...

Интаӱ воим водз-водз асывнас, кор карыс и йӱзыс вӱлі узӱны на. Ывлаас петкӱдліс 30 градус кӱдзыд, но шоньд поезд бӱрад чайтсис став ветымыныс. Эз кӱ бур ёртьясным — Интаса шӱр библиотекаса аньяс — паныдавны да шонтыны миянӱс пӱсь тшайӱн, эскӱ Кай нима зонкалӱн моз ӱти лолыштӱмӱн кынмис морӱсаным сьӱлӱмным.

ӱшым-декабр тӱлысыс муртса на заводитчис, а интаса войтыр виччысисны нин Виль во: туй бокын сулалӱсны мичмӱдӱм козьяс, уна рӱма би югӱрьясӱн сывкйисны лавка ӱшиньяс. Бытӱӱ мoidӱ веськалім — тӱрыт на Сыктывкарын некод весигтӱ эз мӱвпав вильвояс гаж йывсыйс, а со талун часисӱ бытӱӱ тӱлыс виль водзлань вештӱмаӱс! Дивӱ дай сӱмын!





Аэропортö, кыдзи и колö, воим часөн водзджык, но ни кык, ни куим час мысти вертолёт миян некөн эз тыдав. Кадыс шлывгис, кöдзыдыс чорзис, и сöмын татчöс пуклöсьяссö шонтысь йöзыс мый вынсьыныс быттö кöсийсны суöдны, пановтны, ылö бөрö колыны тайö кадсö, тайö кöдзыдсö, а гашкö, и тайö восö.

А мый ыджда вöлöма вертолётыд матысянныс! А пытшкö-сыс кутшöм! Öшинь дорас стен пöлöныс кузь пуклöсьяс, шöрыс куш, кöть пет да йöкты. Сэтчö, вöлөм, быдпöлөс нуанторсö



пукталöны. Дзик юр весьтад — кöрт сутугаяс, дзик сё кока кöрт черань кодь, увлань юрөн öшöдчöма.

Регыдөн вертолётлысь «рушкусö» пöтöлököдзыс тыртисны быдсяма кöрöб-нопъяснас, сэсся и миянöс меститисны. Кыпöдчы-тöдз быдöнлы тшöктисны ремениясьны, но ветымын гөгөр мортись сöмын ми, буракö, и домасим. Татчöс лэбалысьыс сöмын вашъялис — миян пö усьöмсыйным асланым местной страховка.

Чайтi, та мында йöзнад да эта мында кöлуй-нопнад вертолёт-ыд оз кыпöдчы. А сийö сöмын неуна и ружтыштис, кöнкö, сöмын мода вылас, мед ми коддьöмсö повзьöдны, сэсся зэв на и кокныдыка качис-лэбзис. Овлö на пö и сiдз, мый йöзыс вертолётас öта-мöд выланыс кусыньтöмөн куйлöны да и сэк на пö кöрт лэбачыд енгаг моз енэжланьыс уськöдчö.

Петруньлөн карса гöсьтьяслы мыччана «нянь-солыс» вöли аслыспöлөс — ёнтысь мороз да пурт кодь лэчыд тöv ныр. Муртса удитiм кутшöмкö пельöсö нопъяснымöс тэчны-колыны, дзик пыр нуисны школаö. Татшöм чукырöсь паськöмнас, татшöм шыльöдтöм юрсинас, татшöм гөгөрвотöм синъяснас, öти кывйөн кö, татшöм лöсьöдчытöмнас ме ни верстыö, ни посни лыддысьысь дорö эг на петавлы. Öни тырвыйö гөгөрвоа роч шусьöгтö: с корабля — на бал...

Бөръя кадас, мövпыштны кö, пöшти став киноас петкöдлöны «гожйöдчысь» сиктöс. Кор «веж туруныд коскöдз, гөгөр дзори-дзалö», сэки джын сиктыс чери кыйö, мöд джынйыс либö ва-

ын уялө, либө чиклетон журьялө да сідз водзө. Ёнія некутшөм телесериалыс он аддзы (дум вылө тай мыйлакө нинөм эз во-а) лымийон тырөм керкаяс. Быттё тöлыс сиктас оз и волы, быттё сиктасяссö ни лым пиас гудйисьöмыс, ни пашлякөн лыйсьыс веж морозыс, ни кок йывсьыд уськөдана омлялыс турөбыс оз шымыртлы. Чайтсьö, мый талунъя режиссёр-сценаристьяс уджалöны «В деревне зимы нет!» шусьöг серти, сідзи жö, кыдзи водзті ставон олісны «В СССР секса нет!» подув вылын.

Кутшөм эськө серпас юрö коли, волім кө ми Петруньö гожөм шөрнас? Дерт, мыйкө этатшөмсяма (лыддыны колö небыд, мавтана гөлөсөн): ок кутшөм тані лөсьыд, ок кутшөм тані гажа, ок кутшөм тані кыпыд, майбырöй дай олөм петруньсалы Енмыс вичмөдöма. Неуна тай номйöсьджык быттё, но номйыд пö öд виртö вежö — кымын унджык юö, сымын ёнджыка томман.

Но ывла вылас петкөдліс комын градус көдзыд, та понда и «окайтны» неуна мөдногаджык ковмис.

Ыджыд öшиньяс класс-калиторьясö йиджтысьöм көдзыдыслөн лолыс оз-оз, да öнөдз на мукөддырйиыс йирмөгавлө пытшкөсöс. Ме, колö шуны, ачым эг оналыс классьясын жö төдöмлунөс босьт, но öд тайö вöлі кызьöд нэм помын на! А талун, кор сідз шусяна нано-технологияс сөвмөдөм могыс миян странаын лэптöма быдса кар, сэтчөс аския нано-технологьяссö быдтöны «көдзöдчан» шкапын, мед, көнкö, оз рушмыны да оз шоммыны кадыс водз.



Ог гөгөрво, сьöкыд али мый лэптыны виль школа Петрунь сиктын?! Менам Маджаын тай нö со вель öдйö кыпөдісны, көть велөдчысыс куим морт и кольöма нин. Мыйлакө тай нö сюри позянлуныс. И со кымын виль школа лөсталö республика пасьта, кымын ныв-зонка дженьыд соска платтё-дөрöма апалöны шуда челядьдыр!

Кытчö сöмын асланыс синва-дойон абу шыасьлөмаöсь петруньсаяс! Ыджыд чинаяс медводз 1998, сэсся 2002, та бөрти



2006 воясö кöсйисьлöмaöсь нин лэптыны виль школатö, да кыдзи комияс шулöны: кöсйисны пö, да несйисны.

Садикныс пö из гидня жö. Быд пельöсö сувтöдалöм бисянь шонтысян пачыд, артыштны кö тövбыднад, виль стрöйба лэптöм дорсьыд сьöмсö унджык каттьö.

Клубас, кытчö рытгоров сиктсаясöс вöли чукöстöмaöсь миянöс видзöдны-кывзыштны, öдвa сорөн убöлиті паськöмöс пельпом вылысь шыбитлыны. Оз кö эськö вöли ков бур йöз водзас сёрнитны, гашкö, ёнджыка на туджси.

Клубыс сиктас, позьö шуны, «виль». Сыöдз тані вöлöма вузасянін. Кор Петруньын клубыс сотчöма, том да верстьö гажöдчылöмaöсь школаас, а сэсся со тайö юр сюяніныс сюрöма. Öнi веськыдладорса öдзöссö кö восьтан, веськалан клубö, а шуйгала-сö кö — библиотекаö.



Став пыраланінсьыс небöг видзан кудйын вöли медся шоныд. Ог тöд, мый понда. Татчöс «олысьясыс» шонтöны али волысь-кежалысьясыс. Лыддысьысьыд пö, майбыр, тырмö: и верстьö, и посни. Коми книгаыд тай этшаджык-а. Ми, гижысьяс, аскöд неуна вайыштім татшöм небöгсö, мед мам кывйөн вöдитчысь лыдсö сиктын содтыштны.

Тадзи, öтилаö да мöдлаö пыралігөн, чайтсис, мый сиктыс «гожся». Эм тай важ керкаясад тövся да гожся юкөнъяс: öтарас тövйöны, мöдарас — гожйöны. И тані быттьö сідз жö. Школаын, клубын, детсадйын — позьö сöмын гожйыны. Со музейö пыралім да сэтысь петöм бöрын ывлавывса комын градусыд шоныдөн чужöм бокъяснымöс малаліс на. А öд он на быд сиктысь аддзы, мед музейыд вöли кык судтаа торъя керкаын. Дерт, важ кöлуй-дозмукнад да войнаса ветеранъяслөн снимокъяснад öнi некодöс нин ёна он шензьöд-ылöд. Но быдөнöс, чайта да, кыскасны буретш музейын кывлöм сиктса вöвлöмторъяс, налы, кодi кöсйö, эскö, а кодi оз — ассьыс лöсьöдалö.

Ачыс Петруньыс водзті шусьылöма Бöлбанөн. Сиктыслы подувсö пуктöмaöсь 1871 воö куим вок — Симон, Петыр да

Иван Хозяиновъяс, кодъяс воёмаось татчö Изъва вожса Мохча-сянь да овмöдчöмаось буретш көр видзысь яранъяслөн мир туй шöрас. Стöчджыка кө, сийö местаас, көні найö вöлөм юрбитöны асланыс Ен-Бёлбанлы.

1879 воын йöзöс медводдза пасъялөм серти, Бёлбанын вöлө-ма нин ветымын кык мужичöй да комын öкмыс нывбаба, ставыс дас квайт овмöс. Но некод сикт йывсьыс таöдз абу на кывлöма ни абу на тöдлöма. Дяк Ардальон Колчин медводдзаөн нимöдöма сикттö. Преосвященнöй архиепископ Иоанникий тшöк-тöма самөедъяслысь юрбитанінтö весавны да лэптыны сы местаö православнöй вичко, а дяктö пöртны выль вичкоса попö. Сикттö нимтöмаось Петруньöн, буретш Пётр Семёнович Хозяинов нимöн, медводдза овмöдчысьяслөн батъ нимöн. Ним вежö-мыс вöлöма 1914 воын сиктса скод вылын.

Кодсюрöяс мöд ног висьталöны, кызди Петруньыд Петруньöн лоöма. Бытьö пö дяк Ардальон Колчиныд Иоан Креститель моза сиктсаяссö öти лунö Усаын пыртöма Исус Крестос эскöмö. Дякыд гажа юрнад дзик став мужичöйыслы сэки, Петыр лунад, Петыр ним и сетöма.

Сиктас збыльысь вöлöма веж Георгий Победоносцылы сийм вичко, сийö еджыд мичнас да вылын юрнас ылöдз тыдавлöма Уса ю кузя паракодөн кывтысь-катысьяслы, паськыда нимавлöма став Войвылас. Комынöд воясö вичкосö, кызди и мукöд вежаинъяссö, тупкисны. Бура дыр сэні, бара жö, кызди и унала-ын, клуб восьтисны да зымгисны-йöктисны-артистасисны. 2000 воын вичко-клубыд тшынйыв кайис. Сиктсаяс сэсся шуисны вöвлөм вичко местаас часöвня кыпöдны. Часöвняыс сулалö нин, кольöма пытшкөссö лöсьöдны-пелькөдны.

А сэккості сиктсаяс юрбитöны нейджыд важ жырйын. Ми и сэтчö пыралім бöрсö туйö петтöдз. Лöсялім öшым 19 лунö, Николай Угодник лунö, коді пö медся ёна видзö туйвывсаяссö. Тані бара жö вомсьыд ру петіс, но кодзыдсö бытьö он кыв, шоныд вöлі эскöмсьыс, мый ставыс лоас бур. И миян, туйö мöдöдчысьяслөн, и татчö кольччысьясылөн...

\* \* \*

Воясөн мөвпалім, тöлысьясөн лöсьöдчим, лун-войясөн воөдчим да гоз-мöд часөн и петкөдчим. И татшöмыс тшöкыда овлö гижысьылөн олöмас. Петруняд миянысь водз пемдö да, бытьö водз и войыс воö, водз узьнытö водтöдö.

Узьöм бöртиным дасьöсь нин вöлі бөр туйö петны, но кодзыдыс, небзьöм пыдди, сöмын чорзис. Тундра вуджöм йылысь ковмис вунöдны. Сиктсаяс шуисны, мый ми йизям кык километр мысти нин, а Интаöдзыд бураннад колö мунны куим час да джын.

Заводитчис кузь лун,— тöдтöминад немуйтігад и төвся луныд чайтсьö кузьсьыс-кузьөн. Ывла вылас петан — изöймитан, кутшöмкö культурнöй «инö» пыран — турдан. Но, кыз шуласны, некод кө тэнö оз гажöд, аслыд асьтö колö гажöдны.

Сиктлысь юждөм туйсö öтарö-мöдарö талялыштöм бöрын ми ставөн чукöртчим öти жырйö, пуксим топыд кытшö да босьтчим гижны... пьеса. Öг тöд, кызди менам ёртъясöй, но

---

ме ни пьесатӧ таӧдз некор эг гижлы, ни эг чайтлы, мый по-  
зыӧ, вӧлӧм, гижны ӧтвылысь на.

Збылысь кӧ сералӧмсьыд мортыд томмӧ, ми Петруньын тайӧ куим луннас шыбитім быдӧн ар кызь кымын! Пьесаыд-лысь сюрӧссӧ кызди сӧмын эг бергӧдлӧй-песлалӧй, кызди сійӧ сӧмын миян юрын ачыс эз быглась-веглась. Быдӧнлы быдсяма рольыс вичмыліс: и вежӧгтана гӧтыр-верӧс, и пӧрыся-тома любовник-любовница, и мустӧм-муса тьӧща, и начальник-начальница. Пьеса серти ставӧн пӧттӧдз ӧтлаасьлім-юксьывлім, окасьлім-пинясьлім, тышкасьлім-кутчысьлім и весиг (!) виалім ӧта-мӧднымӧс да бӧр ловзьӧдалім.

Сы мыйта олӧм ми удитім овны тайӧ тӧвся лунас. Бӧрыннас артыштім да, ӧти пьеса пыдди позыӧ лӧсьӧдны-гижны быдса куимӧс!

Ува-аванад эг и тӧдлӧй, кызди рыт воны кутіс. А рытнас миянӧс гӧсти виччысисны бур ӧртъяс. Тайӧ семьясьыс ме медводз тӧдмасы ыджыд пиыскӧд, Андрейкӧд, коді гоз-мӧд во сайын, Сыктывкарса университет помалӧм бӧрти, муніс учителявны чужан сиктас. Бара жӧ карын сӧсся тӧдмасы сылӧн ичӧтджык Ефим воыскӧд. Петруньса музейын мелі да шоньыд кывъяснас мый вермӧмсьыс шонтіс миянӧс Андрейлӧн мамыс, Павла Филиппьевна. А гортас локтім да, тӧдмасим медічӧт Иван воыскӧд да став тайӧ ыджыд сьӧлӧма котырыслӧн кӧзяин Фёдор Андреевичкӧд.

Та мында кӧр яйсӧ ме олӧм чӧжӧн эг на сёйлы. Пуӧма, пражитӧма, котлет вӧчалӧма и, но ставсӧ, ставсӧ... Позис кӧ, и пуввасӧ, кӧнкӧ, кӧр яйысь жӧ пуисны. Миян, вӧлӧм, веськавсьӧма буретш начкысян кадӧ, со и сюрліс пӧттӧдз чӧсмасьны быдсяматорнас.

Мӧд асывнас сиктса тӧлыд миян дор нин вӧлі да «Ыджыд, Шоньыд муыд» матыстчыштіс талань.

Николай Угодниклы юрбитӧм, рӧдительясӧс казътылӧм, «за здравие» да «за упокой» сисъяс сувтӧдалӧм бӧрти ми вӧлім да-сьӧсь... пасътасьны. Бӧр туйӧ петӧм могысь. А тасянь ті асьныд нин сӧсся ставсӧ тӧданныд...

**Снимокъяс вылын:** 1. Петрунь—Инта туй костын. Андрей Попов, Александр Суворов, Елена Козлова да Анжелика Елфимова. Саяс сулалӧны снегоходӧн колльӧдысьяс. 2. Интаса аэропортын. 3. Петруньын пуксьӧм бӧрын. 4. Петруньса велӧдчысьяскӧд аддзысьлӧм. 5. Сиктса клубын.

Снимокъясыс Павел Симпелевлӧн.



Иван БЕЛЫХ

## Юрөбтас-ө Весываын жыннян?

Аслам нэм чөжөн унаысь удайтчис воыны важся коми сиктьясö. Быдöнлөн на пиысь аслас чужöмбан. Көть эськö сэтчöс стрöйбаясыс кызвыннас öткодьöсь. Но век жö мыйöнкö да мыйöнкö найö торъялöны öта-мöдсьыс. Шуам, некор оз позь соравны Изьваса либö Удораса, Вылыс Эжваса либö Леткаса войтырлысь керкаяссö. Бур көзяин аслыс оланін лэптигөн пыр босьтліс тöд вылö и сійöс кытшалысь вөр-васö, и поводдясö, и ас войтырлысь олан сямсö. Миян коми сиктьяс медсясö пуксьöмаöсь ыджыд да ичöt юяслөн джуджыд нöрысьяс пöлөн, мед сэнi олысьяслы вöлі долыдджык лов выланыс, мед гөгөр ставыс тыдаліс, мед нöрыс йылын олiг-вылігөн позис бурджыка адзыны да гөгөрвоны таладор югыдсö, мывкыд мөвпъяс пестыны-бергöдлыны юрад.

Сідзи и аддза, кызди коркö, некемын сё во сайын, Мозын, Емба либö Эжва юлөн кутшöмкö джуджыд нöрыс вылö локтіс аслас верстыö пияныскöд зумыд тэчаса, паськыд тошка да сюсь синъяса, мывкыд вежöра коми мужичöй. Дыр видзöдіс гөгөр-бок, да нимкодя горöдіс пияныслы:

— Со тані и кутам овны-вывны.

А сэсся пияныскöд босьтчис пöрöдны вөр, тшупны керка-карта, вöчны выль муяс да видзьяс. Коли некемын во, и быдса ыджыд грезд кыпöдчис юлөн джуджыд нöрыс вылын. Мужичöйяс вöралісны, кыйисны чери. Нывбабаяс дöзьöритісны скöt. Öтвылысь быдтісны ид, рудзöг, шабді, сёркни. Ыджыд керка жыръяс тырины челядълөн гажа гөлöсьясөн. Зіль удж саяд найö тöдлытöг и верстяммисны, да коркö-некоркö и асьныс нин лöсьöдісны семьяяс да торйöдчисны бать-мамысь. И со уна во мысти ичötик грезд быдмис ыджыд сиктöдз.

Дерт, сійö либö мöд сиктын олысь коми войтырлөн эз ставыс лючки-ладнö мун. То омöль поводдя вöсна кутшöмкö воясö лёка воліс нянь, то этша вöлі звер-пöтка, то би чишкаліс-сотліс стрöйбаяс. И сэки сиктса олысьяс пиысь кодсюрö мунлісны корсьны шудаджык олöм Уралö да Сибырö, Волга да Кама юяс бердö. Но кызвыныс Енлы эскöмөн нöшта на зільджыка

босътчылісны уджавны ас муын. И Медыджыдыс быттьо кыліс йöзыслысь шогсьомсö, тöжд-майшасьомсö, да отсавліс венны сьöкыдлунъяс. И бөр ловзыліс сиктыс, бөр уна йöзөн тырлісны сэтчöс керкаяс, бара на челядълөн гажа гөлөсьяс юргылісны сәні. И тадзи вöлі уна-уна во чöж, кытчöдз революция да гражданскöй война, а сәссия и Сöвет власът воясö колхозъясын дыркодь олөм, Великöй Отечественнöй война да кызьöд нәмса реформаяс вужвыйөн эз вежны коми сиктъяслысь чужöмбансö.

Öнiя уна коми сикт-грездö волігөн медводз шыбитчöны синмö воймөм стенъяса, брöвъялөм öшинъяса, кильчö öдзöсьясын öшалысь сiмөм томанъяса керкаяс. Пыр гежöдджыка аддзылан татшөм сиктса уличаяс вылысь том йöзöс. Кызвыныс бедь вылö мыджсьөмөн ветлысь, чукурöсь чужöма, гажтөм да шог синъяса пöльяс да пöчьяс, кодъясöс некод нин некөн оз вичысь. Налөн быдтасъясыс важөн олöны ыджыд каръясын да öдвакö помнитöны мам кывнысö. А уна сикт пыдди, көні коркö овлісны-вывлісны йöз, талун кыпалö тшем вөр.

Кодкö вермас-ö висътавны, кымын сикт-грезд бырис Комиын бөръя дас-кызь онас? Быдын на пиысь коркö кылісны челядълөн гажа гөлөсьяс, юргис кыпид уджлөн гор, баксісны сюрукъяс, чуксасисны петукъяс. А талун коркöя короминаяс пыдди енэжлань нюзöдчöмаöсь кызъяс да пипуяс. На гөгөр быдмö петшөр да азгум. Сöмын эновтөм шойна серти, кытчö кадысь кадö волывлöны на вöвлөм олысьяслөн внук-внучкаясыс, позьö гөгөрвоны, мый тані коркö овлөмаöсь йöз. А кымын коми сикт-грезд бырас матысса кадö, көні талун муртса-муртса чусалö олөмыс?

Буретш татшөм мөвпгъяс бергалісны юрын Княжпогост районса Весыва сиктö (рочөн Весляна) коркöя волігөн. Тайö важся сиктыс Емва карсянь 80 километр сайын. Пуксьöма Весыва юлөн Емваö усянінö, паськыд мыльк вылö. Весыва юыс, чужан му туялысьяслөн висъталөм серти, 220 километр кузьта кымын, заводитчö Синдор тысянь. Дзик сиктöдзыс öнi вайöдö асфальта туй. А кутшөм мича да гажа матігөгöрсä вөр-ваыс! Еджыд ялаа пожöма ягъяс. Туруна видзъяс. Турипувъя нюръяс. И Весыва, и Емва юяс озырöсь на бур чериөн. Мөвпыштлан да, тані эськö мортыдлы и овны-вывны.

Збыллысь öд, историкъяс туялөмаöсь: Весыва гөгөр йöзыс овмөдчылөмаöсь миян эраөдз на. Медводдзаысь сиктыс казътывьсьö 1608 вояс документъясын. Сәки тані вөлöма 18 керка, на пиысь 4 керкаыс тыртөм. Сәні олысьясыс тшыгъялөм вöсна кувсьылөмаöсь. Öти керкаса көзяинöс вилөмаöсь Йöгра муын кось дырйи. 1646 воын сиктас вөлöма вежа Микöла енлы сiөм пу вичко, вичкоын служитысьяслөн 4 керка, сэтчöс крестьяналөн 4 олан да 9 тыртөм керка. Ставныс найö кутісны пустуйтны 1637—1641 воясö тшыгъялігөн, кор омöль поводдя вöсна эз чужлы няньыс. Сәки унджык олысьыс кулісны, а öти семья вуджис овны Сибырö. 1678 воын Весываын вөлöма 8 олан керка. Сәки да бöрынджык нин тані овлөмаöсь Габовъяс, Клеповъяс, Шитниковъяс, Захаровъяс, Тархановъяс, Худяковъяс, Лапшиковъяс, Яковлевъяс, Щербаковъяс. 1784 воын Весываын вөлöма нин 28 керка да 154 олысь, 1859 воын — 19 керка да 310 олысь. 1818 воын сиктас кыпöдöмаöсь кирпичысь



вежа Микөла нима вичко. 1887 воын восьтөмаось вичко школа. 1916 воын сиктас вөлөма нянь лавка, 2 ва мельнича, кузнеча. 1930 воын Весевайын уджалөмаось фельдшерско-акушерской пункт, вөр лэдзысьяслөн фельдшерской пункт, пристань, гөрд пельос, школа, потребительской общество, крестьяналы отсөг сетан комитет да милициялөн участок. XX нэм заводитчигкеж-лө тані олысьыс содөма 400 сайö мортөдз. 1926 воын Весевайын вөлөма 288 керка. Но вочасөн сиктыс кутөма йывмыны. 1970 воын Весевайын олөмаось 261 морт, а 1989 воын олысьыс чинөма 82 мортөдз. Некутшөм бур вежсьөм эз ло сиктын и бөръя некымын дас во чөжөн.

Весевао пыригөн нин шыбитчис синмө кутшөмкө аслысикас шог серпас, коді оз лөсяв татчөс гажаиныслы. Зэв уна эновтөм керка, кодъяс быттё шогсьоны, мый сәні эз лоны олысьясыс. Весиг сёлөмыд нюкыртчылө на вылө видзөдігөн. Кыпөдлөмаось тайö короминаяссö кыз керъясысь крепыд көзяинъяс, кодъяс чайтлөмаось, мый и налөн челядыс кутасны овны тані да водзö вөдитны видз-му. Но эз тай тадзисö ло. И быттё көсйöны юавны тайö «синтөм» керкаясыс быд ветлысь-мунысьлысь, кытчö нö пö вошисны миян жыръясысь олысьясыс? Со бокынджык сулалө киссьыны заводитөм скөт карта. Быдлаын тырыс важ көрт. Торйөн нин шөгөдө кирпичысь тэчлөм вежа Микөла нима вичко вылө видзөдігөн. Киссьөма дзикөдз, коньөрөй. Вичкоыс быттё көсйö шуны: пом пö кутіс воны сиктыслы. А менам син водзö мыйлакө сувтö мөд серпас, кор тайö вичкоыс уна дас во сайын на ен праздникясö вөлі тыр йөзөн. Вежон чөж муяс да видзьяс вылын нһылөм петтөдз мырсьөм, вөралөм да чери кыйөм бөрын сиктса войтыр чукөртчывлісны асланыс вичкоё кевмыны Медыджыдыслы, мед сійö отсалас быдтыны бур нянь, мед йөлаось вөліны мөсьяс, мед пармаыс козьналіс татчөс вөралысьяслы озыр прөмыс, мед эз бырлы чериыс синва кодь сөстөм Емва юын. И Енмыс өд кывліс сиктса войтырлысь кевмөмгьяссö. Сійö кадö ылөдз нималісны Емваса вөралысьяс, чери кыйысьяс, вөр пөрөдысьяс, му вөдитысьяс. Эз кольчывны мукөдысь и весывасаяс. Найö аттьөалісны таысь Енмөс, а сәсся вичко служба помасьөм бөрын бара босьтчылісны уджө. И быттё син водзö сувтöны найö, тані воддза олысьясыс. Зумыд тэчасайсь. Паськыд пельпомаось. Сөна киясайсь. Сюсь синмаось. Буретш татшөм йөзыс и сетлісны зумыд олөмсö, вөліны сиктыслы бур мыджөдөн.

Но талун найö важөн нин абу ловъяось. И сөмын Весевао пыригас орччөн паськөдчөм ыджыд шойна висьталө, мый тані коркө овлөмаось уна йөз. Сійö жö Габовъясыс, Захаровъясыс, Худяковъясыс, Яковлевъясыс, Щербаковъясыс. Быттё ачыс шойнаыс пу да көрт крестьяссö мыччөдліг ошйысьö, мый коркө вермис жö тані олөмсö, эз сет збыльмөдны татчөс олысьяслы сиктлөн водзö быдмөм-сөвмөм вылө надеясö.

Весываса улич кузя мунігөн эз унакөд удайтчы аддзысьлыны. Вөлөмкө, коркөя ыджыд сиктын өні кольөма кызь гөгөр морт. Сөмын гожөмгьяснас тані йөзаджык овлывлө. Сәки чужанінас воывлөны шойччыштны Весевайысь петлөм войтыр. На лыдын и сизимдас вит арөса Александра Павловна Захарова.

— Төвнас ола Наталья ныв ордын, Интаын, а гожөмнас



татчö воливла,— висьталіс миянлы олöма ань.— Картупель пукта. Вотча. Гортад тай век кыскö. Важсö казътыла. Öд мыйта вөр пöрöдлі Вылыс Пытырьюын, а сэсся гожöмъяснас совхозын страдуйті, куканьясöс видзи. Кöть и эз кокниа шед няньыд, муса тайö муыс. Танöсь менам вужъясöй.

Кывзі сэки олöма аньöс, а сьölöм вылын аслыспölös долыд-лун чужис. Кöть и эз вöv кокни аньлөн воддза олөм-вылөмыс, но век жö сылы сійö меддона. И оз кöсйы вежны нинөм вылö. Оліс на эськö, колöкö, тані и тövъяснас, но джынвийö эновтöм сиктад арлыда мортыдлы сьökыд бергöдчыны. Ньöжйöник вось-лаліс сійö тыртöм сиктса улича кузя, а мövпъяснас суныштліс аслас томдырся кадö.

Со татшöм кымын жö аддзысьлөм артмис менам и Весываса мöд олысь Александра Степановна Сокеринакöд. Сійö буретш картупель мудйис горт дорас. Суседкасьыс томджык. Но и та-йö аньыслы сьökыд уджыд сюрлöма жö.

— Помнита на войнaböрса тшыг нисьö пöt олөмсö,— юксис мövпъясөн сійö.— Сэсся верстямми да Пытырью посёлөкын тöдмаси зэв бур зон Евгений Сокеринкöд. Но абу кузь вölöма верöсöйлөн нэмыс. Комын сизим арöсөн кувсис. Вертолёт эськö и быдөн сиктöдзыд воліс, но врачьясыд нинөмөн эз вермыны отсавны. Куим челядьөн Евгений менö колис.

Александра Степановналы удайтчöма помавны сöмын сизим класс. Сэсся бухгалтерö велöдчöм бöрын уджалöма Княжпогост-са райпоын вузасьысьөн. Вölöма Весываса вузасян кустын ди-ректорөн. Сэсянь и пенсия вылас петöма. Сылөн Олег пиыс да Галина нылыс Сосногорскынöсь. Надежда нылыс олö да уджалö Эжваын. Ачыс Александра Степановна сиктсьыс некытчö оз кöсйы мунны. Весываын дзик öтнасөн видзö мös. Сыкöд, шуö, гажаджык пö. Йöв, рысь, нök — ставыс мöснад эм, орчча су-седъясыслы на вичмывлö. Нöшта йöрас котралö Тузик пон. Сытöг пö некыдзи жö. Век нин горт гөгöртö омöль йöзысь ви-дзö. Олöма ань быдтö картупель, морков, свеклö, öгурцы, помидор. Миян волігөн свежой öгурцыөн нин ошйысис.

— Водзын сиктным ёна ыджыд вöлі,— казътылö Александра Степановна.— Йöзыс уджалісны «Югыд лун» колхозын, бöрын-джык «Вымскöй» совхозлөн татчös отделениеын. Фермаын ви-дзисны сё кызь мös, а наысь кындзи уна кукань, вöv. Уджаліс вый вöчан завод. Асланым жö вöлі сиктсöвет, библиотека, клуб, начальной школа. А талун кeжлö нинөм эз коль. Видзьяс да пöскöтинаяс баддьөн тырöны. Клубыд эськö эм, но воссьывлö сöмын праздникяс дырйи. Лавка абу. Да и коді кутас ёнасö ньöбасьны, олöма йöз кö сиктас сöмын колисны. Тöлысьнас öтчыд Ветьюысь воливлöны вузасьны. Нöшта кежавлöны кöм-паськөм вöййыны чиганъяс. Няньтö асьным пöжалам. Синва петмөн жаль овывлö, кор аддза, кыдзи сиктса олөмыс кусö. Томъяс абуöсь. Пöрысьяс кулалöны. Кытчö нö видзöдöны чина йöз?

Кывзі Александра Степановнаös и эг аддзы сылөн юалөмъяс вылö вочакывсö. Татшöм серпасыс абу сöмын Весываын, но и Коми республикаса уна сикт-грездын. Совхозъяс киссьöм бöрын дзикöдз мöдіс кусны сэнi олөм-вылөм. Став верманаджык вой-тырыс мунісны корсьны ассьыныс шудсö ылі да маті каръясö,

войвывса мусир да биару перъян промыселъясö. Колö öд и асьтö вердны, и семьятö кызкö кутны. А сиктад оз на быдöн вермы фермеравнытö. Вывтi ыджыд смеллун да сям, вывтi ыджыд зильöм колö та могысь. А государствоыд сöмын кыв вылас ёнджыкасö отсалö. Кымын мыджöд колö венны, мыйта кабала чукöртны чиновникъяслөн кабинетъясысь, öтнас Енмыс тöдö. Со и эз кут кывны коми горыс важся коми сиктъясын. А каръясад олiгөн коми йöзыд öдйö рочмöны да вунöдöны мам кывнысö. Вайöда öти лыдпас. Бөръя кык гижасьöм коласын коми войтырлөн лыдыс миян республикаын чинiс ветымынысь унджык сюрс морт былö.

И век жö нимкодъ лои меным паныдасьны ылi Весевайын кык авъя коми ань Александра Павловна Захаровакöд да Александра Степановна Сокеринакöд. Кыкнаннысö топöдö талунъя олöм вöсна тöжд-майшасьöм. Найö меным петкöдчисны дзик чойяс кодöн. И öтиыс, и мöдыс гöгрöс чужöмаöсь, варов сёр-ниаöсь, мелi синъясаöсь. Весиг чукуръясыс оз нин сэтшöм ёна пöрысьтны олöма йöзöс. Стöч татшöм аньяс вылас öд и водзтi кутчысьлис да и öнi кутчысьö коми сиктыс. И векджык татшöм сиктъясас волiгөн ме паныдасьланывбабаяскöд. Мужичöйясыд тай татшöм арлыдöдзыд оз ёна овны, водзджык мунöны мöдаръюгыдö. Налы, тыдалö, олöмас унджык сюрлывлö. А нывбабайд, горт гөгөр ноксысьсыд да челядь быдтысьыд, сяммö видзны асьсö.

Майшасьöмөн, но водзö кывзi Александра Степановналысь шог висьтсö. И бара эз ло долыд сьölöм вылын. Сийö гожöмнас, кор волi Весевайö, танi колльöдисны бөръя туйö войнаса ветеран Елена Степановна Габоваöс. Коркöя биа воясас тайö аньыс вöлöма шоперөн, кыскалöма аслас машинаөн снаряд-патрон. Öтчид сылөн көрт вöлыс веськалöма немечлөн самолётсянь чöвтöм бомба улö. Елена Габова контузитчöма. Дойыс, дерт, кылис нэм чöжыс. И кужлис öмöй фронт былö мунiгөн нывбаба-шопер думыштлыны, мый коркö анылөн чужан сиктыс воас быранвыйöдз. Мöдарö. Сэки сийö мөвпавлис сы йылысь, кутшöм кыпыд да гажа лоас Весевайын олöмыс война бöрын, кор пасьвартасны фашистъясöс. Та вöсна и эз жалит асьсö. Жугöдчис нэмсö. Но шог вöли кывны меным, мый войнаса ветеранöс бөръя туйö колльöдны некод абу волöма — ни райвоенкоматсянь, ни Ветьюса администрациясянь.

Александра Степановна висьталö: ми кө пö, олöма йöз, огö лоöй, некод сэсся танi оз коль. Сиктыс дзикöдз эндас. Сöмын пö Сталин кадся йöз вылас и кутчысис ставыс. А öнiясыд пö веськодпырысь олöны. Некодлы нинöм оз ков. И зэв эськö бур вöли, татчöс му-видзсö кө босьтiсны ас кианыс тölка да зиль йöз, кодъяс радейтöны мусö да оз повны сьöкылдунъясысь. Öд быдтöм-вöчöмторсö асфальта туйöд позьö нуны-инавны Емвайö. Сэсся и сиктас, кор ми волiм сэтчö, вежоннас кыкысь кежавлö Мещураöдз ветлысь автобус.

Важ моз гажа овлывлö Весевайын сöмын Илля лунö, сийöс танi лыддöны крам праздникөн. Сэки чужан сиктас чукöртчывлöны коркöя олысьяс, налөн челядьыс, внук-внучкаясыс. Важ клубö йöзыс оз тöрны — сы мындаөн волöны. Ставөн сэсся кежавлöны шойна былö, медым казытыштны мöдаръюгыдö му-

нөм матыссаяссө. А праздникид коляс да, бара чөв-лөнь коркөя гажа сиктын...

Мый водзө виччысьö Весываөс, сьöкыд шуны. Вежа Микöла-лөн киссьöм вичкокöд орччөн джуджыд сюръяяс вылö öшöдöм-öсь вичко жыннан. Мед пö юöртны, кöнкö кö нем виччысьтöг ыпнитас би. А ме чайта да, важөн нин кад воис юрöбтыны тайö жыннаныслы мöд помка вöсна. Мед бөр корас ас чужанінö Весываын чужлöм йöзöс, налысь челядьнысö, внукъяснысö, мед локтöм войтырыс, кодъяслөн вужъясыс татысьсö, отсаласны ловзыны важ сиктыслы. Но оз ёна эскыссы, мый збыльмас менам мөвпöй да Весываысь петлöм войтыр бөр бергöдчасны асланыс пöль-пöчъяслөн чужанінö.

...Сійö луннас пажын бöрын нин ми бөр лöсьöдчим петны туйö. Сиктса улич бокин лöня кышакылis кузь пырей турун. Ни öти ловъя лов эз тыдав сиктас. Гырысь керъясысь кыпöдлöм керкаяс асланыс пемыд öшиньясөн чöла да шога видзöдисны мунысьяс вылö да быттö дивитisны мянöс, мый асланыс кöзьяинъяс моз тшöтш эновтам найöс. Сиктса вичко дорын чöла öшалis кузь сюръяяс вылын жыннан да шогпырысь видзöдис татчö кежалöм гöсьтьяслань. И сöмын татчöс шойнаын, кодöс мыйлакö вöчлöм-öсь сиктыскöд дзик орччөн, мед, гашкö, ылö эз ков ветлыны гуасыны, бура тыдалisны еджыд краскаөн мавтöм кöрт да пу крестъяс. Тöдчис, мый татысь петлöм войтыр помнитöны асланыс важөн нин кувсьöм пöль-пöчъяс йылысь да корсюрö воывлöны чужан сиктас. А меным мыйлакö сідзи и чайтсис: шойнаыс быттö ошйысис, мый и сійö тшöтш отсалis кусöдны быдса ыджыд сиктлысь Олöмсö да кыскис аслас крестъяс улö сэтчöс зиль войтырöс. И кутшöмкö аслыспöлöс зумышлун чужис менам морöсын эндöм сиктлысь серпассö аддзöм бöрын. Быттö нетшыштisны сьöлöмлысь ыджыд да кола-на юкөн...

А татчöс вөр-ваыс гажöдчис гөгөр. Енэжын яръюгыд шондi койис ассыс пöсь югөръяссö лöнь да шогалысь сикт вылö, сы бердö шевкнитчöм муяс да видзяс вылö. Гораа сьылisны лэбачьяс. Сикт бердтi визувтысь ичöтик Весыва ю пöртмасис шондi югөръяс улын, зilис öдйöджык кутчысьлыны орччөн визувтысь Емва юкöд да быттö шензьöмөн кöсийс юавны мянлысь, кытчö нö пö вошисны тайö сиктсьыс йöзыс. А сэккостi рытив-лунвывсян кыпöдчысь ыджыд сьöд кымөр кутis каз-тывны ас йывсыйс чардби ньöвъясөн да гора муркакылöмөн. Быттö öлöдис, мед эгö торкöй эновтöм сиктлысь чöвлунсö.

Гортö воөм бöрын дыр на сулалis син водзын важся Весыва сиктлөн гажтöм серпасыс. Весиг вöтаси та йылысь. Быттö локтöм-öсь Илля луно гажöдчыны чужанінас Весываса вöвлöм олысьяс. Сьылöны кыпид сьыланкывъяс, йöктöны-гажöдчöны сиктса клубын. И со кытыськö воисны гажöдчысьяс дорö налөн зумыш чужöма ловзьöм пöль-пöчъясыс да нор гөлöсөн корöны быдтасъяснысö бөр бергöдчыны гортаныс, мед водзö эз рассявны татчöс видзяс да муяс, мед гажа гөлöсъяс бара юргисны нэмöвöйся керкаясын, мед Емва да Весыва юяс кузя бөр мöдисны кывтны ас войтырлөн мастер киясөн вöчöм пыжъяс. Но чөв олisны гажöдчысьяс. Нинöм эз сяммыны вочавидзны асла-

ныс пöль-пöчлы. И вочасöн вошисны кытчöкö йöзыс, саялис еджыд ру сайö и ыли Весава сикт...

Абу дивö, мый тыртöммöны да бырöны ыли коми сикт-грездъяс. Помкасö оз и ков ылысь корсьны. Помтöм реформаяс нуöдан кадö дзикöдз киссис мян видз-му овмöс. Эз лоны совхозъяс да колхозъяс. Йöз колисны уджтöг. Нöшта мян ыджыд и ичöt власътъяс кутисны дугдывтöг больгыны, мый ыли сикт-грездлөн, көни буретш кылö на коми горыс, тöдчö бур коми оласногыс, абу аския луныс. Тупкисны сэни школаяс, бурдöд-чанінъяс, а сэсся и лавкаяс, поштаяс. Томджык олысьяслы некытчö лои воштысьны. Кытысь нö сэни уджыд сюрас? Көни кутан быдтыны-велöдны челядьöс? Йöз муналисны овны юр-сиктъясö, каръясö. Колисны посни грездъясö сöмын олöма йöз, кодъяслы некытчö мунны да кодъясöс некөн оз виччысьны. И найö талун коллялöны ассьыныс нэм помсö важся оланінъясын. И татшöм ногөн, позьö шуны, лои керыштöма коми оласногыс-лысь вужъясö. Öни эськö кватитчисны татшöм туйвизьсö нуöдысьяс, но сёр нин.

Важся Весава сиктысь петлöм войтыркöд талун позьö паныдасьны Емваын, Сыктивкарын, Ухтаын, Сосногорскын. Асьныс найö помнитöны на чужаніннысö, эз на дзикöдз вунöдны мам кывнысö. А налөн челядьыс öдвакö нин кутасны сёрнитны комиön. Тадзитö кутшöмкö кад мысти быдса войтыр вермас вошны тайö шондi увсьыс. Вунöдасны ассьыныс кывнысö, оласногысö. И кодi сэки кутас тöдны, мый коркö Емва ю бокин овлисны зиль коми вöралысьяс да чери кыйысьяс, му вöдитысьяс да вөр лэдзысьяс?

Збыльысь, мыйлакö кута на надея бур вылö. Абу сiдз-тадз овмöдчылöмаöсь Весава ю вомö кык сюрс во сайын важ коми-яслөн пöль-пöчыс. Мыйкö найöс кыскöма татчö. Медсясö, дерт, чериа юясыс, звер-пöткаөн да тшак-вотöсөн озыр пармаыс. И став сертиыс тöдчö, абу омöля овлöмаöсь. Но бөръя нэм чöжөн со бара мунöны татысь. Гашкö, бокин олöмыс бурджык да тайö кыскис найöс пöль-пöчъяслөн чужанінысь?

Ме век на эска: воас кад да коркö выльысь овмöдчасны важинас танi овлысьяслөн внук-правнукъясыс. Сiдзи тай чайта-а.



## Изьваса водзмöстчысь ань

Войвыв Сибыр да Ылыс Асыввы вужвойтыр Ассоциациялön сöвет пасйис «Изьватас» öтмунöмлысь почёта председатель Валентина Ивановна Ануфриеваöс «За верность Северу» медальöн. Тайö медальыс сетсьö налы, кодъяс уна вын да тöжд пуктöны вужвойтырлысь ас оласногсö видзöм, налысь олöмсö бурмöдöм, чужан кыв да культура сöвмöдöм вылö. Тöдчöда: комияс пöвстысь некодлы на эз вичмыв татшöм медальыс.

Изьваса зиль нывбаба йывсьыс позьö висьтавны уна. Чужис сийö Печора бердса Вол сиктын. Велöдчис Наръян-Марса педучилищын, сэсся уджаліс пионервожатöйöн Харей-вöрса школаын (Ненеч автономной кытш). Учителяс эз тырмыны да ковмис велöдны тшöтш и математика нельöд да квайтöд классъясын. Челядькöд ноксяна уджыс кажитчис Валентиналы. Кор чорыда



висьмис батыс, сылы быть лои энöвтны ставсö да мунны Брыкаланскö, айыслön чужан сиктас. И тані зіля босьтчис уджавны пионеръяскöд да школьникъяскöд, котыртіс челядьлысь хор (Валентина ачыс мичаа сьылö), кружокъяс, отсасис ныв-зонкöд совхозлы пуктыны турун. Изьва комсомол райкомын казялісны Ануфриевалысь челядькöд уджалан сямсö да бöрйисны аньтö школаяс кузя ВЛКСМ райкомса секретарöн. Быд школаö кутшöмкö да кутшöмкö буртор пыртіс мортыд: öтилаян котыртіс шахматön да шашкиön ворсöм, мöдлаян спортивной ордысьöм, коймöдлаян ловзьöдіс вөр-ва доръян удж.

Коми пединститут помалöм бöрын Валентинаöс босьтісны ВЛКСМ обкомö. Тані сийö кывкутіс студентъяс пöвстын удж нуöдöм вöсна. Эз дышöдчы, ветлывліс том йöзкöд походö, котыртіс КВН-яс, уна вын пуктіс военной да патриотической удж сöвмöдöмö. «Томдырйи ми велöдчим овны да уджавны войнаса ветеранъяслысь,— висьталіс В.И.Ануфриева.— Менам бать Иван Никитич Терентьев дорйис Сталинград, сьöкыда ранилчыліс. Война бöрас уджаліс партия райкомса секретарöн, машина-трактор станцияса директорön, веськöдліс леспромхо-



---

зён. Ёні на бур кывйён казътывлёны сійёс, коть эськё важён нин кувсьыліс да».

ВЛКСМ обкомсянь Валентина Ивановнаёс коралисны Коми АССР Министръяс советё, тані дас квайт во юрнуёдіс организационной отделён, паськёдіс каръясса да районъясса советъясын чужом колана опыт. Эз вунёдлы и Изьва район йылысь, зілис тёдмавны, мый сәні бурыс, кыдзи татчёс сикт-грездын олёны-вылёны. Зэв нимкодясис, мый Изьва вожын воысь-во содö спорт кузя мастеръяслөн лыдыс (районысь петіс спорт кузя 67 мастер). Лыжиён котралысь Раиса Сметанинаёс да Василий Рочевёс тёдöны мир пасьтала. Мокчойысь Алексей Алексеевич Ануфриев лоис народной тренерён, сәсся и Россияса медся бур тренерён. Сылөн быдтасъясис шедöдісны зарни, эзысь да бронза медальяс. Бакурса шөр школаын медводз лосьöдісны зонкаяслысь хор. Бурторйыд öдйö паськаліс. Велöдчысьяслөн хоръяс öні эмось районса уна школаын, а Сизябскысь «Купальница» ансамбль (веськөдлысьыс Валентина Чупрова) воліс весиг Сык-тивкарё, Печораё да уна мукөдлаё.

Некымын во В.И.Ануфриева веськөдліс изьватасъяслөн Сык-тивкарса юкөнөн. Сылөн водзмөстчөмөн Изьваса сикт-грездъясысь петлөм йөз аддзөдчылісны Коми наука шөринса учёнойяскөд, коми да роч гижысьяскөд, артистъяскөд... Юркарса «Изьва керкаё» волö уна йөз. Мича стендъяс восьтöны Изьва районлысь чужөмбансö, петкөдлöны татчёс йөзлысь оломсö да уджсö. Меным сёлөм вылö воис пельёс, кодöс сиöма Печора пароходстволы. Шемös босьтö, кутшөм ыджыд да вына пароходъяс коркö паськыд ю кузя ветлөдлісны, кутшөм мича теплоходъяс, баржаяс, дебаркадеръяс вöчлісны Щельяурса затонын.

2003 воын Валентина Ивановнаёс бөрйисны «Изьватас» öтмунөм советса юрнуöдысьөн. Тайö зіль нывбабаыс коми кывлысь тöдчанлунсö кышөдөм, Изьва мулысь история да культура паськөдөм могысь кужис öтувтны школаясса, библиотекаясса да районной музейса уджалысьяслысь вынъяссö. Сылөн водзмөстчөмыс сетіс позянлун изьвасаяслы тöдмасыны уна енбиа йөзкөд, кодъяс чужлісны Изьва вожын: Яков Рочевлөн, Владимир Поповлөн, Егор Рочевлөн, Яков Чупровлөн, мукөд нималана гижысьлөн творчествоөн, налөн кывбур-повесъясысь төдмавны, кутшөм мича Изьва муыс, кутшөм мывкыд да уджач йөз сәні олёны. Казытылана рытъяс сиисны тшöтш Ямалса гижысь Иван Истоминлы, Усинск районса көр видзысь Пик Артеевлы, коді йөзöдіс тундраын олом-вылөм йылысь уна висът да очерк.

Изьватас öтмунөмлөн юрнуöдысь В.И.Ануфриева Сыктивкарса государственной университетлөн фольклор да литература кафедрасысь вöвлөм доцент Валентина Филипповакөд волісны Ханты-Манси, Ямало-Ненеч да Ненеч кытшъясса сикт-грездö, кытчö овмөдчöмаёсь Изьва муысь петлөм йөз, гижисны да снимайтісны став аддзылөмторсö, а сәсся тöдмөдісны изьвасясös рөдвужлөн олом-уджөн.

Изьва мулысь төрытъя да талунъя лунсö паськыдджыка петкөдлыны отсалöны Изьваса сьылысь Василий Рочев, коді воліс Обь бердса уна сиктö, Ханты-Манси университетысь про-



---

фессор Евгений Игушев, Коми научной шöринысь исторической наукаясса доктор Александр Попов да мукöд нималана йöз.

Валентина Ивановна ёна тöждысö, медым миян республика-ысь унджык том йöз босьтисны тöдöмлун техникумъясын, институтъясын, университетъясын. Торйöн кө, сійö лöсьöдiс топыд йитöд Санкт-Петербургысь Герцен нима институткöд. Öнi сәни Изьва да Коми Республикаса мукöд районъясысь велöдчöны 43 ныв да зон.

«Изъватас» сöветöн юрнуöдысь мöдöдлiс шыöдчöм Россияса Президентлы да премьер-министрлы, корис, медым изъватасöс пыртисны Россияса этша лыда вужвойтыр пöвстö, та бöрын эськö государствосянь кутис воны ыджыдджык отсöг. Изъваса көр видзысьяс, медым ыджыдджык донысь босьтисны на пельöсьясысь яйсö, ассьыныс овмöсьяссö гижöдiсны Ненеч автономной кытшö. Быттö найö сэтчöс войтыр. Сэк жö семьясныс олöны Изъва районын. Татшöмторйыс, дерт, унаöс дöзмöдö.

«Изъватас» öтмунöмлöн сöвет заводитiс лэдзны и «Пространство изъватас» нима газет, тиражыс абу ичöt, квайт сюрс экземпляр. Лыддысьысьяс дiнö аслас шыöдчöмын Валентина Ивановна пасйис, мый выль петас кутас паськыда петкöдлыны изъватаслысь историясö, культурасö, висьталас мукöд кывъя йöзкöд йитöдъяс йылысь.

Изъватасъяслöн öтмунöмлы тырис кызь во. Вылö донъялöма лои и В.И.Ануфриевалысь уджсö: сылы сетöма изъватас öтмунöмса почёта председательлысь ним, а Коми Республикаса юралысь В.М.Гайзер пасйис аньöс «За заслуги перед Республикой Коми» знакöн.



## Висьтъяс

### Водзӧс

Марья Ивановна, Ньючим школаса велӧдысь, кӧсйысьліс мӧдӧд классаясӧс лӧччӧдлыны карӧ вельвояс ёлка вылӧ. И со челядь сӧлісны школьной автобусӧ да чиктылісны. Ставлы любӧ, мый мича козсӧ аддзыласны да пӧттӧдз йи чой йывсянныс исласясны.

Коля Макаров пукаліс Ваня Ширяевкӧд орччӧн. Найӧ дзӧръялісны автобус ӧшиньӧд. Ӧта-мӧдыслы индалісны аддзылӧм керкаяс да панийсь машинаяс вылӧ. Вензисны, кутшӧм паса машина муніс.

Карса изэрд вылын жуисны нин йӧз. Локтӧмаӧсь посни, сяльӧдчысь челядь асланыс пӧчӧяскӧд. Марья Ивановна чукӧртіс воӧмаясӧс, кытшовтӧдіс чачаясӧн мичмӧдӧм коз гӧгӧр, сӧсся висьтавліс, кыдзи колӧ исласьны, медем не доймыны.

— Ставӧн гӧгӧрвоинныд?— юаліс сійӧ.

— Ставӧн!— горӧдісны челядь.

Коля Макаров эз кут нӧрзыны. Ырыштчис первойӧн котӧртны йи чой йылӧ. Тӧрмасигад пельпомнас зырыштіс Ваня Ширяевӧс. Мӧдыс тӧкӧтьӧ эз усь. Тойласьӧмыд сылы эз кажитчы. Суӧдіс Коляӧс да мый вынсьыс йӧткыштіс лым толаас.

Коля павгысис тола пытшкӧ. Бергӧдчис мыш вылас да сідз и коли куйлыны. Аддзис зонкатӧ Марья Ивановна. Кутіс корны, мед чеччас да пыркӧдчас.

— Ог, ог чеччы!— скӧрысь горӧдіс Коля.— Менӧ тойыштісны. Оз лӧдзны исласьнысӧ!

— Коді оз лӧдз?

— Ставныс!

Кыліс горзӧмсӧ ӧти пӧчӧ, матыстчис да тшӧтш кутіс шуавны:

— Чеччы, кынман да висьман.

— Но и мед кынма! Мед висьма! Менӧ йӧткыштісны, увтыртісны, смекайтчисны став йӧз водзас!

— Висьтав, коді смекайтчис?— юасис Марья Ивановна.

— Ваня Ширяев!

— Аддзӧмыд, код вылӧ норасьны. Сійӧ тӧ дорысь тушанас ичӧт. Чеччы, пыркӧдчы да мун ислась.

— Ог, мед кынма да висьма,— ыждаліс Коля.

— Бать-мамыдлы норася. Некор сӧсся ёлка вылас ог босьт тӧнӧ,— дӧзмыны кутіс Марья Ивановна.

— Ог пов норасьӧмсьыд! Некодись ог пов. А ёлка вылад мӧдысь ачым ог мун!

Пӧчӧ, коді пыр на кывзис зонкалысь ыждалӧмсӧ, перйис зепсьыс телефонсӧ.

— Пыр жӧ милицияӧ звӧнита, Вель восӧ кутузкаын кутан пукавны.

Коля кыліс пöчлысь стрöг кывъястö да звирк чеччис, пырк-нитчис да суöдiс Ваня Ширяевöс. Асьсö сийöс тойыштiс лым пиас.

— А-а, кажитчис?!— юалис Ванялысь.

— Мый тойласян?

— Водзöстö,— вочавидзис Коля.

Сэсса нюжöдiс ёртыслы кисö, отсалiс чеччыны. Водзöс бось-тöм бöрти сьölöмыс Колялөн бурмис.

— Суöд!— горöдiс Ванялы да котöртiс йи чой йылö.

## Найдыш

Ме ола карын, уна патераа вит судта керкаын. Öтчид урокъ-яс бöрын матыстчи керка дорö. Лымсö кокысь пыркнитi да көсийи нин восьтыны öдзöссö, но друг син улö уси йöжгыльтчöм кань. Еджыд, синъясыс мича турунвижöсь, пашкыр бöжа. Каньыс видзöдлiс ме вылö да зэв нора нявöстiс. Тыдалö, вöзйысис мекöд пырны. Ме и лэдзи сийöс, мед шонтысяс. А сийö бöрсянь патераöдз вöтчис. Миян каньыс коркö вöли жö. Ыджыд мамсянь на кольi. Сэсса пöрысьысла кулi. Ми сийöс гуалiм-дзевим. Мамö да ме весиг бöрдыштим. Бать сэки шуис:

— Шабаш, сэсса ог лöсьöдöй каньсö. Нинöм сыысь карад, сöмын содтöд сёйысь.

Та вöсна полiгтырйи лэдзи каньсö гортö. Сёйигөн тасьтiысь пуктi сылы выя рок да блюдйö йöвтор кисьтыштит. Сэсса шкап сайö вöчи поз да сэтчö тшöктi пырны. Первойсö эз көсийи кывзысьны, но вочасөн велалiс поз дорад. Кольччис шкап сайö, кутiс кургыны.

— Асьтö эн явит, пукав чöла, а то вöтласны,— малала да шуала сылы.

Рыгнас муртса мамöй да батьöй воисны удж вылысь да вежисны паськöмсö, еджыд кань бырс петiс позсьыс. Матыстчис бать дорö да кутiс ниртчыны гач кокас.

— А тайö кысь уси?— стрöга юалис бать.

Ме юр öшöдöмөн сулала, нинöм ог висьтав.

— Ваня, ме тэнсьыд юала.

— Кынмö вöли да лэдзи шонтысьны.

— Шонтысьны,— нерыштит бать.— А гашкö, кодкö сийöс котралö-корсьö. Колö лэдзны, мед гортас мунас.

— Вой улас огö жö вöтлöй,— шыасис мам.— Понъяс косявласны. Гөгөр найö шöйтöны.

— Но ладнö, сöмын аскиöдз,— небзыштит бать.

Мöд луннас вöли шойччан лун. Мам и бать гортынöсь, меным школаö оз жö ков мунны. Гортын пелькöдчöм бöрын ми мамöкöд петiм ывлаö. Тöлыс лэчид, менсьым чужöмöс сотыштитсны кодзыд лым чиръяс.

— Со кутшöм чизыр тöлыс,— шуис мам.— Тупкысь шарпнас. Каньтö кө вöтлiм ывлаас, тöдöмысь, кынмис.

— А-а,— довкнитi юрөн.— Көдзыд да кувны эськö вермис.

Мамöкöд кытшовтим матiгөгöрса керкаясöд. Юасим, эз-ö код-лөнкö вош каньпи. Весиг снимайтiм выль олысьтö да лавка

стенö ляким шыöдчöм: мися, сюри кань, корам звöнитны та-тшöмтö-татшöмтö телефон пыр.

Но коли лун, дай мöд, весиг вежон, но найдыш каньлысь кöзяинсö сідз эг и аддзöй. А öти пöчö шуис миянлы, локтан во-ыс пö кроликъяслөн да каньяслөн, тиянлы еджыд каньыс шудлун ваяс. Эз весьшөрö сійö тиянö лок.

Та бöрын мам лöсьöдіс тазйö шоныд ва.

— Найдыш,— чукöстіс сійö каньöс.— Лок больöдчам.

Ми дыр мыським кысöйсö. Сійö пессис, эз бурөн сетчы. Тыдалö, некор на ватö абу аддзылöма. Бөрвылас ачыс вель пöв нювсис, мыссис. Косьмис да юсь кодъ еджыд лои. Сідз сэсся сылы Найдыш нимыс и коли. Найдыш мукöддырйи зэв вильыш овлö. Ризъялас-котралас, öшинь вылын сулалысь дзоридз сайö дзебсылас. Менö ворсны корö. Гортса удж вöчöм бöрын ме радейта жö ськöд ноксьыны.

Рыгнас, кор вода узыны, матыстчас мелань, ниртчыштас крö-вать кокас. Быттьö вöзйысьö ме дорö. Сэсся водас орччөн да кургыны мöдас. Кургöм улас и унмовся.

Сёян пиысь медся ёна Найдыш радейтö «Вискас». Лавкаын вузавлöны татшöм сёянсö. Сійöс, гашкö, став каньыс свет вылас радейтö да. Найдыш матыстчас мам дорö, ниртчыштас сы кок бердö да видзöдлас корана синъясөн. Тадзи дзайгö чöскыдторсö. И öтчыд оз нявöст. Мамö сöмын на босьтас «Вискас» көрöбсö, кысöй здукөн котортас аслас блюд дорö.

Сöмын батьö сійöс эз радейт.

— Брысь, эн гартчы кок улын,— дöзмöмөн шуывлас вöлі.

Найдыш мыжа синмөн видзöдлас сы вылö да пыр жö вешъяс бокö, йөршитчас жыр пельöсö.

— Эн сы дорö матыстчы,— малалігмоз велöда кысöйöс.— Батьö абу скөр, но каньяссыд öтдортчö.

Тöдлытöг воис тулыс. Ми став семьяөн мöдöдчим дачаö. Коліс градъяс лöсьöдны да пуктысьны. Найдышöс тшöтш босьтім аскöд. А миян дачаын зэв уна шыр оліс. Весиг керка пытшкын шарöдчисны, миянысь эз повны. Батьö эськö шыръяссö налькйөн кыйö вöлі, но найö гежöда шедлісны. Мукöд шырыс зэв мудер: сёянсö сёяс, а налькйö оз пыр.

Найдыш медводдза луннас нин шыртö тшапнитöма, вайис миянлы ошйысьны. Батьöлы кок улас пуктіс кыйöмторсö да нявöстіс. Тыдалö, виччысис ошкана кыв.

Бать чуймöмөн видзöдліс сы вылö.

— Кыйсьысь тай вöлöма. Мед, сідзкö, и олас миянкöд. Сё шыр дорысь бурджык öти каньöс вердны.

Та бöрын сэсся батьö эз нин горöдлы Найдыш вылö. Еджыд кань овмöдчис миянö. И, тöдöмысь, вунöдіс нин воддза гортсö.

## Сьöд кань

— Эй, Булка, виччысьлы!— кыліс Петя Шарковлөн гөлös.

Ваня Булкин сувтіс, мöдіс видзöдны котөрөн суöдысь ёртсö, код бёрся дом повод вылын вöтчис кузь гöна ичöтик пон.

— Ну, Шарик, бара аштöмьд,— дивитана шуис Ваня.— А Барбоссö мыйла босьтін?

— Тэ эськө аштін жө, та мында кө ковмис котөртны. А та-йө абу Барбос, а Волкодав.

— Волкода-ав?— чуймис Ваня Булкин да серөктіс.— Да сылы чуньөс кө петкөдла, пышъяс.

— А-а, петкөдлы.

Ваня перйис зепсыс кабырсө да чургөдіс Волкодавлы. Волкодав пыр жө эрыштіс, семдіс увтөмысла. Уськөдчис да шашаритчис Ванялы гач кокас, төкөтьө оз чашнит-косяв.

— Öнi төдмалін, мый тайө збыль волкодав?

— Да,— Ваня зілис мынтөдчыны понйысь.— Кут домөдыс. Петя босьтіс сылі домөдыс Волкодавсө, кыскыштіс асланныс.

— Фу, на место,— рочыштіс сійө.— Волкодавыс өд роч, карса. Иван чож вайліс коркө, ичөтнас на.

— Роч, дерт. Сійө оз гөгөрво, көть китайскөйөн шу.

— Он верит?

— Ог.

— Со видзөд.

Петя стрөга дзалснитліс синнас Волкодав вылө да тшөктіс:

— Увтышт!

Волкодав чөв оліс, сөмын бөжнас легөдіс.

— Волкодав, гав, гав!— выльысь горөдіс Петя.

Волкодав пыр жө кыкысь увтыштіс.

— А-а, аддзылін?— радлыштіс Петя Шарков.— Ме жө шулі, мый роч.

— Аддзылі, а кытчө сыкөд мунанныд?

— Төдан, Толя Маркин талун школаын ошйысис, мый сйлөн Васька каньыс тигр кодь ён да скөр. Менсыым Волкодавөс пө пусь-пасьвөчас. Яндысьтөм син! Öнi сы дорө муна. Тэнө сы вөсна и горөді, мед аддзылан, кыдзи менам Волкодав сылісө сы тигрлысь песовтас.

Ваня пыр жө көсйысис тшөтш ветлыны. Öнi сійө эз падъяв, тшукуысь төдіс, мый Толя Маркинлөн Васька каньлы коли здук-мөд овны.

Маркин виччысис найөс аслас дзиръя өдзөс дорын. Моздорас кутіс смоль сьөд каньөс. Петя горөдіс Толялы:

— Энлы, час домсө мынта да, вөлись каньтө лэдз.

Петя мынтіс домсө пон голяысь, а Толя лэдзис каньсө муас. Васька лэптіс гөрбсө, пашкыртіс бөжсө да чургөдіс усьяссө водзлань. Быттө көсйис пырысь-пыр парсыштны Волкодавлысь син-нырсө. Но абу на тай сідз вөлөм! Волкодав дом йылысь мынөм бөрын дзик виччысьтөг уськөдчис кань вылө. Васька прысьнитіс-сьөлыштіс да осьса дзиръя өдзөсөд чепөсйис керка йөрө. Пон сы бөрся.

— Ха, ха, ха,— серөктіс Петя Шарков да индіс пышйысь кань вылө.— Тигрыд пышйис, всё, хана сылы! Булка, тэ свидетель!

— Шарик, бара водзвыв чиктылан,— өлөдіс Шарковөс Толя Маркин.

Кань да пон саялісны карта сайө. Кыліс сөмын Волкодавлөн тязвөмыс. Сэсса здук кежлө ставыс лөнис.

— Сөйис, тыдалө,— өвтыштіс кинас Ваня Булкин да тшөкмуні. Лёкысь никсігтырйи дзиръя өдзөсөд, бөжсө кок костас сүйө-

мөн, төвзис-петіс Волкодав, а бөрсянныс гораа нявзиг, пашкыр бөжа вөтчис Васька кань.

Волкодав эз весиг видзөдлы көзяин вылас. Никсигтырйи и котөртис гортас. А Васька здук-мөд вөтөдыштөм бөрын косіс да тшапа пырис дзирья өдзөсөд.

— Ха, ха, ха,— серөктісны Ваня Булкин да Толя Маркин.

— Көні нө Волкодавыд? А шуан вөлі, каньлысь пө сьылісө бергөдас,— нерыштіс Толя Маркин.

— Васькаыс сьөд да, дерт,— дорйысис Петя Шарков.— Сьөд каньсьыд и тэ полан, мед туйтө оз вожмав.

## Утка чукөр

Ме, Света чой да ыджыд мам кольөм шойччан лунө кайлім керөсө чөд вотны. Вайим вотөссө гортө, весалім ёгсьыс. Ыджыд мам рытнас лысьтіс Сюрукөс да миянлы кыкнаннымлы кружка тыр йөв сетіс.

— Чөсмасьой мөс вөра йөвнас,— шуис сійө да матыстіс чөд тыра тасьті.

— Чөднас юөй, чөдья йөлыд өд чөскыд,— водзө велөдіс ыджыд мам.

Збыльысь, чөскыд и вөлөма. Ми чойкөд содтөд на йөвсө корим. А сэсся шуим керөсас аски выльысь кайлыны. Стөч сійө местаас, көні вотчим нин да кытчө вотөсыс зэв на уна коли.

Мөд лунас водз чеччим. Ыджыд мам коскас кутчысьөма.

— Төрыт, тыдалө, кынмысьсьөма вөрас. Талун со кыдзи ёнтө,— коссө шонтан мазьөн зыралігмоз висьталіс сійө.

Сюрукөс мамө лысьтөма, идралөма да лудө кольөдөма. А пөчө карта вылас абу нин вермөма лэччыны.

Ми видзөдлім өта-мөд вылө. Мый вөчны? Асьным каям вөрас, либө өвсям таысь?

— Талун гортын олөй, а то өткөнтө вошанныд,— кутіс өлөдны миянөс ыджыд мам.

Вошөм йылысь гарыштөмыд меным пыр жө чуши. «Дзоляөн лыддьө»,— ас кежын мөвпышті да мөді вензыны:

— Вошам, дерт! Меным дас кык нин. Дай вөрыс матын. Төрыт тэ пасьявлін пыранінсө. Кымын газет тор өшөдім пу увьяс вылө.

— А меным дас өти,— сөйсис сёрниө чой.— Рытнас на мамөй шуис: ыджыд нин пө.

— Сідзтө эськө сідз да,— небзыштіс ыджыд мам.— Тиян арлыднад ми өтнаным жө маті вөрас котравлім.

— Но и ми ветлам,— кывкөрталі ме да перйи шкап жырйысь батылысь компассө.

Кужа сійөн вөдитчыны. Батьө велөдліс.

Пасьтасим, ботіасим, питшөгө няньтор сөйыштім, сойбордө пысалім ичөтик чуманъяснымөс да мөдім керөсө. Гожся луныс гажа. Гөгөр дзользисны лэбачьяс, веж турун пытшкын чеччалісны чиркьяс. Дзизгисны-лэбалісны малямущьяс.

Миянлы коліс неуна муныштны кыддза рас пөлөн, көновтыштны Сьөд тылысь помсө. Кайыштны нөрысөд, сы бөрын заводитчас козья вөр. Буретш сэні ми и вотчим кольөм лунө.



Сьод ты дорё воигён виччысьтөг турун пытшкысь мыччысис да вожмаліс туйнымос утка чукөр. Утка мамыс нуөдіс Сьод ты дорё лэбавны вермытём на уткапиянсө.

— Кря, кря,— герчкис утка мам.

Ми Света чойкөд джөм сувтім. Тадзитё утка чукөркөд паны-дасим первойсы, да миянлы вөлі зэв любө. Виччысис, мый водзё лоө.

Утка мам син пөвнас дзалснитліс миян вылө. Нөшта содтіс өдсө да гораджыка на мөдіс герчкыны. Уткапияныс чипсісны, зія вөтчисны мам бөрсаяс. Ты дорё воигён налысь туйсө потшис пөрөм пу. Куйлөмысла нитшсялөма. Утка мам вуджис пу вомөн. Бөрсяныс кавшасисны пияныс. А өтик, медся ичөтыс, эз вермы кайны. Öдөбылас, дзик вылөдзыс нин волас, но бөр тумбыльтчө-усьö.

— Час, ме отсышта,— уськөдчис Света.

Но муртса на матыстчис уткапи дорё, а утка мамыс, скөрысь герчкиг, кыз тай уськөдчис паныд!

— Кря, кря, кря!

Дась кокыштны Светалысь нюжөдөм кисө.

Света повзис да бөрыньчыштіс. А сэккості уткапи выльысь өдөбтіс кайны. Мамыс уськөдчис сы дорё да нырнас йөткыштіс писө вывлань. Уткапи турбыльтчис пу мөдарас. Сувтіс кок йылас, пыркнитчис да кутіс вөтөдны чой-воксө. А утка мам стрөга чөвтіс синсө миян вылө да тэрмасьтөг водзё нуөдіс ассыс челядсьö.

Кыкнанным бура дыр сулалім вөрзёдчытөг. Видзөдім, кызди уткаяс воисны ты дорё да пырисны ваө. Водзын мамыс, а бөрсяныс пияныс уйисны.

Кор воим вотчанинысь гортө, чөд тыра чуманъясөс пуктім посводзё. И керка өдзөс дорсянь на заводитім ошйысьны. Эг чөд вотөм йылысь висьталөй, а кызди утка чукөркөд паныдасьлім. Ыджыд мамлы лючки, өта-мөдөс вежмөн юөртім. Медбөрын Света помаліс:

— Ыджыд мам, жаль, мый коскыд висьмис. Тшөтш эськө аддзылін утка чукөрсө.

Ыджыд мам вочасө немтор эз шу. Сөмын малыштіс миянөс юрөд да мудера вашмуні.

## Пөрьясьысь магнит

Урок вылын Марья Ивановна төдмөдіс миянөс магнитөн. Ловшыөс кутөмөн видзөдім, кызди ичөтик мегыр кодь көрт асаліс көрт тувьяс, гайкаяс, болгъяс.

Марья Ивановна босьтіс бура ыджыд картон тор. Пуктіс сы вылө көрт пань, а картон улас дзебыштіс магнитсө да увсяныс кутіс өтарө-мөдарө новлөдлыны. Кытчө магнит — сэтчө и паньыс мунө.

— Магнит вермө новлөдлыны сөмын көрт торъясөс,— висьталіс велөдысь.— А лемень, ыргөн, сөй либө пу сылы оз сетчыны.

— Ыджыдтор тай,— Миша шөпнитіс меным пельö.— Ме та-йөс важөн төда. Гортын магнитыс эм и. Во, мый ыжда!

Миша кыкнан кинас петкөдліс: со кутшөм пö магнитыс. За-

водитіс ыджыдсянь, а сэсся менам видзёдлас улын пыр дзёлям-мёдіс.

— Эм? И онёдз медбур ёртыдлы эн висьтав?— скорми ме.— Другон шусян! Аски жё вай.

— Мыйла сійо тэныд?

— Мыйла? Эк тэ, балда! Сы отсёгөн поэё научной опыт вёчны. Лоо картон кузя пань новлёдлёмысь бурджык.

Мёд луннас, урок водзвылын, Миша кыскис сумкасыс кёлач кодь гёгрёс кёрт да мыччис меным.

— Миян со татшом эм,— индіс вайомтор вылё.— Сёмын эн дыр видз. Гашкё, аслым ковмас.

— Эн дзёр. Кор коран, сэк и бёр вая.

Муртса вои гортё, вежи паськёмёс, нурьясышті и пыр жё куті магнитнад ноксыны. Патераын став кёрта кёлуй дорас инмёдлі. Линейкаон мерайті, мый ылнасянь заводитё магнитыс кыскыны. Лыдпассё гижалі торъя кабалаё. Мися, Мишалы пет-кёдла, мый ме шедёді.

Пыри ванна жырйё. Ва мунан трубаясё тшётш пуктывлі магнитсё. Муртса на удита матыстны, а сійо тшолкнитё-ляксё нин кёрт бердад.

Тшолкйёдлі отилаё, мёдлаё. Ачым эг тёдлы, кызди сійо кийсь гольснитіс-уси. Мудзмён корси — некытысь эз сюр. Ванна жырйысь быд пельёс малалі, пидзёс вылын кыскаси. Абу, быттьо сылі.

— Мый сы дыра сэн вёчан?— мыччысис пёчлөн юрыс.

— Магнитой воши да корся.

— Кутшом магнит?

— Тэ он тёд. Опытгяс вёлі вёчала да кытчөкө уси.

— Пет, мен колё пыравны.

Петі ванна жырйысь, а юрын вошомторйыс бергалё. Рытив-быд на корсьыси, но магнитыд сідз эз и сюр. «Мый Мишалы висьтала?— куті думайтны ас кежын.— Бара шуас, асалін пё. Ладнё, чөв олышта».

Коркё батё пырис ванна жырйё, мед ва арталан счёткикысь лыдпассё видзёдлыны: колё пё юёртны ваён могмёдысьяслы да.

— Тайё төлысьо этша ватё видзсьёма,— недыр мысти шуис мамы.

— Абу дивё. Ми од дачаын унджык кадсё олім,— вочавидзис мёдыс.

А мёд төлысьнас ваён могмёдысьяс асьныс мёдісны кытшлавны, видзёдавын счёткикгяс. Локтісны и миянё.

— Петкөдлөй счёткиктё,— шыасис отиыс.

— Со тані,— индіс налы батё.

Локтысьясыд здук мысти бёр мыччысисны ванна жырйысь.

— А ещө од интелегентгяс,— дивитана видзёдлісны батё вылё.— Гусяянныд, вёлом.

Батёлөн чужомыс гөрдөдіс.

— Кыдзи гусясям?

— Со, видзөдлөй, счётник пытшкас гёгылыс оз бергав. А сы бердө магнит пуктомныд, мед пөрьясяс.

Батё пырис ванна жырйё. Збыльысь, ва артасян мышкё ляскысьома магнит. Магнитлөн да ва арталан счётиклөн рёмыс откодь. Он кө тёд, кызди сійос вёчөма, нинөм он и казав. Оні

---

со коть мыйта видз васö, артасянлөн пытшкыс оз и вörззыв. Магнитыс бергаломсьыс кутö да.

— М-ме эг пукты,— мыкталомён артмис батълөн.

— Да тайö жö Дималён магнитыс, тöндзи вошлі да эз и сюр,— суйсис сёрниас пöчöй.— Дима, ноко волы.

Ме пыри ванна жырьö.

— Тайö вошлөмторйыд?— батъö кутіс киас магнитсö.

— Да, а кысь сюри?

— Кысь сюри,— нерыштіс менö сійö.

А воёмаяс пиысь öтиыс вöчис стрөг чужом да шыасис бать дорö:

— Но мый, ковмас акт гижны. Тайö тöлысьысь мынтысянныд лöсьöдом нормаяс серти. Дерт, тöдчымөн унджык лöö...

Кор мунісны ваён могмöдысьяс, батъöй ёна и видіс: со мый дон пö тэнад дурöмыд сувтіс.

— Тайö Дималён тöдлытөг артмис,— дорйыштіс менö пöч.— Ну бөр ассьыд магниттö. Он и тöдды, бара кытчöкö ляскыяс.

Аскинас школаын пыр жö матыстчи Миша дорö.

— На, тэнад магнитыд оз туй нинөм вылö, пörъясьö да быд-лаö ляскысьö-сибдö...



---

#### ПЫДДИ ПУКТАНА АВТОРЪЯС!

Редакцияö гижöдъяснытö ыстігөн быть колö юöртны:

1. Ассьыныд ним, вич, ов; кор да кöні чужломныд (лун, тöлысь, во).
2. Паспорт юörъяс: номер, серия, кор да кöні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.

**Тайöс юöрттөг редакция гонорар оз вешты.**

---

*Журналын йöзöдтöм гижöдъяс  
редакция оз рецензируют и авторыслы найöс оз мöдöд.  
Редакция оз век во öти кывіö авторъяскöд.*

---

Компьютерный набор **Н.Кузнецова**. Корректор **Н.Габова**.

---

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати, каб. 202.  
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).  
**E-mail: kodzuv@mail.ru; Сайт: www.komimu.com**

---

Подписано к печати 15.09.2014. Формат 70x108<sup>1</sup>/<sub>16</sub>. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 515. Заказ № 5386. Регистр. **ПИ № ФС 3 - 0226** от 20.12.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.